


Sorunu Kaläg na Ikä
Caning



Caning Bible Translation

Sorunu Kaläg na Ikä Caning Caning Bible Translation

copyright © 2018 Pioneer Bible Translators

Language: Shatt

Contributor: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2022-06-21

PDF generated using Haiola and XeLaTeX on 25 Aug 2023 from source files dated 29 Jan 2022

2b40784a-4366-56e0-9a60-47746d31e227

Contents

Luka	1
----------------	---

Inycil Luka

Täländiccä Legeygi tä Kaxsä Sorunongang

Sorunu Luka näka Luka me däch biskonu me kälägä Poläs garekärejeyang. Luka garekärejey sorunong ta apangza ngondey säbangäs Tiyafileus. Luka paye Tiyafileus bäle legednicc tä ngakä Yasuwa appoyo.

Ma Luka mändey mäpaye kän tä ota kä'day ndey bäle zänggä nga tä legednicc ka xänang näs Yasuwa Almasiyang. Luka lapedäng ka yaxsäwecca apo tä ngakä Yasuwa näkä kän kä'dayang dacadas Yaxudiny na känggi näs Yaxudiny songang, kängga sogo ngaka tasiny na känggi apoccong, menggä wiy na känggi wegka tängang.

Sorunu Luka läpedäng ngaki Yasuwa kangad na kasogkang ndey sog kän bäle akäsogi Kaläg xonyo kän täng tä ngaka tasiny. Sorunong lege ngakä aygä Yasuwa cawu xongondi musku siyäma tängang basa xongondi mägämel tiyating.

Luka togodäng bandagä nga tä ngakä yänakä Yoxana me Pac na yänakä Yasuwa. Bandagä ngakenegi läpedäng ka Yasuwang näs me yaxsäwecci Kaläg kadästäkog ka yaxsedängang. Sorunong koyo yaxsäwecca ngake tädäxiny tä ngakä Yasuwa, packäma na 'dongädäma na zägädäniccäma, Yasuwa na menggä räbke, wexekä Yasuwa, bäldeygä Yasuwa tä kän, menekäma, gadeygäma tä kalic, xäskäma na ngäsakäma tä xäs.

Läpidänic

¹ Kän mange käsäkädä dackä ngakä wexeki kasogäning na kä'desesäning tä warogkang tä räbäne kä'day, ² winy ka'das luguki känggi wexe ngakä Kaläg na koxtu nga na aga ndä lugung tä kogkang. ³ Nenyang agänang na ngasang karäbtä ngakä weg kä'day appoyo tä debic ndä oxowa apo ka agä mändey anggärejey bandagä räbäne tägi käxa ngondey Tiyafileus, ⁴ ndey ka gi

bäle zänggä ngakä wegki kaläpesäning tä giningang.

Duwalegä Iyänakä Yoxana

⁵ Tä butugku Xirudus buguningzä Yaxudiya, me tämed tä Kalägkandäng age ka Zakariya näs wayagkä menggä tämed tä Kaläg tä udsa säbangäs Abija. Ndä uxumandäng age ka Alizapad näs caxsä Xarunag. ⁶ Pädaxkäsa sälelexiny tagä Kaläg ndä sämene ngakä täsediccä Kaläg kä'day na akäsogi Kaläg payis känang appoyo. ⁷ Ndä pipindäng täsa säxong xa uxuma Alizapad pixing, ndä sa pädaxkäsa saboxso.

⁸ Xongonendäng Zakariya na udsä menggä wexeki kamen wexetang, kamen wexekä tämed tä Kaläg. ⁹ Na 'dodony* kadel täma täbangä tanyaranä menggä tämed tä Kaläg ka mä'doc taxä tämekä tedeldäkä Kaläg tä lägoygä mäsäs. ¹⁰ Ani mägä'doccus tä lägoygä mäsäsang, kulung känggi tängang kapasäning tunyu palacca.

¹¹ Na kala malayikanä Kalägkandäng kawayasa täma dokolo tandä abanic täwang tumunu lägoygä mäsäs. ¹² Na todi Zakariya kox malayika na nyigatäg kamen ma mädätägä.

¹³ Na malayika ngade täma ka, "Zakariya, wanga nyigatäg xa Kaläg kädäng paleygägi. Uxugi Alizapad 'do yedäng päxä apang tägi ndä gi n'doco dogada age ka Yoxana. ¹⁴ Ma mäsogo wanägi laye tidi, ndä kän mange lededäning xa sägäyäng ma, ¹⁵ ndä ma mälayis käxa tädäx na apo tagä Bazuwec. Ndä mäwuxi bux säxong, na mändey wuxiki 'dazic tängang mäwuxi säxong. Ma mälayis käxa päsewa na Ligidä Kaläg cawu cukuma tä bälegkä bosa. ¹⁶ Ma mämelede menggä Israyil mange ta Bazuwec Kaläg. ¹⁷ Ma mälayis käxa päccada tagä Bazuwec na panggu kala panggudugku me logey Iliya ndey mäwex mäganygä menggäsa ndey laley enggengga, na menggä ko'do mäwexe mäganyga ndey nyangädä lelertägkä däppic ndey mäbolasa kän tä benggä Bazuwec."

* 1:9 Mändey säbangäs "curungguduni."

¹⁸ Na Zakariya kamänze ka, “Agä asogowa key ndey abäle ka ngakong layecänäs tireneng? Xa agä kaboxsu ndä uxang kaboxsu mändey.”

¹⁹ Malayika kabuc ka, “Agänang anäs Jiprayil. Agä awede tä cuku Kaläg ndä Kaläg kayaxsä agä ka agä awung alegeyze tägi agoying yaxsäweccong apong tägi. ²⁰ Ndä gang nyäpäladas gi legece säxong, basa xongondi ngakong sogoduning tängang, xa gi kämen ngakang säxong, ndä kəcag wunosuno layecänäs tire tä xongondi tängang.”

²¹ Ndä kənatäng bene Zakariya tunyu mänedäning ka oxadi siye Zakariya kalaygädä taxä tämeki tedelang mänang.

²² Na kala mawetä tunyu ndä ikäma kaxsäwa mäyex legey täsa säxong, na todi sabäle ka mägox nimic tä cukuma taxä tedeläccä Kaläg, malewa na läläbey yä mäyex legey säxong. ²³ Kala wex-ekäma käpeläning na mägämele tä pa.

²⁴ Na kala todi uxuma Alizapad koxsonga kəcätäng asämeny mädäg 'da'danyewa. ²⁵ Cängade ka, “Kaläggkang kawex ngakong tagä, tä sänggong nyaläpäng paygänya ndä nyägäcay zänggä motakang tä warä kən.”

Duwalegä Iyänakä Yasuwa Almasi

²⁶ Tä asämexsi aran layis näkä ox-songdugku Alizapatang, Kaläg kayaxsä malayika Jiprayil tä cabärä Calil tä kaxsä pana säbangäs Nasra, ²⁷ ta kedenwec-candäng säbangäs Mariyom sader ta apangandäng säbangäs Yusif tä caxsä Dawud. ²⁸ Na malayika kawung täce, kämodey ce ngade täce ka, “Gingang nuxundugkägi kabaxändey tä kənanng, Kaläggkang nagi!”

²⁹ Na Mariyom käbabangwa tä ngaki malayika kangatang, ndä cägäre bangä modeygi mänangang. ³⁰ Na kala malayika ngade täce ka, “Wanga nyigatäg Mariyom, xa Kaläg kadong baxändäg tägi! ³¹ Dänge! Gining no noxsongada ndä niyedäng päxä apang ndä dogada age ka Yasuwa. ³² Ma mälayis käxa ngake tädäxiny ndä säbangäs ma päxä pe Kalägi tiyating, ndä Bazuwec Kaläg togada butugku wawanäma Dawud

täma. ³³ Ma mämene butug tä känggä Yaxup ndä sanydenendäng säxong, ndä butugkuma 'desetäsäno säxong.”

³⁴ Mariyom ngade ta malayika ka, “Ngakong layeccä key, yä taxä nuxu kasäng na apang songang?”

³⁵ Na malayika kämeley ngade ka, “Ligidä Kaläg coccolacca tägi na panggugu Kalägi tiyating wunodung wayedäng tä bälekkägi na asämexsägi lada, nenyang päxä pipini niyedängang näka tedelang, ndä säbangäs ma päxä Kaläg. ³⁶ Ndä za, wayigo Alizapad na boxuske mändey oxsong tä päxä apang yä kən bangäs ce pixi, gang satäng täce asämeny aran! ³⁷ Ndä 'doga bedē tä Kaläggkandäng song.”

³⁸ Na Mariyom kagixi ngade ka, “E, bi, anäs me wexiccä Kaläg. Wanga ngaki sogoduning tagäng layis wega tä bangä ngakigigong.” Na malayika kä'doc kawangasa ce.

Mariyom na Alizapad

³⁹ Na tä sänggi Mariyom kangäsa tetex kä'doc tä kaxsä pa tä cabärä Yaxudiya, ⁴⁰ na caläs pang Zakariya na cägämōdey Alizapad. ⁴¹ Na Alizapad kädäng mod-eygä Mariyom, na pipini tä bälekkäce Alizapatang käpärawa, na Ligidä Kaläg käligä Alizapad. ⁴² Na Alizapad kasan kädawa ka, “Kaläg kadä wanägi tä warä uxu kä'day na päxäginini tä bälekkäging! ⁴³ Agänang anäs xäng kädäppa ka bo Bazuweccang wung copu agäng? ⁴⁴ Ani kädängäs modeygägi na wun-dangang, päxä pipinong tä bälekkangang käpärawa na wadäkä tididäg. ⁴⁵ Gi kabaxändey xa gi kämen ngaki Kaläg kalegey tägi ka 'desetäsänangang.”

Mildä Mariyom tä Logakä Kaläg

⁴⁶ Na Mariyom ngade ka, “Mägaxsang dädäxti Kaläg, ⁴⁷ na ligidang kadeb led tä Kaläg me nayiccang, ⁴⁸ xa nyägox cuku molgang, agä me wex-iccänya. Ndä ganang menggä zädong, kä'day bangäs agä käxa kabaxändey.

⁴⁹ Xa nyang nyäs Bazuwecca pädägang kawex wexeka ngoniny tagäng ndä agänya tedeliny.

⁵⁰ Tä menggä zong na banga, agänya watasa tä känggi nyaye nyang.

⁵¹ Nya nyawex wexeki tädäxinyang na andänya.

Ndä nyawasa känggi logoduning na wexe degejey tä mäganyganang.

⁵² Nyägäcoccoley menggä butug yä nyägäpoka känggi butug wundung tängang tiyati,

⁵³ ndä nyägämas menggä xas na weka apoccu,

yä nyamatä känggi näs tanganuwang na asängga pälocu.

⁵⁴ Nyaxony menggä wexekänya Israyil xa nyanimäng agäwaydakänya,

⁵⁵ kala täseki nyadästäs wawanakogki mägaccängang, na ta Apraxim na atuge näs ur'dug."

⁵⁶ Kala Mariyom kuccu na Alizapad ta asämenyga kodos na cägämel tä panäce.

Iyänakä Yoxana

⁵⁷ Xongondi Alizapad kiye tängang, cägiyäng päxä apang. ⁵⁸ Na menggä sogalinygäce na wayakäsa kädäng ka Kaläg kädädäxti agäwaydad täce na sägäledäno nace.

⁵⁹ Tä sänggi tespedespeng sawuno tä luwuku päxä pipi, ndä sägäpay ka sädogas agäma ka Zakariya täbangä mesa. ⁶⁰ Neng bosa kämele täsa ka, "A'a! Basa sädogas agäma ka Yoxana."

⁶¹ Na sängadeccä täce ka, "Nuxu kigkandäng tä caxsägo age mänang song." ⁶² Na sägertäcce ta mesa Zakariya ndey ka sä'dox aga mäpaye mädogas ta penäma.

⁶³ Na mamän owdu badaxiccä garekärejey na mägärekärejeysa ka, "Age ka Yoxana." Na sägädongasa kä'daygäsa. ⁶⁴ Na kaccogos ikä Zakariya kalengesäwa na nyipäräma kä'dakasäwa na malegeyze, malog Kaläg.

⁶⁵ Na menggä sogalinygäsa kä'day nyigatäg kamen, na ngaki kasogänong kalaye legeydäno tä kaxsä cabärä Yaxudiya kä'day. ⁶⁶ Na känggi kä'day kädäng ngakiyang kameskädä

tä mäganyga ndä ngadeccä ka, "Päxä pipinong wunodung layis wi?" Xa andä Kalägkang nang seley.

Logeygä Zakariya

⁶⁷ Na Ligidä Kaläg kälīgä Zakariya me Yoxananag na malogeza ka,

⁶⁸ "Andädäxti Bazuwec Kalägä Israyil, xa nyawung tä posakä kän na 'dakakä kän.

⁶⁹ Ndä nyägängusey yaxticcä xonyad tä kog tä känggä me wexiccänya Dawud,

⁷⁰ ka'das ani nyalegeyzenäs na ikänggä menggä logeygänyagi mägaccäng tedelinyang,

⁷¹ ndey ka nyäxony kog tä menggä kurog, na mändey ta asänggä känggi kä'day saxe kogkang.

⁷² Nyasog ngakong ndey nyälapa agäwaydad ta wawanagkog, na ndey nyäniming axäskänyagi tedelinyang,

⁷³ na täsedicci nyägäloguwa nang ta wawanog Apraximang.

Täsedicci lapedäng ka

⁷⁴ kogki nyaxony kog ta asänggä menggä kurogkang

ndakä wexedig nya na nyigatäg song,

⁷⁵ tä tedeldäg na lelextäg tagänya tä loydugkä aygog.

⁷⁶ Ndä gi päxä penangong säbandäs gi me logeygä Kalägi tiyating,

xa gi piccadas tagä Bazuwec ndey bolasa sota tänya,

⁷⁷ ndey doga ligiccä xonyad tä känggä Kaläg na wangakä ngaka tasiny tä känggänya.

⁷⁸ Xa agäwaydakä Kaläggog wunodung xonyo kog paratasawa ka'das keyzic

⁷⁹ ndey bowdic wung tä känggi kăcasäng tä lätäng na tä ligidä xäsang, ndey meskede exenggog ta akäsogä modey."

⁸⁰ Ndä päxä pipi wedede na kiniy tä wane na yexkä nga. Ndä mäguccu tä pumpung basa xongondi mawesawa na wexed tä Israyil tängang.

2

Iyinakä Yasuwa Almasi

¹ Tä enggä sänggi Axustus Kaysar kabokung asiriye tunyu ka kân kä'day 'docco garekärejeysa aga tä cabär kä'day tä wexekä tuluba. ² Ndä garekärejeyga täzäläggang, tä cuku Kuruniyos tä butug tä Suriya. ³ Kân kä'day kä'docco tä cabärtaga ndey garekärejey aga täng.

⁴ Na kala Yusif kawetä mändey tä cabärä Nasra tä Calil kä'doc tiyati tä Petlaxam cabärä Dawud, tä Yaxudiya, xa ma mäs me cabäri ndä mäs wayäwan tä caxsä Dawudag. ⁵ Mägä'doc ndey sägärekarjeysa agäsa na Mariyomzi sader tämang ndä cägä'dosuwa.

⁶ Na tä cuku sa todi, pipi kagasäng ce. ⁷ Na cägiyäng päxäcenä zäläg näs päxä apang na camulungi na tandä ndä cäzänggasa tä kuburicci säziye male tängang, xa axa säzänggasa täng undung.

Copkä Menggä Megäs

⁸ Ndä tänya owdi menggä megäsätäng cuccu käsac tä korongo meske sagunuga ongud. ⁹ Na malayikanä Kaläg kaweyesawa täsa na tädäxticcä Kaläg kábanyeza tä waräsa na nyigatäg kadele sa nano.

¹⁰ Na malayika kangada täsa ka, “Wanga nyigatäg! Ndänge ngakong, agä anduwale yaxsäwecca apo tanggo aki kodung wadäkä tididäg tä kân kä'dayang. ¹¹ Xongondong sägiyäng me nayic tanggo tä cabärä Dawud. Mang mäs Almasiyang ani näs Bazuweccang. ¹² Ndä boliccongang lapedäng tanggo ka, anggo 'doxadang päxä pipi kamulungiwa na tandä ndä sängo tä kuburicci säziye male tängang.”

¹³ Na kälilic malayikadagi tiyating kaweyesäno mange na malayikani dädäxti Kaläg ngadeccä ka,

¹⁴ “Dädäxtic tä Kaläg tiyati, na modey täzäg tä känggi nyäpayeng!”

¹⁵ Na kala malayikada kawangasa sa kä'docco tiyati, na menggä megäs ngadeccä tä ngastängga ka, “Nycugo

tä Petlaxam ndey laleyig ngaki kasogäno todiyang, aki Kaläg kaläpäng taköggang.”

¹⁶ Na sägä'docco tetex sa'doxa Mariyom na Yusif na pipi sägäsänggasa tä kuburicci säziye male tängang. ¹⁷ Kala sägox pipi, na saser ngaki saläpa täsa tä ngakä piping, ¹⁸ na känggi kä'day kädängang käsaydä aga tä ngaki menggä megäs kalegeyang. ¹⁹ Yä Mariyom kameskäde ngaki kä'day tä mägaxse ndä cägäre tä mägaxsäce ka ngakong key.

²⁰ Na kala menggä megäs kämele, dädäxti Kaläg tä ngaki kä'day sägädäng na sägoxang, xa nga kä'day ka'das ngaki saläpe täsang.

²¹ Tä sänggi tespedespeng, salu ma na sadogas agäma ka Yasuwa, agi malayika kadogas musku cägoxsonga täma songang.

Koyakä Yasuwa Taxä Tämed tä Kaläg

²² Ani Mariyom kä'desenäs sänggä iyeckeneng, tä bangä asiriyenä Musa, Yusif na Mariyom kagoying Yasuwa tä Ursalim ndey sädogas ma tä Kaläg ²³ ka'das ngaki garekärejeyno ta asiriyenä Kaläggang, ka “Pipugi siyedäng tä zäläggang näs enggä apangasang sädoga kä'day tagä Kaläg”, ²⁴ ndey sädämze ka'das legeygi asiriyenä Kaläg kangatang, ka sädoga enggä kurugä pa pädax na cong näs kurugä kaxsetang sädoga pädax.

Logeygä Simiyan

²⁵ Ndä gang 'doxtiyandäng tä Ursalim säbangäs Simiyan apangza lelexang ndä kamen ngakä Kaläg ndä bene käxa xonyo Israyil. Ligidä Kaläggandäng täma.

²⁶ Ligidä Kaläg kaläpe täma ka mässe song basa ka mox Almasini Bazuwec Kaläg kayaxsängang. ²⁷ Na Ligidä Kaläg koyo Simiyan na mawung taxä tämed tä Kaläg, mändey Yusif na Mariyom kagoying päxä pipi Yasuwa ndey ka sädog tanyara täng tä bangä asiriye, ²⁸ na Simiyan kápokä ma tä asängge ndä log Kaläg ngade ka,

²⁹ “Gang, tä bangä ngadagkägi gi Kalägi ngondeyang, mene andang 'daki me wexiccägi 'doc na modey.

³⁰ Xa agang kox me 'dagkicci
³¹ käbolasa tagä kän kä'dayang.
³² Mangang mäs banyicang,
 ndey gi Kaläg, lapasäwa tä känggi näs
 Yaxudiny songang,
 na dädäxtic tä känggägi menggä Israyil."

³³ Na todi Yusif na Mariyom käpegse tä
 ngaki kalegeyno ta päxäsang. ³⁴ Simiyan
 kapes sa. Na ngade ta bosa Mariyom
 ka, "Ndelde wunggugo appoyo! Kaläg
 kalebäng päxä pipinong ndä mang
 mäsogo telänad na ngäsakä kän mange
 tä Israyil na mälayis bolicci kän saxeng.
³⁵ Ndä nästire, mäganygä kän mange
 lapetäsäno tä bangä wexekäma ndä
 gining tä ngasägi, mägaxsägi 'dudowa!"

Ngakä Xana

³⁶ Mändey me logeyandäng näs ux
 säbangäs Xana päxä pe Fanawil tä
 caxsä wayakä Asir. Ce caboxsä na'do,
 sabagäning na yoxuce sägäcuccu tä
 jendäg paxtändig basa xäskäma. ³⁷ Na
 cäguccu tä mandurtug tä jendäg udiny
 tesped wang tesped (84). Ndä casäja axä
 tämed tä Kaläg song, cädukuru na uxkud
 tä ngasäce ndä cäpalacca ongud na säxe
 kä'day.

³⁸ Na tänya xonggondi, cawung täsa na
 cadeb logakä Kaläg ndä cälege ngakä pipi
 tä menggä Yaxudinygi kä'day bene tegic
 tä Ursalimang.

³⁹ Na kala Yusif na Mariyom kä'dese
 nga kä'day tä bangä asiriyenä Kaläg,
 na sägämele tä Nasra tä cabärä Calil.
⁴⁰ Na päxä pipi ka'donga ndä kalay
 pädag, kápäsäwa na lelertäg ndä payiccä
 Kaläggang na ma.

Yasuwandäng Taxä Tämed tä Kaläg

⁴¹ Me Yasuwanag na bosa 'docco tä
 Ursalim jenijeni tä Pärkid*. ⁴² Ani
 jendäggä Yasuwa kəcogäs asiny wang
 pädaxang, sägä'docco tiyati tä Ursalim
 na bangä adi. ⁴³ Säggä'docco säggä'dese
 Pärkid na tä melgäsa tä pa, päxä celic
 Yasuwa kalay tong tä Ursalim. Ndä
 mesa na bosa yex song. ⁴⁴ Sa säcuccu

ka mandäng na känggi säwedeccä nan-
 gang, sägäcogu sängädi nuxungang, na
 sägä'docco sāmānecce sānyame ma tä
 warä wayakäsa na biskodagäsa. ⁴⁵ Ndä
 sa'doxas ma song na sägämele tä Ursalim
 tä nyam.

⁴⁶ Tä sänggi kodos tä bangeneng,
 sa'doxas ma taxä tämed tä Kaläg, tä
 kaxsä kal. Mägacca tä pidänä balduwiny,
 mädelde wunduma täsa ndä māmāne
 sa. ⁴⁷ Na känggi kä'day kädäng legeygä
 Yasuwang, kädongo tä yerändäggäma na
 bucuku nga ta menggä bäldey. ⁴⁸ Mesa
 na bosa kox ma na wadäka koyo na
 bosa ngade täma ka, "Päxang, wi siye
 gi käsogkuwa täwas mänang? Lala,
 menggo na agänang wanyamedig owdugi
 paccey."

⁴⁹ Na mägämele täsa ka, "Wi siye
 anggo nyamadang owdangang? Anggo
 'diyang ka pang Appanang nyaza anycu
 tängang?"

⁵⁰ Ndä musku kax menggäsa kabäle
 ngakäma täsa song. ⁵¹ Na sacoccoleza
 sägämelese tä Nasra ndä mädede nga
 täsa. Ndä bosa meskede ngaki kaso-
 guningang kä'day tä mägaxse.

⁵² Ndä Yasuwa 'dongada na lelertägke,
 ndä Kaläg na kän paye ma.

3

Weyekä Yoxana ta Akäsog

¹ Tä jendägki asiny wang mädäggang
 tä butugku Tapariyos Kaysar, ndä Pälatis
 Alpondi buguningzä Yaxudiya. Xirudus
 bazuweccang tä Calil, na päxä bosa Fil-
 ipus päxä bazuweccang tä cabärä Itoriya
 na Taruxontis. Yä Lisaniyus bazuweccang
 tä Apäliya.

² Legeygä Kaläg kawuno ta Yoxana
 päxä pe Zakariya tä pumpung ani Xanas
 na Kiyafa, seley layis ngotorpugu menggä
 tämed tä Kaläggang. ³ Na mägä'doc
 tä Colonggonä Urdun kä'day, mäduwale
 ngakä xajkä kän tä ngaka tasiny, na pac
 tä ma. Ndey Kaläg cay ngaka tasinygäsa
 xa sägäxaje.

* **2:41** Karamana Yaxudiny sogong ndey säniming 'dakicci Kaläg kä'dakasanäs tä cuku sa tä cäläxtäg tä Masarang. Yaxudiny bangäs sapärkidki "Lägey" ndey ka malayikanä xäs kawungang keley padäggäsa lägtä xa sägadas tamiccä päxä dopolog tä akäsogalinygäsa.

⁴ Ka'das ani gärekärejesawa tä sorunu legeygä me logey Isayang,
 "Ndänge ngasawan logacca tä pumpung ka,

'Weye akäsog tä Bazuweccog,
 ndokala akäsog täma.

⁵ Ko'dota kä'day 'docco päseccä, cabärta na enggä cobocoboriny mächotusuno,
 na akäsogi kagolopewang dokol,
 na sogi ngudungudulang zäräzirigiwa,

⁶ ndey kän kä'day laley xonyakä Kaläg.' "

⁷ Na Yoxana ngade tä xä'däni kawuno tä paccang ka, "Ama caxsä enggä tämong! Xänang kädaxä anggo ka mpexkeng zängaygä Kaläg tanggong?

⁸ Ndä gang läpäning 'dogi lapedäng ka anggo kälayisang kängga kämele tä Kaläggkang. Ndakä layisang kängga bangada Apraxim tä ngastängga ka menanang. Ndakä ngadang ka, 'Doga siyewa tä kogkandäng song.'

Agänang aläpedäng tanggo ka Kaläg nguso nganyugong teyis pipu ta Apraxim!

⁹ Seley ganang kompa kəcicilisuiwa tä mächkä ewe ndä eti iyedäng engge apoccu songang säluwutäsa täzäg ndä sägawa tä mas."

¹⁰ Na xä'dä kamän ma ka, "Neng gang wasogig wi?" ¹¹ Yoxana kabuc täsa ka, "Käxa tandu täng pädaxang larä na käxi ne wundungang ndä käxa siyake tängang sog mänang."

¹² Menggä yawgä tuluba mändey kawuno tä pac tä ma na mäne ma ka, "Me bälidic, yä wasogig wi?" ¹³ Na maläpe täsa ka, "Ndakä yawadang weg mangeccä tä wegki saläpäng tanggong."

¹⁴ Ndä kulung asägaru mändey kamän ma ka, "Yä was, wasogig wi?" Na maläpe ka, "Ndakä bagkadang weg tä kän na rejic mändey na celdug, gixi maxiye na 'dogi sädogodäng tanggong."

¹⁵ Na todi kän wadäka kalaye tidiny xa satäng bene Almasi, na soxo ka Yoxanang näs Almasi. ¹⁶ Yoxana kabuc täsa kä'daygäsa ka, "Agä anäs käxa pacce anggo tä ma winy, yä kigkandäng wundung ndä panggudugke mo'do kanggä. Agänang anäs käxa ulidi käbadage song. Ndä ma mäwunodung mägodung Ligidä

Kaläg tanggo na mas. ¹⁷ Ndä adalandäng ta andäma ndey mexenäs nyada täpox yä mädogä kuny tä curunuma, yä nyada mäduyü na masa paxewa song."

¹⁸ Ndä ta akäsogong na pagad mange, Yoxana kalogey yaxsäwecci apo lege ngakä Kaläggkang. ¹⁹ Ndä ani Yoxana kä'dedeyis Xirudus tä ngakä batakä uxä päxä bosani säbangäs Xirudiya na wexeki mändey mawex tasiny kä'day, ²⁰ Xirudus kasog 'doga tas mändey. Madene Yoxana tä ax.

Packä Yasuwa

²¹ Kän kä'day käpacäning tä ma, na Yasuwa mändey kawung sägäpaccä. Ani mäpalaccanäsäng tiyati kalengesäwa, ²² na Ligidä Kaläg kacoccoleza täma oxowa ka'das kuruwic na legegä käpätäsäng tiyati ngadeccä ka, "Giningang nuxundugkägi näs penanggi ampaye ngakeneng. Xa ngakägi kasog wanang tiding."

Caxsä Wawanagä Yasuwa

²³ Ani Yasuwa kadebäs wexekeneng, satäma jendäg ud wang asiny. Ndä kän oxo ka mäsa päxä pe Yusif, päxä pe Xali, ²⁴ päxä pe Matad, päxä pe Lawi, päxä pe Malki, päxä pe Yuna, päxä pe Yusif, ²⁵ päxä pe Matäsaya, päxä pe Amus, päxä pe Naxum, päxä pe Xasäli, päxä pe Nacayi, ²⁶ päxä pe Mas, päxä pe Matäsaya, päxä pe Samayin, päxä pe Yusic, päxä pe Goda, ²⁷ päxä pe Yoxanan, päxä pe Resa, päxä pe Zaräpabil, päxä pe Saltil, päxä pe Niri, ²⁸ päxä pe Malki, päxä pe Adi, päxä pe Gäsım, päxä pe Almadam, päxä pe Ir, ²⁹ päxä pe Gesuwa, päxä pe Aläyasär, päxä pe Yoram, päxä pe Matad, päxä pe Lawi, ³⁰ päxä pe Simiyan, päxä pe Yaxuza, päxä pe Yusif, päxä pe Gonam, päxä pe Aliyakim, ³¹ päxä pe Maliya, päxä pe Minan, päxä pe Matada, päxä pe Nasan, päxä pe Dawud, ³² päxä pe Yasa, päxä pe Oped, päxä pe Pos, päxä pe Sala, päxä pe Naxsun, ³³ päxä pe Aminadip, päxä pe Adämin,

päxä pe Arni, päxä pe Xasrun,
 päxä pe Faris, päxä pe Yaxuza,
³⁴ päxä pe Yaxup, päxä pe Isxag,
 päxä pe Apraxim, päxä pe Tarex,
 päxä pe Naxur, ³⁵ päxä pe Suruc,
 päxä pe Raw, päxä pe Falic,
 päxä pe Apir, päxä pe Sela,
³⁶ päxä pe Kayinan, päxä pe Arfagäsad,
 päxä pe Sam, päxä pe Nox,
 päxä pe Lamag, ³⁷ päxä pe Mätäsalex,
 päxä pe Anax, päxä pe Yarad,
 päxä pe Maxalil, päxä pe Kinan,
³⁸ päxä pe Anos, päxä pe Sed,
 päxä pe Adam, päxä pe Kaläg.

4

Däniye Käläbä Yasuwa

¹ Ndä nyägäligä Yasuwa na Ligidä Kaläg, mägämel na Colonggonä Urdun, Ligidä Kaläg kagoying ma tä pumpung.

² Däniye käläbä ma tä sängga udiny pädax. 'Doga masi wundung tä sänggi, ani sänggi kä'desesänonusang ma magä'di na'do. ³ Na Däniye ngade täma ka, "Näs Päxä Kaläg seleyang, lapi tä ngayiccong layis zäx." ⁴ Yasuwa kabuc ka, "Gärekäreesawa tä Sorunu Kaläg ka, 'Siyatag tol naye käxa julang song.' "

⁵ Na Däniye kabag ma tä ke'dengge'demes ndä banye ow na gertä bugundugku walangiccä täzäg kä'day täma. ⁶ Na Däniye läpadas ta Yasuwa ka, "Adogodung bugundugkong kä'day tä andägi na tädäxtägi wedetese nangang, xa sadogung panggudug tä andang ndä adogada tä käxi ampayeng. ⁷ Ndä kănox kundukurusa kăpaley agăngang, wekong kä'day kănggig." ⁸ Yasuwa kabuc ka, "Gärekäreesawa ka, 'Dukurusa pala Kalägägi na wexe ngake tol.' "

⁹ Däniye kabag Yasuwa tä Ursalim, na kădokalasa ma tiyati täzä ndandangzä axä tämed tä Kaläg, na ngade täma ka, "Kănox năs Päxä Kaläg seleyang, xudiwa täzäg todong. ¹⁰ Xa gărekăreesawa ka, " 'Kaläg yaxsedăng malayikadage tăgi ndey meskădă gi,' "

¹¹ 'muso gi ta asăngga wange gi ndey ka 'dingăsa exenăgi tă ngayic song.' "

¹² Na Yasuwa kabuc ka, "Sorunu Kaläg ngade ka, 'Ndakă lâbă Bazuwec Kalăgăgi song.' " ¹³ Na todi Dăniye kă'dese lâbke băgălic, na kala kawangasa ma basa xongoda.

Tebekă Wexekă Yasuwa tă Calil

¹⁴ Yasuwa kăligăwa na panggudugku Ligidä Kaläg, na kămel tă Calil, na todi lulungudăma kuduwarewa kă'day tă kaxsă cabăr. ¹⁵ Na madeb băldey tă axinygă palicinygă Yaxudiny na kăn kă'day kădădăxti ma.

Pexkekă Yasuwa tă Nasra

¹⁶ Ndă kala gang Yasuwa kawung tă Nasra, tă owdi ma'donga tăngang, na măgă'doc malăs axă paliccă Yaxudiny tă xongondu Sapid, xa nyang năs tan-yara tămang. Mangăsa tiyati tă geney, ¹⁷ na sadogas sorunu me logey Isaya tăma. Na malenge soru ma'doxa owdi gărekăreesawa ka,

¹⁸ "Ligidä Bazuwec Kalăgkandăng na agă, xa nya nyaseny agă ka agă anduwale yaxsăweccă nyani apong tă menggă wi.

Ndă nya nyayaxsă agă ka agă anduwale 'dagkic tă kănggi kacikiliningang

na ndey ngojony zayza, na kănggi săgăcălăxtiyang să'daka,

¹⁹ ka agă anduwale jendă agă waydagă Bazuwec tă kăn."

²⁰ Na kala măgărăkă Sorunu Kaläg na madoga tă kăxi kamen wexetang na măgăcca. Na Kănggi kă'day tă axă paliccă Yaxudinyang kamende aga tăma.

²¹ Na Yasuwa kăbăldeyza lăpede tăsa ka, "Ngakă Kalăgong kăndăngeng genewang, xongondong kalayenăs wega."

²² Na kala kă'daykăsa salegeyze ap-poyo tă ngakă Yasuwa, na sa'dămdes legeygi tidiny kăptăzăng ikămang. Na săngadeccă ka, "Yă 'doxtong de päxă pe Yusifang?"

²³ Yasuwa ngade tăsa ka, "Năstire anggo zeredeng ngakong tagă ka, 'Wanga tumarajuwic, dăxă ngasel' na kămpayang tagă ka, ' 'Dogi kăndăngig ka gi kăsog tă cabără Kafărnaxumang, sogă todong tă cabărăgi măndey.' "

²⁴ Na mapos legey ka, “Aläpedäng zänggä nga tanggo ka, me logeyandäng sägixidi tä cabäre song. ²⁵ Ndä näs tire aläpedäng ngakong tanggo ka madurinyatäng mange tä cabärä Israyil tä cuku me logey Iliya ani zäkoxa kärigkäwa tä jendäg kodos na asämeny aranang, xas kawung tä walangic kä'day. ²⁶ Yä Kaläg kayaxsä me logey Iliya ta nuxu accäsa song, basa ta uxi näs mandur näs me pungud tä kaxsä pang Sarfa tä cabärä Sayidunang. ²⁷ Ndä menggä omodatäng mange tä Israyil tä cuku me logey Ilisa, yä nuxu accäsandäng kädaxäwa song, basa Naman me pungudi käpätäng Suriya.”

²⁸ Ani sägädängäs ngakongang, känggi kä'day tä axä paliccä Yaxudinyang käsängasa paccey. ²⁹ Na sangusosuno tiyati, samagäng ma tunyu tä kaxsä pa. Na sagoyas ma tä nyixtä päxä cobocoboric, säpaye säzajas ma täzäg tä zä cabäri käke'decekang. ³⁰ Neng mawetä tä warä xä'dä na mägä'doc tä akäsogäma watäkäma.

Wexekä Yasuwa tä Kafärnaxum

³¹ Yasuwa kä'doc tägaxsä Kafärnaxum tä Calil, tä xongondu Sapid, na madeb bäldeygä kän. ³² Na sa'dämdes bäldeccäma xa soxo bugundug täng.

³³ Ndä tänya axä paliccä Yaxudinygi apangandäng käxa tasandäng tä wane, ndä kapere ka, ³⁴ “Wayi! Wanga was watäkäsko, Yasuwa me Nasra! Gining kuwung tä paxagäsko? Ayex gi ka giningang Ndedelang na näs näkä Kaläg.”

³⁵ Na Yasuwa kadux käxa tasti tä wanämang ka, “Päli! Wete tä wanäma!” Na kala käxa tas kacodasa ma täzäg tä pidänäsa na kawetä napäl kawung ma käppärjig.

³⁶ Känggi taxä paliccang, kädongasa ndä mänedänäng ka, “Oxadi sogowa todong manang? Na butug na panggudug mädaxedäng ligitiga tasiny tunyu na wedeccä!” ³⁷ Na kala lulungudä Yasuwa kawasasäwa tä cabär bägälic.

Yasuwa Däxä Kän

³⁸ Ani Yasuwa kawangasanäs axä paliccä Yaxudinyang, maläs pang Saman. Na ma'doxa wawana uxu baxadiccandäng

paccey, na sägäpay Yasuwa ka däxä ce. ³⁹ Na mägädokol todü zäce na maduxsi ka baxadic lay wundung täce. Na käccogös cängäsa tiyati cawexse täsa.

⁴⁰ Tä 'dängakä xong, känggi wayaka täxäccä na täxäka cagäcaguwinyang, sagoying täma. Na mägäläbtä sa kä'day na wadäkäsa kädaxänäng. ⁴¹ Kängga tasiny kawetäcco tunyu mangeccä, na pered ndä ngadeccä ka, “Giningang näs päxä Kaläggang!” Na madux sa mäleyis sa legey xa sa säyex ma ka mäsa Almasi.

⁴² Na megetuduyzi täbängeneng, Yasuwa kawangasa sa ka'doc tä owda kaculdoy, yä musku xä'dä nyame bangäma. Ani sa'doxus mang, säleyis ma 'doc wangesänakä sa. ⁴³ Ndä Yasuwa ngade täsa ka, “Basa anduwaley yaxsäwecci apo lege ngakä bugundugku Kaläggang tä kulung cabärtagi tängang mändey, xa ngakongag Kaläg kayaxsä agä ka awung awexang.” ⁴⁴ Na todi mäwedede mabäldecce tä axinygä paläccinygä Yaxudiny tä Yaxudiya.

5

Bangänakä Menggä Rüb

¹ Xongenendäng, Yasuwandäng dokolo tä nyixtä Colonggonä Calil, ndä xä'dä kagurma paye däng ngakä Kaläg. ² Na mägox dämpejiginy pädax tä nyixtä colonggo yä letuganagi näs menggä menekä asang, kawetäcco tunyu 'daye ka'dadaga. ³ Na Yasuwa kä'doc tä kaxsä nuxu dämpejigsi näs näkä Samanang, na mäläpede ta Saman ka, “Zexteyi dämpejigsiginong na pidänä ma.” Yasuwa kacca tä nya kaxsä dämpejigsi ndä bälde xä'dä.

⁴ Yasuwa kä'dese legeyge, na ngade ta Saman ka, “Nyasi dämpejig tä maga tä'duginy na nggawi ka'dadagägo täng ndey meneng as.” ⁵ Saman kabuc ka, “Ngotorpo, wakasängig kädäyi tä wexed ndä kamenig nuxu 'dog song! Neng tä legeygägigong anggawada ka'dada tä ma.”

⁶ Na sägädäng ngakäma sägawa ka'dadakäsa tä ma na samen as mange de ka'dadagäsa kacertäno. ⁷ Na sägädawasa

ta biskodagäsagi tä dämpejigsi nux-
ungang ka wuno posa. Na sawuno
sägäpäsä dämpejiginy pädax na as de
paye muxosuno tä ma.

⁸ Saman Putros kox mänang, na
kudukurusa tagä Yasuwa ngade ka,
“Bazuwec, wede wangasa agä, xa anäs
käxa sogo ngaka tasiny!” ⁹ Na todi
Putros na känggi namang, kädongo
tä menekä aski samendä mangeng.
¹⁰ Yaxup na Yoxana enggä penggä Zapadi
menggä wexed na Saman kädongo
mändey. Na Yasuwa ngade ta Saman
ka, “Wanga nyigatäg, xa gang na ur’dug
gi layis me menekä kän.” ¹¹ Na kala
sagoyas dämpejiginygäsa tä tungurtic, na
sawangasa weg bägälic na sägaräbkädä
Yasuwa.

Däxkä Me Omo

¹² Tä cuku Yasuwa tä nuxu kaxsä
pandäng, apangandäng kawung täma
wane kä'dod na omo. Mägox Ya-
suwa na mägunusawa täzäg mäsäy
zäg na manyäxay Yasuwa ka, “Bazuwec,
kä'dang mpayeng kax kusog wanag kalay
apo.” ¹³ Na Yasuwa kälanga ande kápärä
ma na ngade ka, “Agä ampaye asog gi
lay mpo. Omo caya!” Na kaccogos omo
kaway tä wanäma.

¹⁴ Na Yasuwa kä'dedey ma ka andakä
mäläpe tä nuxu kig song. Na madästä
me omo ka, “Wede koyi ngasägi ta me
tämed tä Kaläg na koyi 'dogu tämekägi
ndey mäduwalasa ka wanägi käläy apo,
tä bangä asiriyenä Musa kadästäse nan-
gang, ndey säbäle ka wanägi käläy
apo.” ¹⁵ Yä wadi lulungudu wexekä
Yasuwa kawasasäwa kaked na xä'däni
kädängang kawuno tä dänggä ngakäma
ndey Yasuwa däxä sa tä täxäkäsa.

¹⁶ Ndä Yasuwa päledeswa tä owda kac-
uldoy xondaxonda watäke tä paley.

Yasuwa Kadäxä Pudude

¹⁷ Na xongenendäng Yasuwa bäldecce
na Farisiny na menggä lelericcä asiriyenä
Musa aki kápädäsäno tä Calil na tä Yax-
udiya na tä Ursalimang kacasäng kāsac,
ndä panggudugku Kaläggkang kasog Ya-
suwa däxä känang.

¹⁸ Kulung apangas kawuno poko
pudude tä salany. Säpaye ka sägoyas
ma tax tagä Yasuwa. ¹⁹ Neng sa'doxa ow
kapäs, ndä owda sälangeyis ma undung
na sa'dese tazä ax sawe ax ndä sälolas
ma nang tax na salany tagä Yasuwa.
²⁰ Yasuwa kox menekä ngakäsa täma,
na ngade ta pudude ka, “Bisko, ngaka
tasinygägi kácayino.”

²¹ Na menggä lelericcä asiriyenä Musa
na Farisiny käre tä ngastängga ka,
“Apangza tiyanang degeje Kaläggkang?
Xänang caye ngaka tasiny tä kän basa
Kaläggkang?”

²² Ani Yasuwa kabälenäs ngakäsagiyang,
mäne sa ka, “Wi siye anggo
makadang ngakong tä mäganygäggong?
²³ Ngakatiyag kädäppa ka xäxäminy
ngadäningang, ‘Ani ka ngaka tasinygägi
kácayining,’ wala ka, ‘Ngäsa tiyati
wetäde’?” ²⁴ Asogo ngakong ndey bäleng
ka agä, Pächä Käxa Jul panggudugkatäng
tä andang täzäg layis näka anycayis
ngaka tasiny.” Na Yasuwa ngade ta
pudude ka, “Ngäsa tiyati poka salanygägi
wede tä pa.”

²⁵ Na tetex mangäsa tagäsa tiyati na
madeccäng salanygäma mägä'doc tä pa,
mädädäxti Kaläg. ²⁶ Na mäganygäsa
kabalza na sägädongo, na sägädädäxti
Kaläg tä ngaki kasogunong. Na kala
sanyigata Kaläg, sängadeccä ka, “Was
kanoxig ngaka tädäxiny xongondong.”

Yasuwa Kabandä Lawi

²⁷ Tä bangä ngakong Yasuwa kawetä
tunyu na kox käxa age ka Lawi, säbängäs
ma mändeng Mata, näs me yawgä tuluba
kacca gixinicci taxä burkune. Na Yasuwa
ngade täma ka, “Räbta agä.” ²⁸ Na
mangäsa tiyati mawangasa weg kä'day
mägä'doc tä bangä Yasuwa.

²⁹ Na Lawi kasog led tä pane ta Yasuwa,
na kala xä'dä na menggä yawgä tulubada
na kulung palangaski tängang, kacasäng
sagur siyad nasa. ³⁰ Na Farisiny na
menggä lelericcä asiriyenä Musa daweccä
ta menggä räbkä Yasuwa ka, “Wi siye
anggo darjangedänang na ziyaccang na
wuxiccing na menggä yawgä tuluba na
kängga sogo ngaka tasinyang?”

³¹ Na Yasuwa kabuc ta Farisiny ka, “Känggi täxäccä songang paye me nayic song, basa känggi täxäccäng kácag paye me nayiccang. ³² Agä kawung tä bangakä känggi apoccong song, wadi kawung tä känggi sogo ngaka tasinyang ndey meley mäganyga.”

Yasuwa Legey Ngagä Akäsoga Warändi

³³ Sängadeccä ta Yasuwa ka, “Menggä räbkä Yoxana mene uxxud todotol na palacca tä Kaläg, na mändey menggä räbkä Farisiny sogo mänang, yä menggä räbkägi kädil siyad na wuxid tol.”

³⁴ Na kala Yasuwa ngade täsa ka, “Kädäppa ka dogang palangaska kawuno tä batad ka men uxxud yä me batatandäng nang? ³⁵ Musku xa ow wunodung säbate me batad täsa, ndä kala sälayenäs kängga mene uxxud.”

³⁶ Na sax mändey maser nga täsa ka, “Kigkandäng cerede nyonggo tä tandäna warändi ndä debede tä näka kaboxsu song. Käxa kasog mänangang kacere tandäni waränding, ndä nyonggoni waränding 'dasedäning na boxe song. ³⁷ Kigkandäng colada bux tä meldäna näs boxenendäng song. Käxa kacolas buxka warändi tä meldäna näs boxeneng, zage meldä na wanyisäwa. ³⁸ Wadi kädäppa ka buxka warändi säcolas tä kaxsä meldäna warändi. ³⁹ Ndä käxa kawux buxku boxinyangang paye buxka warändi song. 'Do ngade ka, 'Buxku boxinyga apoccu na wizicci.' ”

6

Bazuweccä Xongondu Sapid

¹ Xongenendäng Yasuwa kadus kaxsänggä pelow tä xongondu Sapid. Na menggä räbkä ma kabag zänggä kuny kapujukuy kasi. ² Na kulung Farisiny ngadeccä ka, “Wi siye anggo nyca'dadang asiriyenä Musa tä xongondu Sapidang?” *

³ Yasuwa kabuc täsa ka, “Anggo känggeneng ngaki Sorunu Kaläg lege tä ngakä Dawud na biskodage kasog tä xondi xas kapaxäsang song?

* **6:2** Farisiny bangäs pujukuygä zänggä kunygi menggä räbkä Yasuwa kapujukuyang, wexed xa asiriye ngade ka kän wang wexed tä xongondu Sapid xa xongondu nunguccä Yaxudinyang.

⁴ Masogkuwa key maläs axä burkunu tämed tä Kaläg de mägä'doc masi siyaki tedelinyang, yä asiriye ngade ka säsi säxong bal me tämed tä Kaläg watäkeneng, ndä madoga kulung tä enggä biskodagämang?” ⁵ Na mängade täsa ka, “Agä Pächä Käxa Jul anäs bazuwec tä xongondu Sapid.”

Däx tä Xongondu Sapid

⁶ Yasuwa käläs axä paliccä Yaxudiny bäldecce tä nuxu xongondu Sapidandäng. Ndä apangandäng tänya axä owdi andä abanicce käxsä. ⁷ Menggä lelericcä asiriyenä Musa, na Farisiny jenggere Yasuwa käsac. Paye bäle ka cong Yasuwa däxäccä tä xongondu Sapidang, ndey ka sä'dox rakawza säglinäs nga täma. ⁸ Ndä Yasuwa yex ngakäsagi sabokasa tä zänggäsang, na mängade tä 'doxti ande käxsängang ka, “Ngäsa tiyati dokala tä pidi todong.” Na todi mangäsa magädokol tänya owdi.

⁹ Na Yasuwa ngade täsa ka, “Ampaye amän anggo ka, apo ta asiriye ka wex ngaka apoccu wala ka wex ngaka tasiny tä xongondu Sapid, ka xony rongic wala ka wanydäs?”

¹⁰ Na Yasuwa gaw ze käsaya sa na'anggäsa na ngade ta apangzi ande käxsäng ka, “Langi andägi.” Na apang kälanga ande na ande kaliy apo. ¹¹ Na ngaki mänangang kawaley mäganygäsa na sälegecce säbodo 'doga säsong ta Yasuwa.

Tecekä Yasuwa tä Känggi Sägalägä Asiny wang Pädaxang

¹² Xongondi Yasuwa ka'deg cabär tä paley tängang, masäng kädäyi tä paley tä Kaläg. ¹³ Ow kagezä na mabandä menggä räbkäma madec kulung tä wara asiny wang pädax ndey mäligä. ¹⁴ Madeccäng känggong, Saman, ani sabangäs Putrosang, na päxä bona Andrawus, Yaxup, Yoxana, Filipus, na Partalmawus, ¹⁵ Mata, Toma, Yaxup päxä pe Xalafi, Saman ani sabangäs me mäganygä pädatägkang,

16 Yaxuza pāxā pe Yaxup, na Yaxuza Askariyuti ani kamenes Yasuwang.

Yasuwa Bāldacce na Naye Kān

17 Yasuwa kawung tāzāg na känggenegi kälāgāng na mägādokol tā owda kādāpā. Na mēggā rābkāma kāyawesāno mänge na kān bāgālic kādurisāno kápātāsāno tā cabārā Yaxudiya na Ursalim na tā nyāxtā ndandangzā colonggonu Taya na Sayidun. Sawuno tā dānggā bāldiccāma Yasuwa na ndey ka mādāxāsa tā tāxākāsa. 18 Na känggi ligitiga tasiny kāco'deyang, kalaye kāccag. 19 Xā'dā paye zegeleyi ma, xa panggudug pākātāsāng wanāma ndā mādāxā sa na'anggāsa.

20 Na mägāza mēggā rābkāma na māngade tāsa ka, “Baxāndāg ta anggogong widānangang, xa bugundugku Kalāg kunggog.

21 “Baxāndāg ta anggogong xas tanggo gangang, xa edekeny matasang.

“Baxāndāg ta anggogong ngecceng gangang, xa edekeny guguccing.

22 “Baxāndāg ta anggogong sāsaxenggong, na sa'dāda tunyang, na sālangeng, na sāpexke kala kängga tasiny xa kāmēneng ngakang, agā Pāxā Kāxa Julang!

23 “Ledining na zanedicci tā xongondi ngakong kasoguning tanggong, xa dericcāgo ngondey tā pang Kalāg tiyati. Xa wawanakāsagi kā'doccong kasog mānang tā mēggā logey.

24 “Woyoy ta anggogong male tanggong, xa anggo ka'doxang buduldugkugo na kā'deseng kala.

25 “Woyoy ta anggogong kāmasang gangang,

xa edekeny xas lukudi paxe anggo.

“Woyoy ta anggogong guguccing gangang, xa edekeny guniccing na ngecceng.

26 “Woyoy ta anggogong kān kā'day lege ngaka apoccu tā ngakāgong, xa wawanakāsagi kā'doccong māndey kasog mānang ta mēggā logeygi celuwinyang.”

Mpayā Mēggā Kurugo

27 Na Yasuwa kapos legeg ngade ka, “Ndā agā alegecce tanggogong, ndeldeg wunggugong. Mpayā mēggā kurugo, zoga ngaka apoccu tā känggi saxenggong. 28 Pese känggi cage anggong, na palezi tā känggi cālixtinggong. 29 Tā kāxi 'dade abogiccāging, wexi cengicci kalayang tāng 'dadā, na kāxa bate tandānāging, togi nuxu ani biyeyang tāng māndey. 30 Kig kanyāxayging togi 'dogi payeng, ndā kig kabag 'dog tāging, adakā nalāng tāng tunyu. 31 Koyada kān kala koyaki mpayē sāgoydās ging.

32 “Gang mpayadang känggi paye anggong, oxadi 'doxadang tā bāngeneng? Māndey känggi sogo ngaka tasinyang paye känggi payeng. 33 Gang zogadang ngaka apoccu tā känggi sogo ngaka apoccu tanggong, oxadiyang 'doxadang tā bāngeneng? Māndey känggi sogo ngaka tasinyang sogo mānang. 34 Ndā gang kāmēneng amusu tā känggi yexeng ka meledāng tanggong, oxadiyang 'doxadang tā bāngeneng? Māndey kängga sogo ngaka tasiny menede amusu tā kängga tasiny ndey mele tāng kā'day. 35 Wadi kādāppa ka mpayang mēggā kurugo, na zolang ngaka apoccu tāng, na meneng 'dog ndā bokosānang ka sāmeleyāng tanggo song. Ndey dericcugo lay tādāx, na layisang enggā penggā Kalāgi Tādāxang, xa mägaxsānya bow tā kängga mäganyga juliny na tā kängga logacca song. 36 Layesi kängga agā watāsa tā kān xa Menggoni Tiyating age watāsa tā kān.”

Wanga Kāligkā Nga tā Kān

37 Yasuwa ngade ka, “Wanga kāligkā nga tā kān, andakā sāgāling tanggo. Wanga zāgkoygā kān, ndey sāwang zāgkoygā ko. Zaxi nga tā kān ndey sāsaxāng nga tanggo. 38 Begsi ndey sābeg anggo. Kili 'dog appoyo, 'dixisa tāzāg ndā ngādengādesa, ndā didili, ndey sāduki tā satā ngorezāgi. Tā kiligi gi gilingang sāgilidāng tāgi.”

39 Na māndey maser nga tāsa ka, “Kāxa layis ngojox 'dosto ngojox song, kādāppa mānang? Pādaxkāsa sādēlgetese taxā 'dog, sāxong? 40 Me rāb

ngondey ta me bälidicce song, basa käxi sägäbäldey appoyong nyang laye kala me bälidicceneng.

⁴¹ “Wi siye gi zaye nyaxic ta awunu päxä bonggo yä kä'diya sarakaduwecci ta awunuging? ⁴² Käsogkuwa key läpede tä päxä bonggo ka, ‘Päxä bisko, wanga agä anycay nyaxic ta awunugi’ yä kä'diya bo sarakaduwecci ta awunuging? Ama me fonofoney! Caya bo sarakaduwecci ta awunuging täzäläg ndey zayza käley ndä kala bokung nyaxicci ta awunu päxä bonggong tunyu.”

Ed Bäledeswa na Enggegenegi Iyedängang

⁴³ “Eta apo iyedäng päxenena tas song, ndä mändey eta tas iyedäng päxenena apo song. ⁴⁴ Ewe kä'day bälätäsäning na enggengganagi iyedängang. Ewegä kunyu iyedäng enggä 'dami song, na adilu sete tä kenyege song. ⁴⁵ Käxa apong ngaka apoccu päkätäsäng mägaxse, yä käxa tas ngaka tasiny päkätäsäng mägaxse. Xa 'dogi mälegeng päkädäng mägaxsämani kapäsang.”

Padäg Padax

⁴⁶ Yasuwa ngade ka, “Wi siye anggo bangadang agä ka, ‘Bazuwec, Bazuwec,’ ndä wexedeng ngaki aläpedäng tanggo songang? ⁴⁷ Käxa kawung tagä ndä delde wunde tä legeygang ndey wexse nangang, agä aläpede täng ka käxeneni ka'das ⁴⁸ apangza kadony pane kabosasa täzäg loy, ndä repesa kadasu täzä tappa. Faya kawung basa colonggo kämamanya tä pox de käbung pa, ndä kägä'dikiy pa song, xa kärepesawa appoyo. ⁴⁹ Yä käxa dänge ngakang ndä wexe songang, käxeneni ka'das apangza kadony pane täzäg winy kabosasa kadasu säxong. Ndä colonggo kapäs käsajä pane, na kagurumusawa tetex na kawanydäswa seley!”

7

Nayigä Cäläxsä Ngotorponu Asägaru

¹ Ani Yasuwa kä'desenäs bäldeyge kä'day tä känang, maläsa Kafärnaxum. ² Ndä ngotorponu asägarugu Romanandäng tänya owdi paye cäläxse

nano, ndä nya cäläxsämani täxä paccey paye äxsä. ³ Ani ngotorpo kädängäs ka Yasuwa kawunäsang, mayaxsä ngondowinygä Yaxudiny ta Yasuwa, ka säbandä ma mäwung, ndey mänay cäläxsä ngotorpo.

⁴ Sawuno ta Yasuwa, na sägä'dedey ma ka, “Wede xonya ngotorpo xa mang mägädäppas xonyatang, ⁵ xa mäpaye kanggä Yaxudiny, na mändey madony axä palic.”

⁶ Na todi Yasuwa kä'doc nasa. Ani sägä'docconäs ngäte tä pang, ngotorpo kayxa aminuge kaläpe täma ka, “Bazuwec, wanga dereygä ngasägi xa kandäppas ka gi wung tä panang song. ⁷ Nyang kasog asaxe wunad tägingang. Ndä gang ngadi winy ndey cäläxsang 'dox nayic. ⁸ Ndä agä mändey anäs käxa panggudug tä ande kamen asägaru, ndä kangada tä nuxu ka, ‘Wedeng’ na 'docco, na tä nuxung ka, ‘Bong’ na wunodung, na tä cäläxsang ka, ‘Wexe 'dogongang,’ na wexe 'dogeneni.”

⁹ Ani Yasuwa kädängäs ngakongang, ma'dämdes ngakäma. Na mawexwa mängade tä xä'däni räbtomang ka, “Aläpedäng tanggo ka tä Israyil bägälic ka'dox käxa kamen ngakang ka'das 'dox-tongandäng song!” ¹⁰ Na kala kanggi sayaxsäng, kämele tä pa ka'doxäng cäläx kalay apo.

Nguseygä Päxä Mandur tä Xäs

¹¹ Kala tetex Yasuwa kä'doc tä kaxsä pana säbangäs Nayin. Na menggä räbkäma Yasuwa na xä'dä kä'docco nama. ¹² Sawuno saläs kaxsä pa, na sa'doxung apangandäng kaxsä kän käpokung tunyu, ndä nyang nuxundugke ta bona ndä cäs mandur, ndä känatäng nace mange.

¹³ Bazuwec kox ce, na agäma kawasa täce na mängade täce ka, “Wanga ngeyig.” ¹⁴ Na mawung mägäläbä salany, na nycogi pokaccangang kädokalasa kisid. Na mängade ka, “Päxä op, angade tägi ka, ngäsa tiyati!” ¹⁵ Na päxä opi käxsängang kangäsa tiyati na kalegese, na Yasuwa kämeles ma ta bosa.

¹⁶ Na sägädongo kä'daygäsa, na sadelese tä dädäxtigä Kaläg, sängadeccä ka,

“Me logeyga tädäxandäng tä warog!” na, “Kaläg kawung tä posakä kängge!” ¹⁷ Na todi lulungudä Yasuwa kawasasäwa tä Yaxudiya na tä cendegä walangic kä'day.

Yasuwa na Yoxana me Pac

¹⁸ Menggä räbkä Yoxana kaläpe ngaki kä'day Yasuwa kasogkang ta Yoxana. Na Yoxana kabandä menggä räbke pädax ¹⁹ na mayaxsa sa ka sägä'docco sāmān Yasuwa ka, “Giningang nās käxi kän beneng*, wala basa abendig käxa caka?”

²⁰ Ani apanginy kawunonäs ta Yasuwang, sängadeccä ka, “Yoxana me pac kayaxsä was tä gining ka amänzig ka, ‘Giningang nās käxi kän beneng, wala basa abendig käxa caka?’ ” ²¹ Na tä nya owdi Yasuwa kädäxä kän mange tä dāxāka cakucakuny na mägācay ligitiga tasiny tä wadākä kän na malende agā ngojony.

²² Na mabuc täsa ka, “Wesi lapi ta Yoxana tä 'dogi känoxangang na kändängengang. Ka ngojony käsayiza, mexesu kewetädäcco kiccag, na menggä omoda wadägka kalaye apoccu, na bunguny kädängze, na kängga kaxse koxsasa, na menggä wiy kädäng duwaleyga warändi. ²³ Baxändäg tä käxi base mägaxse tagä songang.”

²⁴ Ani menggä yaxsäweccä Yoxana kä'docconäsang, Yasuwa kalegese tä ngakä Yoxana tä xä'dä ka, “Oxadi kasog anggo känocang tä pumpung tä zaygeneng? Pāx känoxang mege zāwande nyaxic? A'a! ²⁵ Neng oxadiyang känoc tunyu tä zaygeneng? Apangza kälägäwa na tandāna duladulaje? A'a! Za, känggi lage tanduga duladulajecäng, kəcag tol cuccu tä owdu buguninginyang!

²⁶ “Oxadiyang känocang tunyu tä zaygeneng? Me logey? E, neng aläpedäng tanggo ka ma mäs me logeyga tädäx tä menggä logey. ²⁷ Ngakongag gärekärejesāno tāmang, ‘Lala, yaxsada me yaxasawiccang tagägi, ani 'docco weye akāsog ndä kala noccang.’ ²⁸ Aläpedäng tanggo ka, känggong

sägiyāngang käxa tädäx kala Yoxanandäng song. yä käxi biyey tä bugundugku Kaläkgang tädäx täma.”

²⁹ Ani kän kä'day kädängäs ngaki Yasuwa kangatang, na mändey menggä yawgä tulubada, kagixi däppiccä Kaläg, xa Yoxana kápaccä sa. ³⁰ Ndä mändey Farisiny na menggä lelericcä asiriyenā Musa kápexkā ngaki Kaläg kabokasa täsang, xa Yoxana kápaccä sa song.

³¹ Yasuwa ngade ka, “Oxadi andäppo na känggä zongang, na sa sa'das wi? ³² Sa sa'das pipuga kācijasāno ta axä owdu wanyäg ndä bagedäning,

‘Was kanusig ndetelegu tanggo ndä anggo kcoxsang song, kangeyig ndä aguniccig ndä anggo kängedyäcceng song.’

³³ “Yoxana me Pac kawung ndä kalägäji ndä māvuxi bux song. Ndä ngadaccang ka māramacca! ³⁴ Yä agānang Pāxä Käxa Jul kawung asiyacca na awuxicci, ndä anggo ngadaccang ka, ‘Za, pāxä me kurugurunong na wuxicci de bux paxeng mäs biskonu menggä yawgä tulubada na kängga tasiny!’ ³⁵ Zänggä ngakä lelertäg bāledeswa na cofu'do'dugku logadä menggä räbke.”

Wawekä Yasuwa na Mid

³⁶ Nuxu Farisiccandäng säbangäs Saman kabandä Yasuwa ka säsiyza nang tä pane, na mägä'doc tä pang Farisic na sägä'docco sagur siyad. ³⁷ Ndä uxandäng tä nya kaxsä pani, sogo ngaka tasiny, cabäle ka Yasuwandäng tä pang Farisic, na cawung cāgo midä māsäs tä belenyza sadotogey sägäluxu tä ngayicca säbangäs alpasta. ³⁸ Na cägä'doc täwang badadagāma, cānge, ndä cādälbede uxku agāce tä exenggāma. Ndä cāsēnye exenggāma na apaxkāce, na mändey cägābucci exenggāma, ndä cawawe exenggāma na midä māsäs.

³⁹ Farisicci kabandä mang kox ngaki, na ngade tä ngase ka, “Kä'dang apangzong layis me logey seleyang, kax mabäle ka uxong läbe mang näka sogo ngaka tasinyang.”

* **7:19** Menggä Yaxudiny bene Almasini säyaxsedängang.

⁴⁰ Na Yasuwa kabuc täma ka, “Saman, ampaye aläpäng nuxu 'dog tägi.” Na mabuc ka, “Lapäng, me bälidic.”

⁴¹ Na Yasuwa ngade ka, “Me menekä amusundäng kamene amusudi ta kän pädax. Nuxu kamen fudada udiny mädäginy mädäg (500), mändey käxi nuxungang kamen udiny pädax wang asiny (50). ⁴² Ani sägämelenäs wegki samen täma songang, masaxa wegki samen tamang kä'day. Pädaxkäsa xänang täsa kädäppa ka paye ma mo'do accanang?”

⁴³ Saman kabuc ka, “Ka'das ka kädäppa ka käxi kamen amusu mangeng, nyaza.” Na Yasuwa ngade täma ka, “Mänang gi seley kälegey zänggä nga.” ⁴⁴ Na mawexwa mägäsar ce, na mängade tä Saman ka, “Gining noxo uxong? Agänang käläs panägi. Kudong magä 'dakä exenggang song, yä ce ca'day exenggang na uxku agäce ndä casenydä na apaxkä zäce. ⁴⁵ Kämpaxäng agä na modey na kägappas agä song, yä ani kaläsäs panäging cägädokala buciyä exenggang song. ⁴⁶ Kāwawey zang na mid song, yä ce cawawey exenggang na midä mäsäs. ⁴⁷ Neng aläpedäng tägi ka ngaka tasinyäcegi mangeng kawangesäno täce ndä nyang cäpaye pacceyang. Yä käxi sasaxa täng bälaxinyang, paye bälaxiny.”

⁴⁸ Na Yasuwa ngade täce ka, “Ngaka tasinyägi kacyining tägi.”

⁴⁹ Ndä palangaski kagur siyad namang käre tä zängga ka, “Xänanang kanang mändey caye ngaka tasinyägi tä känang?”

⁵⁰ Na Yasuwa ngade tä ux ka, “Menekä ngakägi tagä kaxony gi. Wede na modey.”

8

Wexekä Yasuwa na Posakä Uxu

¹ Täbangä ngakongang, Yasuwa kadadara kaxsä pa na madus enggä cabärta mäsäldecce na mälogo yaxsäwecca apo tä bugundugku Kaläg. Känggämagi mägälägä asiny wang pädaxang satäng nama, ² na mändey sag na kulung uxugi mägänay tä litigita tasinyang na tä dāxakanang. Mariyomzi säbangäs Macidaliya ani samagäng

kängga tasiny paxtänding tunyu tä waneneng, ³ Xana uxu Cuza, ani kamen wexekä pang buguning Xirudusang, na Sosana na kulung kän mange kälarta wegkanagi layis kākä ngastängganang täsa.

Serekä Ngakä Me Zäb

⁴ Kän kawuno ta Yasuwa kätätäsäno tä kaxsänggä padägka cakucakuny na xä'dä kädurisäwa, na malegeyze täsa näs seredänic.

⁵ Mängade ka, “Me zäb kawetä kä'doc tä wasakä yugke ndä kulung kawosasa tä kaxsä akäsog na kän kebtasa, na awiny kaleb kulung. ⁶ Kulung yug kawosasa tä cobocoboric, na ani kalocconäsang kamasasa xa nyigidiccandäng song. ⁷ Kulung yug kawosasa tä warä kunyu na kalocco appoyo ndä kunyu räbta. ⁸ Na mändey aki kawosasa tä zägka apocung kalocco na ka'dongasa appoyo, na kiye kiccag zä kuc nuxung age kasog udiny mädäg (100) taxä mange.” Na mängade ka ngakong ngadeccä ka, “Käxa wunde dängecceng, däng ngakong!”

⁹ Na menggä räbkä ma kamän ma ka seredäniccong näkä wiyang. ¹⁰ Na Yasuwa ngade ka, “Anggo nyadogung akäsog tanggo ndey bälēseng bodakä bugundugku Kaläg. Yä tä kulung kän agä alegecce täng na seredänic, ndey kax sälale na oxuswa pele winy, ndä kax sädänge na säbälede 'dogeneni song.

¹¹ “Ndä gang seredäniccong bängeneng ka, yugkag näs ngakä Kaläggang. ¹² Yugki kawoso tä akäsogkang sag näs känggi dänge nga na zeppe tetexang, na Däniye wunodung bate nga tä mäganyga ndey ndakä men ngakä Kaläg ndä 'dox xonyad. ¹³ Yugki kawosasa tä cobocoboriccong sag näs känggi dänge nga na bate na led, ndä mäsakanatäng song. Mene käccogog, ndä ngaka bedeccä kawunong na zalbangada.

¹⁴ Mändey yugki kawosasa tä warä kunyuwang, sag näs känggi dänge nga ndä kä'docco tunyang 'doxada ngakä kanyakanyanä cabär na ngakä Kalägi samenang 'dongatasa song. ¹⁵ Yä yugki

kawosasa tä zägki apoccu ndä loccong, sag näs känggi dänge nga na mene pädate tä mäganyganagi bowinyang na tegetese sogo yugic.

Läpäniccä Banyic

¹⁶ “Kigkandäng banye masäracane ndä xubu song na suxuludi tä boxu salany song. Basa bokasa tä zä tumu ndey känggi luso axang ox owda bow. ¹⁷ Dogi kabodwang paredäwa tunyu na 'dogi ka'danywang wedäwa tunyu tä owda bow. ¹⁸ Ndelde wunggugo appoyo. Käxa 'doge tängang säposo täng, ndä käxa oxo ka 'doge täng yä wundungang, säbate täng.”

Yasuwa na Menggä Pana

¹⁹ Enggä bonggu Yasuwanag na bosa kawuno täma, ndä kä'docco täma ngäte song xa xä'dä käsekä sa. ²⁰ Na saläpe täma ka, “Enggä bonggugo na bonggo satäng tunyu paye zay gi.” ²¹ Na mägämeley täsa ka, “Ngganang na enggä bonggusko sag näs känggi dänge ngakä Kaläg na wexeng.”

Dokoleygä Yasuwa tä Megede

²² Xongenendäng Yasuwa kä'doc tä kaxsä dämpejig na menggä räbke na mängade täsa ka, “Nycugo agali andi tagä colonggo.” Na sägä'docco tunyu. ²³ Ani säwadaccanäs na dämpejigkang Yasuwa kasändä. Na megede kasagesäng tädäxtiny täsa tä colonggo na dämpejig soro päsed na ma, ndä paye mäxasa tä ma nasa. ²⁴ Na sägänoxsas ma sängadeccä täma ka, “Bazuwec, bazuwec, kogkatäng täzänggä xäs!” Na mägoxxa na madux megede, na dampajeygä ma kädokalasa na kasebesäno.

²⁵ Na mängade täsa ka, “Wi siye anggo menedeng ngakang songang?” Na nyigadäg kamen sa na sägäsaydä agäsa na samänäno ka, “Xänanang kanang? Rejede megede na ma na dänge ngakeneng!”

Matakä Ligitiga Tasiny

²⁶ Yasuwa na menggä räbke käca'dä ma na dämpejig kä'docco tä cabärä Gäresa tä xining tagä Calil. ²⁷ Ani Yasuwa

kebesanäs exene tä ndandangang, 'dox-tiyandäng näs me nya cabäri käpasa täma kängga tasinyatäng tä wane. Ndä kaleygädä kälagä tandä song ndä uccu tä pa song basa tä warä morota.

²⁸ Na mägox Yasuwa na mapere, madeläng täzäg tagä Yasuwa na mägädawa paccey ka, “Oxadi tagog tä pidi naging Yasuwa, Pächä Kalägi Tiyating! Kanyixay gi ka ndakä nycälixti agä!” ²⁹ Mängade tä Yasuwa mänang xa Yasuwa kadux käxa tasti tä wanämang ka wetä tunyu tä wanäma. Ndä nyacotädasa ma taxä mange, ndä kän cäkili exenggäma na asänggäma na kacägaliny ndä meske ma. Neng mä'dexe ndä käxa tasti tä wanämang koyadas ma tä owda kaculdoy.

³⁰ Yasuwa kamän ma ka, “Säbängäs gi xäng?” Na mängade ka, “Säbängäs agä Katiba” xa kängga tasiny mangeccä tä wanäma. ³¹ Na kängga tasiny käpaydä ta Yasuwa ka ndakä yaxsas sa tä owdi sägäpätäsuno tängang.

³² Ndä buduruginyatäng mange siyacca tiyati tä päxä cobocoboric na kängga tasiny käpay Yasuwa ka mädokas sa tä wadäkä buduruginy ndey ka sä'docco nang na mägä'dakas sa täng. ³³ Na kängga tasiny kawetäcco täwang apangzi kä'docco tä buduruginyi mangeng, na kasog buduruginy kawu'daka colonggo kamäxasa tä zäg. ³⁴ Menggä megäskä buduruginy kox 'dogi kasogkuwang na koyo kawasesäning kä'docco käduwaley tä kaxsä pa na tä enggä cabärta.

³⁵ Na kän kawetäcco paye zay 'dogi kasogkuwang, na sawuno ta Yasuwa. Sa'doxa nya apangzi kängga tasiny kawetäcco tä waneneng, ze kalay appoyo, kälagäwa na tandu na kä'doc kätäca tä warä exenggä Yasuwa na kän kalaye nyägadiny. ³⁶ Känggi kox 'dogi kasogkuwang ta apangzi kängga tasiny kawetäcco tä waneneng, kaläpe tä känggi kox songang.

³⁷ Na kala menggä Gäresa kä'day na känggi kakukury cabär kä'dayang käpay

Yasuwa ka 'doc wangasa sa xa nyi-gatäg kadele sa. Na Yasuwa ka'deg dämpejigse ka 'doco, ³⁸ na nya apangzi mägäcay kängga tasiny tängang käpay ka sä'docco nang, neng Yasuwa kayaxsas ma tä pa. ³⁹ Läpede täma ka, "Mele wede tä panägo na pari ngaki Kaläg kasog täging." Na mägä'doc mägäduwaley tä kaxsä pa tä 'dogi Yasuwa kasog tämang.

Yasuwa Däxici na Nayacca

⁴⁰ Yasuwa kämel tä Calil na xä'dä käpaxas ma xa satäng tä benggä ma. ⁴¹ Ndä apangandäng säbangäs Yayurus näs ngondow kamen axä paliccä Yaxudiny kä'doc kudukurusa tä warä ex-enggä Yasuwa, käpay ma ka sä'docco nang tä pane, ⁴² xa penämandäng nuxung layis päxä ux jendägke asiny wang pädax paye äxsä.

Yasuwa kamen akäsog, na xä'dä kagur ma de bungu ma. ⁴³ Ndä uxandäng tä warä xä'dä tamicce colowa tä jendägka asiny wang pädax ndä käxa dächändäng song. ⁴⁴ Cawung tä ongu Yasuwa ndä cäpära munu tandänäma, na tetex waxäd kädokalasa.

⁴⁵ Na Yasuwa kamänze ka, "Xänang käpära agäng?" Na kän kä'day kagil, na Putros kabuc ta Yasuwa ka, "Bazuwec, xä'dänong kä'day kagur gi ndä bungu gi!" ⁴⁶ Neng Yasuwa ngade ka, "Agä kabäle ka kigkandäng käpära agä xa panggudug kawetäcce tä wanang."

⁴⁷ Na ce uxi cabäle ka cä'danyewa song na caparängwa tunyu na cawung cädätägä cadeläng ta agäma. Na caläpe 'dogi kasog cägäpära Yasuwang na dächki tetex kasoguno täceng tagä xä'däni kä'day. ⁴⁸ Na Yasuwa ngade täce ka, "Penang, menekä ngakägi tagä känay gi. Wede na modey."

⁴⁹ Ani musku mälegeccenäsang, nuxu kigkandäng käpätäng pang Yayurus kawung ngade ta Yayurus ka, "Päxä penägi käxsä, wanga dereygä me bälidic winy." ⁵⁰ Yasuwa kädäng ngaki na maläpe ta Yayurus ka, "Wanga kärekä nga, yä mene ngakang winy, xa coxsada."

⁵¹ Ani Yasuwa kácogus pang Yayurusang, mawang kän kaläs ax nama song

basa Putros, Yoxana, Yaxup, Yayurus na uxe.

⁵² Na'anggäsagi tä pang ngeyigkang sāngeccä na sāgunuccu tä ngakä ce, neng Yasuwa kawung ngade täsa ka, "Wanga ngeyig xa cägäxsä song casändä winy." ⁵³ Na sagug ma, xa säyex beyin ka cägäxsä.

⁵⁴ Na Yasuwa kamen andäce na ngade täce ka, "Päxä ux, ngäsa tiyati." ⁵⁵ Na ronguccäce kämel, na tetex cängäsa. Na maläpe täsa ka sädoga nuxu 'dog täce cäsi. ⁵⁶ Menggäsa kädongo tä ngaki mänang. Na mägä'dedeyza ka ndakä säläpe 'dogi kasogkuwang tä nuxu kig.

9

Yaxsakä Känggi Yasuwa Käligä Asiny Wang Pädaxang

¹ Yasuwa kuduri känggi mägäligä asiny wang pädaxang, na madoga panggudug täng kä'dayga na butug ndey layenäs kängga makadas kängga tasiny tunyu na dächki kän ² na mayaxsa sa ndey ka säduwaley bugundugku Kaläg na sädäxä känggi täxäccäng. ³ Mäläpede täsa ka, "Ndakä seley bagang nuxu 'dog nanggo tä wedäg song, kala keced na 'dogu pokakä tandu, na siyad na ariyaliny, na ndakä bagang tandu nanggo. ⁴ Ndä pani käläsangang, nycicci täng basa xongondi wangetäsänang kaxsä pa tängang. ⁵ Kaxsä pana känoccang täng kängge kabokasa anggo songang, ndä mpadang wangesänang kaxsä pang, 'diskisining käräptänicci ta exenggägong ndey layis ngakä ngastänggäsa ka känoccang ndä sagixi yaxsuwiccä Kaläg song." ⁶ Na samen sog sägä'docco sadus kaxsä pa säduwale yaxsäwecci apo lege ngakä Kaläggang na sädäxä kän tä ota bägälic.

Xirudus Käbabangwa tä Ngakä Yasuwa

⁷ Buguning Xirudus kädäng ngaki kä'day kasogänangang tä wexekä Yasuwang, na zäma kaxsäwa paccey xa kulung kän ngadeccä ka kächong kanang ndakä layis Yoxana me Pac kangäsa tä xäs, ⁸ ndä kulung kän ngadeccä ka acaka layis me logey Iliya nyaza kaparaswa

täsa. Ndä musku kulung kän lege ka mänang nuxu me logeyga waneng kangäsa. ⁹ Xirudus ngade ka, "Kaluwi zä Yoxana tä pox yä mändey xänanang kalugsi sälege ngakeneng?" Na Xirudus kasäkesawa paye ox Yasuwa.

Yasuwa Käsiy Kän Päsäciny Mädäg (5,000)

¹⁰ Känggi Yasuwa kälägäng kämele, na saläpe ngaki kä'day sawexang ta Yasuwa. Na mabag sa sägä'docco sapälesäning säpaxadas bo pana säbangäs Petsayida.

¹¹ Neng xä'dä kapungung owduma na käräbkädä ma. Na mabokasa sa ndä mälegety sa na ngakä butugku Kaläg na mägädäxä känggi paye däxang.

¹² Xong paye 'däng, na känggi mägälägä asiny wang pädaxang kawuno ngadeccä täma ka, " 'Daki xä'dänong, ndey 'docco täwang kaxsä pa ndey 'dox owdu säng na siyad, xa kogkatäng tä owda kaculdoy." ¹³ Neng Yasuwa kämeley täsa ka, "Anggo dogi siyad täsa." Na sabuc täma ka, "Siyatatäng layis kaka kätäx song basa raxifiny mädäg na as pädax tol. Basa anoccig anganyig siyad tä känggong kä'dayakang." ¹⁴ Sangad ngakong xa apanginyatäng päsäciny mädäg (5,000) tä warä xä'dä. Na Yasuwa läpede tä menggä räbke ka, "Wanga sa säccasäno tä ud taxä udiny pädax wang asiny (50)." ¹⁵ Na sasog kala ngaki maläpasang. Na kän kä'day kacasäng täzäg.

¹⁶ Na mabag raxifinygi mädäggang na aski pädaxang na mägäsa tiyati na malog Kaläg ndä mälarä siyad mädoga ta menggä räbkäma ka sälarta tä xä'dä. ¹⁷ Kä'daygäsa sasiza samasa, na ani kalayang sanyaptä landa asiny wang pädax.

Bucuku Putros ta Yasuwa

¹⁸ Xongenendäng Yasuwa kangäsa kä'doc palacca watägke, ndä menggä räbkämatäng nama na mamän sa ka, "Kän ngadeccä ka agä anäs xäng?" ¹⁹ Na sa sabuc täma ka, "Näs Yoxana me Pac, kulung kän ngadeccä ka me logey Iliya, na musku kulung kän ngadeccä ka nuxus menggä logeygi wane käxseng

nuxungang kangäsa." ²⁰ Na mängade täsa ka, "Yä anggo ngadaccang ka agä anäs xäng?" Na Putros kabuc ka, "Almasini Kaläg kayaxsängang." ²¹ Na madästä sa seley ka ndakä säläpe tä nuxu kig song, ²² mängade ka, "Agä, Pächä Käxa Jul anycäläxtiwa tä nga mange, ndä ngondowiny na bazuwinygä tämed tä Kaläg na menggä lelericcä asiriyenä Musa pexke agä, na säpaxe agä ndä tä sängga kodos angäsata tä xäs."

Ndey ka Layis Seley Me Räbkä Yasuwa

²³ Yasuwa ngade tä kän kä'day ka, "Käxi paye ndey layis me räbkängang basa 'diya ngakä ngase ndä poko kalic todotol na räbkädä bangang. ²⁴ Xa käxi paye ka xony rongicce täzäg tä ngakä ngaseneng, mesede yä käxi paye mese rongicce täzäg tä ngakangang 'doxo aygä lili. ²⁵ Oxadi kig 'doxo tä bangä tangandäg tä walangic kä'day yä edekeny mese rongicceneng? ²⁶ Käxa ze maye tä agä na tä legeygangang, Agä, Pächä Käxa Jul alayis käxa ze maye täng tä xongondi awunodung täng tä xongondu dädäxticcang na tä dädäxticcä Appa na malayikadagi tedelinyang. ²⁷ Ndä gang seley aläpedäng tanggo ka, kulung känatäng tä warägo äxseccä song basa ox bugundugku Kaläg."

Pasakä Yasuwa ta Menggä Logey Musa na Iliya

²⁸ Yasuwa käbäldeyze ndä mäsäng tespedespe, na mabag Putros na Yoxana na Yaxup sägä'docco tä zä cabär tä paley. ²⁹ Yasuwa palacca na toccäma kalay caka na tanduguma wuxeccä, ndä dulatulajeccä bowiny. ³⁰ Na apangas pädax kaweyesäno kadeb legey nama, apangaskenegi menggä logeyag, Musang na Iliya. ³¹ Sägaleza na tädäxtic dulatulaje na salegeyze na Yasuwa tä ngakä melgäma tiyati ka mä'doc tä Ursalim ndey ngaki Kaläg kangatang 'desesäning täng.

³² Ndä Putros na känggi nanganng kasändäcco, na sägoxsasa na agäsa käyer na sägox tädäxticcäma na apanginy pädax dokoloccu nama. ³³ Na

apanginygi pädaxang kamen sog, na Putros ngade ta Yasuwa ka, “Bazuwec, wunakog todong apoccu. Nycugo abola telegudi kodos, nuxu tägi, nuxu ta me logey Musa na nuxu ta me logey Iliya.” Xa mabäle 'dogi mälegeng song.

³⁴ Ani mälegeyis ngakongang timinggaric kawung kaxub sa, na salaye sänyigadiny. ³⁵ Na sägädäng ngasäwan tä kaxsä timinggaric ka, “Päxä penang-gong nyang kaderesang, ndänge ngake!” ³⁶ Ani ngasäwan kalegezenäsang, Yasuwa ka'doxuwa watäke. Na sägämolosäning saläja 'dogi sägoxang tä nuxu kig song basa xongonda caka.

Caygä Ligida Tas tä Päxä Pipi

³⁷ Edekenydeneni sacoccoleza na zä cabär na xä'dä käpasasa täma. ³⁸ Na nuxu apangandäng tä warä xä'dä kabandäsa ka, “Me baldic, kanyäxay gi ka xony penang xa nyang nuxu tagä tolang!” ³⁹ Ligida tas teldedes ma na sogo ma mädawé ndä nyäpapaxe ma na sogo guxudunic päkädäng ikäma ndä wange ma mänungu song, cäläxti ma nano. ⁴⁰ Ndä kampay tä menggä räbkägi ka cay ligida tas tä wanäma ndä kadeges sa.”

⁴¹ Na Yasuwa kabuc ka, “Anggo menggä zong menekä ngakägo bedeccä ndä näsang menggä sogo ngaka tasiny! Alayde nanggo ka'das wi dexä ampanye ngakägong? Koying päxä penägi todong.”

⁴² Sagoying päxä pipi ngäte ta Yasuwa na ligida tas kacodasa pipi täzäg papaxe. Na Yasuwa kadux ligida tas, na kala Yasuwa känay päxä pipi na kämeles ta mena. ⁴³ Na todi kän kädongo tä panggudugku Kalägi mänangang.

Yasuwa Kanimäng Xäske

Na todi xä'dä kä'day kälädäning tä 'dogi Yasuwa wexeng, na Yasuwa ngade tä menggä räbke ka, ⁴⁴ “Mene legegong tä mäganygägo, xa agä Päxä Käxa Jul sä'doc sämenedes agä ta asänggä menggä kurang.” ⁴⁵ Ndä sa sabäle legeygi mälegeyag song, xa bange ka'danywa täsa ndey ka ndakä säbäle. Ndä sänyigate mänekä ma tä legeygi mägalajängang.

Xänang Ngake Tädäxiny Tanggong?

⁴⁶ Na kala matakä nga kadebäning tä warä menggä räbkä Yasuwa ka xänang täsa ngake tädäxiny mo'do acängganang.

⁴⁷ Neng Yasuwa kabäle ngaki sabokasa tä mäganygäsa, na mabag päxä pipi määtokalasa tä wanäma. ⁴⁸ Na

mälegeyze täsa ka, “Käxi paye päxä päxkunong na agangang, paye agä. Ndä käxi paye agäng, paye Kalägi kayaxsä agäng. Xa käxi biyey tä warägo kä'daygägong, nyang ngake tädäxiny mo'do acängganang.”

Käxa Layis Me Kurugi Songang, Biskonuging

⁴⁹ Yoxana kabuc ta Yasuwa ka, “Bazuwec, ka'doxig nuxu kigkandäng caye kängga tasiny tä wadäkä kän na agägi, ndä wa kampayedig ka andokoleyig ma xa mäsa me räb na was song.”

⁵⁰ Neng Yasuwa ngade täma ka, “Wanga dokoleygä ma, xa käxi näs me kurog säxongang biskonogkang.”

Menggä Samriya Käpexkä Yasuwa

⁵¹ Sänggä Yasuwa kalaye bälaxiny ndey ka Kaläg bag ma tiyati, na mägädiri Ursalim. ⁵² Na todi Yasuwa kayaxsa menggä yaxsäwec kapäccasa tagäma, na sägäcögä ow, na saläs kaxsä pang menggä Samriya ndey säbolasa ow täma.

⁵³ Neng menggä kaxsä pa kabäle ka Yasuwa 'do tä Ursalim, na sägäsekä ma.

⁵⁴ Ani Yaxup na Yoxana menggä räbkä Yasuwa koxäs mänangang, sängadeccä ka, “Bazuwec, mpaye was abandig masä Kaläg täzä koxa ndey tuny nycokong kä'day?” ⁵⁵ Neng Yasuwa kawexeswa täsa na kadux sa, ⁵⁶ na sawetädese tä kaxsä pana caka.

'Dogi Bede tä Räbkä Yasuwang

⁵⁷ Tä zänggä wedäkäsa ta akäsog, nuxu accäsa kangad täma ka, “Agä a'dorto banggi todi noco tängang.” ⁵⁸ Na

Yasuwa ngade täma ka, “Atorndoru axinygä kudufuganatäng na awiny axinyganatäng, yä agänang Päxä Käxa Jul panangandäng song.”

⁵⁹ Mändey Yasuwa ngade tä nuxu accäsa ka, “ 'Dorkäda agä.” Neng

kämeley täma ka, “Bazuwec, wanga agä accig anoc abosu appanang.” ⁶⁰ Neng Yasuwa ngade täma ka, “Wanga känggi käxseng bosu kängganagi käxseng, yä gi wede duwala bugundugku Kaläg.”

⁶¹ Na nuxu accäsa kasan ngade ka, “Agänang a'dorto gi, Bazuwec, neng bende agä accigäne anoc angada tä menggä panang.” ⁶² Na Yasuwa ngade täma ka, “Käxa seley danada ande tä sicci ndä gawada ze tongang kädäppa bugundugku Kaläg song.”

10

Yasuwa Kayaxsa Menggä Räkke Tunyu tä Wexed

Udiny Kodos, wang Asiny Wang Pädax (72)

¹ Yasuwa kayaxsa menggä räkke udiny kodos wang asiny wang pädax (72) ka päccasa pädapädax tagäma tä bonggu padäg na tä otagi kä'day ma Yasuwa mäpaye mä'doc tängang. ² Mängade täsa ka, “Jeded mangeccä yä wadi menggä wexed bälaxiny. Neng gang mäne Bazuweccä jeded ndey yaxsäng menggä wexed tä jeded.

³ “Wesi! Ayaxsadas anggo tunyu ka'das sagunuga luluduwinny käraka tä pidi.

⁴ Ndakä bagang ariyaliny mange, na mändey meldänä wedäg, na 'dataginy axinyga pädax, na ndakä galedetäsänang tä kän ta akäsog song.

⁵ “Känoxang käläsang pang, päcci ngada ka, ‘Wanga modeygä Kaläg laye tä panong!’ ⁶ Ndä käxa mägxaxse paye modey tä owdiyang, modey layeccä täng, yä wundungang modeygägo layeccä täsa song. ⁷ Nycicci tä nya pani ziya na wuxi siyaki sadogung tanggong, xa me wexed kädäppa ka sädoga dericce. Wanga 'däla'dälangey tä padäg winy.

⁸ “Känoxang käläsang bo pang, ndä kän kabokasa anggong, ziya 'dogi säguxis anggo nangang. ⁹ Ndäxi känggi täxäccä tä cabarang na lapi täsa ka, ‘Bugundugku Kalägkatäng nanggo!’

¹⁰ “Yä käläsang bo pa ndä kängge kabokasa anggo songang, wesi tä akänggä sota na ngada ka, ¹¹ ‘Käräptäniccä bo panägonong ta exenggäskong a'diskidinig tanggo ndey layis ngakä ngastänggägo ndä bäli ngakong ka, Bugundugku Kaläg kala kawuno ngäte.’ ¹² Ndä ndänge, xa tä sanydä ow, ngakong layeccä tasiny täsa mo'do aki kasoguning tä Sudumang!*

¹³ “Woyoy tä menggä pang Korusin! Woyoy tä menggä pang Petsayida! Xa kä'dang weränicci kasoguning tanggo sogkuwa tä Taya na Sayidunang kax sägämele mäganngäsa tä ngaka tasiny wane, säccatetäsäng tä atilisiny, säbugu zänggäsa na uskuc na saxse mäganngäsa. ¹⁴ Neng xongondi xukumzä Kaläg wunodung tängang, nga layeccä bedeccä tanggo paccey 'diti aki tä Taya na Sayidunang! ¹⁵ Ndä anggo menggä Kafärnaxum, anggo noxadang ka edekeny Kaläg dädäxti anggo tiyati? A'a! Wadi kala sägawadas anggo tä mas!

¹⁶ “Käxa kädäng ngakägong kädäng ngakang, yä käxa käpexkä anggong käpexkä agä ndä käxa käpexkä agäng käpexkä Kalägi kayaxsä agäng.”

Menggä Räkä Yasuwagi Udiny Kodos Wang Asiny Wang Pädaxang Kämele (72)

¹⁷ Kala menggä räkki udiny kodos wang asiny wang pädaxang (72) kämele na led, ngadeccä ta Yasuwa ka, “Bazuwec, mändey kängga tasiny kädängäng nga täwas na agägi!” ¹⁸ Na kala Yasuwa ngade täsa ka, “Agä kanox Däniye käpätäng zä koxa kadeläng kala mälamälajegä koxa. ¹⁹ Ndänge, agä kadong panggudug tanggo ndey dereterejeyseng zänggä dolu na dänu na mändey ndey mo'dasang me kurugo Däniye, ndä 'doga siye anggondäng song. ²⁰ Yä musku, wanga led ka ligitiga tasiny kädängäng nga tanggo, wadi ledäning xa agägo gärekärejesäning tiyati tä pang Kaläg.”

²¹ Na tänya axä owdi Yasuwa käligäwa na Ligidä Kaläg na mägäledäwa

* **10:12** Kaläg kaduny menggä Sudum na Amora na mas xa kafulo sogo ngaka tasiny.

mängade ka, "Agä andädäxti gi Appanang, Bazuweccä tiyati na täzäg, xa gi kä'dany ngakong tä menggä lelertäg na känggi yeräninyang, yä käparäng tunyu ta enggä pipu. E, Appa, xa wanägi tidi täng. ²² Appananggi tiyating nyang kadong ngakong tagä kä'dayang. Appanangang tol seley yex agäng, Ndä agänangang tol seley ayex Appangang, na mändey känggi agä käpay ka aparas Appanang tängang kəcag tol bälēdes mang."

²³ Na kala Yasuwa kawexeswa ta menggä räbke kabodsa nang na ngade ka, "Baxändäg tä agäwanggi lale 'dogi anggo zayadangang! ²⁴ Ndä agä aläpedäng tanggo ka menggä logeygä Kaläg mange na buguninginy käpay ka laley wegkong laladangang ndä kox song, sapaye ka sädäng ngakong ndängedengang ndä sägädäng song."

Serekä Ngakä Apangza Apo tä Samriya

²⁵ Xongenendäng, me lelericcä asiriyenä Musa kangäsa paye ka läbä Yasuwa, na ngade täma ka, "Me bälēdic, oxadi kädäppa ka asog ndey a'dox aygä liliyang?" ²⁶ Na Yasuwa ngade täma ka, "Oxadi gärekärejesawa tä asiriyenä Musang? Anggo käbäleng wi tängang?" ²⁷ Na me lelericcä asiriyenä Musa kabuc ka, "Asiriye ngade ka, 'Paya Bazuwec Kalägägi na mägaxsägi nuxung, na rongiccägi kä'day, na kutegtägkägi kä'day, na ngakä zägi kä'day', na 'paya menggä sogalinygägi kä'day ka'das paygi mpayis ngasäging.'" ²⁸ Na Yasuwa ngade täma me lelericcä asiriyenä Musa ka, "Gi kubuc ngakong appoyo, sogä mänang ndey nay."

²⁹ Ndä me lelericcä asiriyenä Musa paye bokung ngase tuny, na ngade ta Yasuwa ka, "Xänang näs me sogaldangang?"

³⁰ Na Yasuwa kabuc täma näs legedänic ka, "Apangandäng kacoccoleza tä Ursalim 'docco tä owda säbangäs Arixa, na kadel ta asänggä menggä bärada na kamen ma kawid ma, käbadä ma ndä wangasa ma tä enggä xäska bälaxiny."

³¹ "Na todi me tämed tä Kaläg kälaxäng kacoccoleza na nya akäsogi ma'doxung

apangzi menggä bärada käbadäng sängo täzäg na mapopporeza mägäläng cengic. ³² Na mändey me Lawi me posakä me tämed kawung kälaxäng na kox apangzi sängo täzäg na kapopporeza käläng cengic. ³³ Yä me Samriyani näs me pungutang wede kawung tänya owdu 'doxti sägäbadäng na mägox nya 'doxti sängo na agäma kawasa täng.

³⁴ "Na mägä'doc täng masenyndä penduge ndä mädogä mid täng ndä mabodey ndä mäpoka tä kaccänäma. Magoya taxä aloc ndä mädäxä. ³⁵ Na edekenyeneni mabag ariyaliny pädax madoga ta me aloc, mängade täng ka, 'Meskäde 'doxtong appoyo ndä wegki noco wanyäs tämang awunodung ameledäng tägi kä'day.'

³⁶ "Tä känggong kodosakang, xänang kädäppa ka näs me sogal tä 'doxti menggä bärada käbadäng?" ³⁷ Na me lelericcä asiriyenä Musa ngade ka, "Käxi age kawasa tämang." Na Yasuwa ngade täma ka, "Neng wede sogä ka'das ma mänang."

Mariyom na Marsa

³⁸ Yasuwa na menggä räbke wedetese na kala sägä'docco saläsa nuxu kaxsä pa na uxandäng säbangäs Marsa kuxis ma xa mäś palangasic. ³⁹ Ndä ce Marsa päxä bosandäng säbangäs Mariyom kəcä todä exenggä Bazuwec Yasuwa delde wunde tä bälēdiccäma. ⁴⁰ Yä Marsandäng dalewa tä wexed xa cäpaye cäwex wexed kä'day na cawung ta Yasuwa cängade ka, "Bazuwec, gining seley mpaye ngakang xa'de? Päxäsko kawangäng wexed tagä kä'day. Lapi täce ka cäpos agä."

⁴¹ Na Bazuwec Yasuwa kabuc täce ka, "Marsa, Marsa, gining gäre nga ndä käwoldoxu na'do tä ngakä weg mange. ⁴² Wadi 'dogkandäng nuxu payewa. Mariyom kadere ngaki apoccu pacceyang, 'doga bate täcendäng song."

11

Palic

¹ Xongenendäng Yasuwandäng palacca tä owandäng. Mägädokala paley na nuxu me räbkäma ngade täma ka, "Bazuwec, bälde was na paley, kala ani

Yoxana kăbäldeyis menggä räbkeneng.”
² Na Yasuwa läpede tä menggä räbke ka, “Kănoxang mpadang palezangang, paleyzi ngada ka,

Kaläg, Appani tiyating wanga agägi laye tädäxiny

wanga bugundugkägi wuno täwas.

³ Togung zăx täwas todotol,

⁴ na saxäng ngaka tasinygusko täwas, xa was wasaxedig nga tä känggi sogo ngaka tasiny täwasang.

Ndakä wang ngakä lăngädäsko kawas was tä sogkä ngaka tasiny.”

⁵ Na Yasuwa läpede täsa ka, “Kädäppa ka nuxu accăgo biskonenendäng, ndey 'doc täng tä pälic läpe täng ka, 'Bisko, bege agä pugandagă zăx kodos, ⁶ xa biskonang kăpätäng wedăg kawung tä panang, ndä 'doga tä andangandäng song.’ ⁷ Ndä biskonăma meley tăma ka, 'Wanga daw tagă. Xa kala kadărănggălisnig na penggang tax kasăndăccig. Păx angăsata tiyati adogodung nuxu 'dog tăgi song.’ ⁸ Agă alăpedăng tanggo ka, kax apang uccu tax na ngăsata togada nuxu 'dog ta biskone xa ka biskoneneng song. Neng apang ngăsata togada 'dogi biskone payeng xa biskone ze kama tä mănেকে song.

⁹ “Alăpedăng tanggo ka, mănেকে owdu 'dog ndey sădogung tanggo, nyamgăda 'dogi mpadangang ndey 'doxang, dotora sogal ndey sălenge tanggo. ¹⁰ Kăxi mănecceg 'doxo 'dogi payeng ndä kăxi nyamaccang kaledăng, na kăxi totoro sogalang sălengede täng. ¹¹ Xănang tä warăgo năs appa pene kanyixay axsic täng ndä doga dol tăngang, yă sax togakă axsic tăngang? ¹² Na cong pene kanyixay găldic täng, ndä toga dăn tăngang? ¹³ Anggogi ndasinyangang yexeng togakă wegka apoccu ta penggăgo, neng seley Kaläg, Appani Tiying togada Ligide tä känggi mănেকে mang!”

Yasuwa na Pelizipul

¹⁴ Yasuwa kăcay kăxa tasta kădogosojeý apang. Ani kăxa tas kawetăsang, apangzi kalayis togojosang kalegese, na xă'dă kădongo. ¹⁵ Na kulung acănggăsa ngadeccă ka, “Yasuwa caye kăngga tasiny na panggugu Pelizipul buguningză

kăngga tasiny.” ¹⁶ Kulung kăn paye lăbă ma na ngadeccă ka măsog bolic pătäng tiyati.

¹⁷ Yă Yasuwa kabăle ngaki tä măganygăsang na măngade täsa ka, “Bugundugka kălartănong wanyetăsăno, ndă caxsăwanda kălarăwang, telgedăng.

¹⁸ “Yă gang butugku Dăniye kălarănong, bugundugke dokoloccu key? Agă kamăn anggo xa anggo gasedănang ka agă anycaye kăngga tasiny na panggugu Pelizipul. ¹⁹ Ndă gang agă anycaye kăngga tasiny na panggugu Pelizipulang, anggo menggä räbkăgo caye na panggugu wi? Neng mănangang, sa săparedăng anggo tunyu ka nyceluwinyang. ²⁰ Yă gang agănang anycaye kăngga tasiny na andă Kalăgkang, mănangang bugundugku Kalăg kăcogu anggo.

²¹ “Apangza pădăg kayiwa na wegkă pogutang meske pane, na ka'dăka'dină pane kă'day. ²² Yă apangza pădăg pacceý kasakas ma ndă kamo'das mang, soro bupsu pogudumani măpăse andăma năngang na bate wegkăma lare.

²³ “Kăxa nagă songang me kurangang ndă kăxa poso agă tä wexed songang mace tagă.”

Melgă Ligida Tas

²⁴ Yasuwa legecce ngade ka, “Ligida tas kawetă tunyu tăwang kigkang, tusu otaga ma wundung täng nyame owda nundu täng neng 'doxo song. Na ngade tăngase ka, 'Neng mănangang amelede tä boxu pananggi kawangasang.’ ²⁵ Na nyămele nyă'doxada boxu pa worowa kălexejeg na weg repetăsăning. ²⁶ Ndă nyăwede măndey nyă'do nyăgodung kulung litigă tasinyga paxtinding mo'do nya, ndey să'doc sălăs săcuccu täng, ndey săsog 'doxti cuke laye tasiny mo'dă cukenegi tăzălăgkang.”

²⁷ Ani Yasuwa kalegeyăs ngakongang, uxandăng tä wară xă'dă kădawa ta Yasuwa ka, “Baxăndăg tä uxi kiyăng ging na ki'digi kă'dey ging!” ²⁸ Yă Yasuwa kămele tăce ka, “Wadi baxăndăg tä kănggi dănge ngakă Kalăg na wexeng!”

Boliccă me Logey Yunan

²⁹ Xä'dä kaposwa, na Yasuwa kadeb legey ngade ka, "Zong sogo ngaka tasiny paccey, zong paye agä ka asog bolicca sogowa täng, ndä boliccandäng dogadaswa täng song basa boliccä me logey Yunan. ³⁰ 'Dase ani Yunan kawunäs kalayis bolic tä menggä Niniwa, agä Päxa Käxa Jul mändey alayis bolic tä zong. ³¹ Buguningzä uxandäng näs näkä anda täzäg ngäsata na känggä zong tä xongondu xukum. Na cäsogo asiriye siye sa xa cägäpätäng tä 'denga ndey cädäng lelericcä Seleman. Ndä kigkanang todong ngake tädäxiny mo'do Seleman! ³² Menggä Niniwa ngäsotäsäng na menggä zong tä xongondu xukum. Na säsogo asiriye siye menggä zong, xa ani Yunan kábäldeyis menggä Niniwang, sägäxaje tä ngakäsagi säsogo tasinyang. Ndä kigkanang todong ngake tädäxiny mo'do Yunan!

Owda Bow na Owda Jul

³³ "Käxa banye lampane ndä 'danye na gumudi 'dog tängandäng song, basa bokasa täzä tumu ndey känggi läsotäng towang zayza nang. ³⁴ Awunuging näs banyiccä wanäging. Känox awunugi apong, wanägi bägälic päse nyipäxxkic, yä awunugi tasang, wanägi bägälic lätäng. ³⁵ Neng gangang bäli, nyipäxxkicagi ndakä layis lätäng song. ³⁶ Ndä gang känox wanägi bägälic päse nyipäxxkic ndä nuxu cengiccenendäng tä lätä songang, wanägi bägälic päse nyipäxxkic kala pappareygä lampa."

Yasuwa Kadux Farisiny na Menggä Lelericcä Asiriyenä Musa

³⁷ Yasuwa kä'dese legeyge na nuxu Farisiccandäng kabandä ma ka sä'docco sägur siyad tä pane. Na Yasuwa kä'doc kaläs tow na sägäccasäng sagur siyad. ³⁸ Ani Farisic koxus Yasuwa paye siyza yä ka'dayis asängge täbangä tanyara songang, kädonga. ³⁹ Na Bazuwec kalegese täma ka, "Neng gang anggo Farisiny 'dayadang ondugu satugugo yä kaxsängga kaganye. Yä anggog mänang. Mäganygägo päse kuruguru na tastäg. ⁴⁰ Ama anggo abadiny, anggo 'diyang ka Kaläggkang teye wanä 'dog

na kaxseneng? ⁴¹ Wadi dogi weg tä känggi widäningang na mäganygo nuxung, ndey ngakä mäganygägo na wexekägo laye kälexejeg tagä Kaläg.

⁴² "Woyoy tanggo Farisiny! Anggo dogadang asiny tä udiny mädag tä kenyu na enggä ewegä log tä Kaläg, yä musku anggo bigiding däppic na payiccä Kaläg! Wadi kädäppa ka anggo dogang wegkong tä Kaläg yä wangang bigigä däppic na payiccä Kaläg. ⁴³ Woyoy tanggo Farisiny! Xa mpadang cad tä otagä dädäxti tä axä paliccä Yaxudiny na mpadang ma'ditegä modey tä otagä nganyatada! ⁴⁴ Woyoy tanggo! Xa kä'dasang morotaga kasabe, kän wedeccä ta zängga ndä yex song!"

⁴⁵ Na nuxung me lelericcä asiriyenä Musa kabuc täma ka, "Me bälidic, legeyis ngakongang langatag täwas mändey." ⁴⁶ Neng Yasuwa kämeley ka, "Woyoy ama menggä lelericcä asiriyenä Musa mändey! Anggo ndarandadang kän na ngakä asiriye ndä siyada tä wadäka, yä musku taxä nuxuza anggo dogadang asänggägo täng tä posad song! ⁴⁷ Woyoy tanggo xa anggo donyadang morotagä menggä logeygi wawanagkägo kapaxang. ⁴⁸ Ka'das ka anggo gixing na kábäleng wexekä wawanagkägo, xa sapaxtä menggä logey ndä anggo kädonydang morotaga! ⁴⁹ Nenyang Kalägi yex nga kä'dayang ngade ka, 'Agä ayaxsada menggä logey na känggi sägäligäng täsa, ndä kulung acängga säpaxe na sämaceccä täng säpexke.' ⁵⁰ Ndä zong layis näka asiriye siye tä tamiccä menggä logeygi kacolasäwa cawu tebicca ow, ⁵¹ cawu tamiccä Xapil na tä tamiccä Zakariya, ani sapax tä kaxsä kaldä axä tämetang. E, agä aläpedäng ka layeccänäs ngakä ngastänggä zong. ⁵² Woyoy tänggo menggä lelericcä asiriyenä Musa! Anggo kädäringgiling sogaldä yexkä nga! Anggo kälasang na ngastänggägo song, ndä käzekeng känggi paye lasang."

⁵³ Ani Yasuwa käpayis ka wetä tä pang Farisiccang, menggä lelericcä asiriyenä Musa na Farisiny kadeb maccad tasiny täma, na samän ma seley na mäned

tä nga mange, ⁵⁴ ndey sänyamgädäs rakawza sämen ma täng tä ngaka mälege.

12

Nyigata Kaläg, Wanga Nyigatägkã Kän

¹ Ani xä'dä kädurisäno kasog päsäciny dexä bungudäningang, Yasuwa kadeb legey täzälägäne ta menggä räbke ka, "Meskädäning tä 'daziccä Farisinygi näs fonofoneyang. ² 'Doga ka'danywang, 'doxowa ndä 'doga kabotwa näs raj paredängwa tunyu. ³ Ndä gang ngaki bägälic kangadäning ongutang dängewa säxe, na ngaki käbodang taxä ndongang duwaledäning tä owda lenge.

⁴ "Aläpedäng tanggo biskodagang ka wanga nyigatägkã känggi paxe wanäwanang, xa mändey 'doga sogo täbängenendäng song. ⁵ Wadi aläpedäng tanggo ka käxi kädäppas ka nyigatangang, nyigata Kaläg xa nyang tol panggudug täng gawadas anggo tä mas tä xongondu xäskägong. E, aläpedäng tanggo ka, nyigata Kaläg! ⁶ Päch atodu mädäg sänganyada na mälininy pädax song? Yä musku nuxung atoduwiccandäng ka'diyaswa tagä Kaläg song. ⁷ Ndä näs tire apaxki täzäging Kaläg kägänasa. Wanga nyigatäg, xa anggo ngakägo bedeccä mo'do atoduga mange.

⁸ "Aläpedäng tanggo ka, käxa 'dade awage na agä tagä kän ka räbo agäng, agä, Pächä Käxa Jul mändey a'dade awagang nang tagä malaykadagä Kaläg. ⁹ Yä käxa käli agä tagä känang agä mändey agäli tagä malaykadagä Kaläg. ¹⁰ Ndä käxa lege ngakä maccad tä ngakang, agä Pächä Käxa Julang, nyäwangada nga täng yä käxi degeje Ligidä Kalägang nyäwangada nga täng song. ¹¹ Yä sagoying anggo tagä axä paliccä Yaxudiny na bugununginy na ngotorpodang, ndakä gäredeng ngaka mäxising nang na tä 'doga legedeng, ¹² xa Ligidä Kaläg lapedäng 'doga legedeng tänya owdi."

Serekä Ngakä Apangza Kadangandey ndä Ka'darandey

¹³ Nuxu kigkandäng tä warä xä'dä ngade ta Yasuwa ka, "Me bälidic, lapi ta pächä bisko ka walarig malenä appanang."

¹⁴ Neng Yasuwa ngade täma ka, "Amo, xänang kamenäs agä buguningang de azaye ngakägong?" ¹⁵ Na mängade täsa ka, "Lengi agägo na meskade ngastänggägo tä 'dara, xa rongicca 'doxowa tä dangandäggandäng song."

¹⁶ Na maser nga täsa ka, " 'Dox-tiyandäng näs tanganic pelowge kiying pächä kuny, ¹⁷ na mängade ka, 'Asogowa key, ndey a'dox curuna ngotey adoga kuny kang tängang?" ¹⁸ Na kala mängade ka, 'Basa asog 'dogong, apaxatasa curugang yä adonyo käka ngoniny, ndey acolda kuny täng na ka'däka'di bägälic. ¹⁹ Ndä angad tängasang ka, "Gi ka'däka'dinägi mange käyoka mange layis näkä jende, buduldi, sisi, wuxsi, na ledewa!"

²⁰ "Na kala Kaläg ngade täma ka, 'Ama abad! Ondunong analedäng rongiccägi tägi tunyu, yä xänang lugu ka'däka'dini käwex tängasäging?" ²¹ Käxa xikitäsa weg tä ngase mänangang, wadi tangandäggkenetäng tagä Kaläg song."

Kaläg Paye Ngakog

²² Yasuwa ngade tä menggä räbke ka, "Aläpedäng tanggo ka wanga kärekä ngakä aygägo, na wegka ziyadang na tä wadäkägo tä tanduga lagadang. ²³ Xa ay mo'do siyad, ndä wanäwan mo'do lag.

²⁴ "Lala atämidinggaru wacca song ndä zäbecce song, ndä curunanandäng song, yä Kaläg ziye. Ndä Kaläg paye anggo paccey mo'do awiny! ²⁵ Xänang tanggo kärekä ngake posada sängädic tä rongeneng? ²⁶ Ndä yexeng ka kärekä ngakägo posada sängädic tä rongiccägo songang, wi siye anggo gäredeng ngakä kulung wegkang?

²⁷ "Lala dudulus 'dongoccu key, ndä wexekanatäng song, ndä secce song. Neng musku aläpedäng tanggo ka, kala Seleman tä bugundugke kälagä tandäna kusu kala nuxu dudulusiccong song! ²⁸ Ndä Kaläg nyaza nyägädel dudulus mänangang, ndä uccu todong xongong ndä edekeny sädokus mas tä boxu tämä'di'diccä zex. Kaläg paye anggo

mo'do dudulus. Wi siye anggogong menekä ngakä Kaläg bälaxiny tanggo mänangang?

²⁹ “Ndakä makadang bandagä wegka ziyadang na wegka wuxiding na ndakä gäredeng ngakä weg. ³⁰ Xa känggi kä'day tä walangiccang, mate bandagä siyad na wuxid, ndä Appani Tiyating yex 'dogi mpadangang. ³¹ Anggo basa makadang bangä ngakä Kaläg ndä nyädogung weg tanggo käsär.

³² “Anggo menggä räb kä'dasang sagonu, wanga nyigatäg xa Menggoni Tiyating wane tidi xa buguningzägon na meske anggo. ³³ Nganyi wegkago kä'day larti tä känggi widänong. Yawi malenägo tä pang Kaläg tä kaxsä meldugi boxsoccu na cereduno songang, na me bära bate songang na tondoc wanyäs songang ndey meskädä wegkago tä pang Kaläg tiyati. ³⁴ Xa owdi mälenägo tängang nyang mäganngägo padasang.

Bolosäning tä Melgä Bazuweccägo

³⁵ “Laga tandugu wexekägo na meskade lampadagägo kusuccu kä'day. ³⁶ Layi kala kängga bene käxa ngondeza päkädäng owdu ledä batad, ndey mawung madotorezang ndey lenge bäling täma tetex. ³⁷ Baxändäg tä cäläxinygi käxa ngondey 'doxodung oxacca kasändäcco song tä melgämang! Aläpedäng zänggä nga tanggo ka, ma täzäma mälage tandugu wexed, na mäbogatasa sa, ndey mälarta siyad täsa! ³⁸ Kax mawung tä pälic na mä'doxodängza soxacca, baxändäg tä cäläxinygi mänangang! ³⁹ Wadi bäli ka kä'dang me pa yex xongondi me bära wunodung tängang kax meske pane wange me bära läso song. ⁴⁰ Anggo mändey layesi kängga cuccu meskedäning, xa agä, Pächä Käxa Jul awunodung ndä xongondeneni bäledesäwa song.”

⁴¹ Na Putros ngade ta Yasuwa ka, “Bazuwec, gining zere ngakong täwas wala kän kä'day?”

⁴² Na Bazuwec kabuc ka, “Xänang kädäppa ka mpäse andägi nang na kalelerey tä menekä wexetang, xänang

käxa ngondezä wexed bokatasa mene menggä wexed tä ande ndey togadas dericcä menggä wexed layde songang?

⁴³ Baxändäg tä me wexeki käxa ngondeze mele 'doxodung wexecceng. ⁴⁴ Aläpedäng zänggä nga tanggo ka, käxa ngondezä wexed menede ka'däka'di tä andä käxi mänangang.

⁴⁵ “Yä wadi nya me wexeki kä'doc kangad tä ngase ka käxa ngondezang kalaygädas tä mel, na kadeb badkä kulung menggä wexed, bade apanginy na uxu kä'day, ndä siyacca na wuxicci de bux paxeng, ⁴⁶ ndä käxa ngondezä nya me wexeki nuxus wung tä xongondi sabokasa ka mäwunodung songang na tä sani säyex songang, na cäläxti ma, ndä matas ma tä owdu märinginy. ⁴⁷ Ndä me wexeki yex ngaki käxa ngondeze paye ndä wexe song na käbolasa ngase songang, 'doxo bad mange.

⁴⁸ “Wadi me wexeki yex ngaki käxa ngondeze paye songang ndä wex songang säbade päxä bälax winy. Käxa sadoga weg täng mangeng, säpaye täng mange, ndä käxa saposä weg täng mange ka mendäng, säläge payge täng mange.

Yasuwa Koyodung Modey Song, Mägodung Wasad

⁴⁹ “Agä kawung täzäg tä koyinakä mas, ndä ampaye ka nyandäng ganang tunyu walangic kä'day! ⁵⁰ Ndä mänang agä alayis käxa panye xuxubtäg ndä agäre bal a'dese! ⁵¹ Anggo noxadang ka agä kawung tä koyinakä modey täzäg? A'a, agä kawung tä koyinakä modey song, wadi kawung tä koyinakä wasad! ⁵² Caw xongong na ur'dug bäli ka kän mädäg tä pana wasetäsäning, kodos pase awaga na pädax ndä pädax pase awaga na kodos.

⁵³ Sa säwasetäsäning, menäwan kixidi pene apang song, ndä penäwan kixidi mena song, bonuwan kixidi päxe ux song, ndä päxä ux kixidi bona song, ux kixidi uxä päxe song, ndä päxä ux kixidi wawana ux song.”

Bälädäniccä Bolu

⁵⁴ Yasuwa mändey kangad tä xä'dä ka, “Känoxang timingarugu zädongang, na

kala bāledeng ka koxa kāje na kāje.
⁵⁵ Ndā kānoxang megenā anda tázāg sageng, bāledeng ka kāmpagānendāng sagedāng, na sagedāng. ⁵⁶ Anggo menggā fonofoney! Anggo yexeng tetebegā ngakā bolicca alacca tázāg na tázā koxang, yā wadi kasogānang key 'diyang tetebegā ngakā bolugu wexekong awexe ganang-gang?

Nyca Amusu tā Ngastānggāgo

⁵⁷ "Wi siye anggo zaxadang terekā ngaka apoccong? ⁵⁸ Kānoxang noc-cang na me pokakā nga tāgi tagā buguningang, mādādāgāsing ndey bolang ngakāgo nama ta akāsog ndakā māgoyas gi tagā buguning, xa buguning menedes gi tā andā polisic, ndā polisic rikidis gi tax. ⁵⁹ Agā alāpedāng tanggo ka, anggo 'doadang tunyu song basa degānang na milin!"

13

Yasuwa Kabandā Kān ka Xaje tā Ngaka Tasiny

¹ Xongondi Yasuwa bāldecenāsang, kān kawuno kalāja tāma ka Pālati kapax kulung menggā Calil ndā kurupu tamicca na tamiccā wegki sadāmze nangang. ² Na Yasuwa kabuc tāsa ka, "Neng anggo kābokosānang ka menggā Calilgi sapaxang sag tasiny mo'do wayaka nyang kasog sapaxang? ³ A'a, alāpedāng tanggo ka bal anggo xajang tā ngaka tasiny mändey xa na'anggāgo nāxsecceng mändey!"

⁴ Na mändey Yasuwa ngade tāsa ka, "Kānggi bāgāliziccā kumagi kadeles zāngga kāsē asiny wang tespedespe tā Salonang, anggo nggeredeng ka sa sādāsiny paccey sāmo'do kānggi kā'day tā Ursalimang? ⁵ A'a, alāpedāng tanggo ka bal anggo xajang tā ngaka tasiny mändey xa na'anggāgo nāxsecceng mändey!"

Seredāniccā Etā 'Damina Iye Sāxong

⁶ Yasuwa kaser nga ka, "Apangandāng kāsābā etā 'dami tā pelowge, na xon-gonendāng māgā'doc māpaye ka metā engge neng ma'doxa ze pālo. ⁷ Na

kala mālāpede tā 'doxti meske pelowang ka, 'Tā jendāg kodos agā amelde awun-odung ndey ka a'dox pāxā 'daminong ndā a'doxodung ze pālo. Dagasa tázāg, taxā wi 'dog uccu ndā wanyis zāgkang?' ⁸ Neng me megāskā pelow kabuc tāma ka, 'Bazuwec, accig wanga etong jenong yā anoc abosu boxe adoga mudura tāng. ⁹ Ndā zayig cong kiye baydangang, yā kasax iyetang, ndā lusa tázāg.' "

Yasuwa Kādāxā Uxandāng nās Mexes tā Xongodu Sapid

¹⁰ Yasuwa bāldecce tā nuxu axā paliccā Yaxudiny tā xongodu Sapid, ¹¹ ndā uxandāng tānya owdi ligida tas kāmexestey tā jendāgka asiny wang tespedespe. Nyāgonggosey ce kasog ce seley cāyex dokol kātay song. ¹² Yasuwa kox ce na kabandā ce na ngade tāce ka, "Kala kāwulegeswa tā ngguxtug." ¹³ Na Yasuwa kādana asāngge tāce na tetex cāgādokol tiyati kātay na cāgādādāxti Kalāg.

¹⁴ Na kāxa ngondezā axā paliccā Yaxudiny kāsāngā ta Yasuwa xa Yasuwa kādāxsi tā xongodu Sapid, na ma kāxa ngondey mālāpede tā xā'dā ka wexed wexedāning tā sāngga aran. Kāxa tāxāng wung sādāxā tāng ndakā wung tā dāx tā xongodu Sapid. ¹⁵ Na Bazuwec Yasuwa kabuc tāma ka, "Anggo menggā fonofoney! Anggo nuxu accāgondāng tā xongodu Sapid uludi tigide na cong nās kaccāneneng ndey koya tā wuxid song? ¹⁶ Yā cezong cās pāxā pe Apraxim, Dāniye gun onguce tā jendāgka asiny wang tespedespeng, awang 'dakakā ce tā co'dic tā xongodu Sapid?"

¹⁷ Ani Yasuwa kangadās legeygongang, menggā kuruma kā'day zāngga kamaye yā xā'dā kā'day kāledāning tā wexeki kādong sa Yasuwa wexeng.

Yasuwa Kādūpoy Pāxā Yugicca Biyey na Bugundugku Kalāg

¹⁸ Yasuwa kamānze ka, "Bugundugku Kalāg ka'das wi? Oxadiyang agānang andāppo nangang? ¹⁹ Bugundugku Kalāg ka'das pāxā yugicca biyey apang kabag kāsābesa tā kaxsānggā pelowge ndā

'donga layis apanggä ed yagäney, ndä awiny 'danydä axinyga tä acayadage."

²⁰ Mändey Yasuwa ngade ka, "Oxadiyang agä andäppo na bugundugku Kalägkang? ²¹ Bugundugku Kaläg ka'das 'dazicca ux kabag ndä kurupu na duc mange ndä kamojey ndä pudi kä'day."

Akäsogalda Kacäbaswa

²² Yasuwa kä'doc tä wedäg kadus kaxsä pa na enggä cabärta bäldecce ndä mäwedede tä Ursalim. ²³ Na nuxu kigkandäng kamän ma ka, "Bazuwec, enggä kän bälaxinyag Kaläg xonyong?"

Na mängade täsa ka, ²⁴ "Mpädägäsining ndey läsang akäsogaldi kacäbaswang, xa aläpedäng tanggo ka kän mange zäge läsake ndä mo'dada läsacca song. ²⁵ Xongonda ledä pa kangäsa kärikä sogaldeneng, anggo wunosunang ndokalaccang tunyu dotoraccang ndä nyäxadang ma ka, 'Bazuwec, wanga was aläsig!' Neng mäbucu tanggo ka, 'Agänang ayex anggo song ndä ayex owda känyuccing täng song.' ²⁶ Na noccang ngadaccang ka, 'Was kasiyzig na kawuxsig nagi, ndä gi kädäldeyze tä kaxsä panäsko.' ²⁷ Neng mämele ka, 'Agänang ayex anggo song ndä ayex owda känyiccicing täng song! Nycengäning tä wanang, na'anggägo, anggo menggä sogkä ngaka tasiny!'

²⁸ "Na kala todi ngecceng na gasadang nyäxkägo tä oxakä Apraxim na Isxag na Yaxup na menggä logeygi kä'day tä bugundugku Kalägkang yä anggo tä ngastänggägo sä'dädadas anggo tunyu. ²⁹ Ndä kän päkätäsäng zä dong na tawiny na anda tiyati na anda täzäg wunosuno catetäsäng kuru siyad tä owdu Bugundugku Kaläg. ³⁰ Ndä seley känggi päccadas ngastängganang, latasa tong yä känggi latasa tongang, päccatasa."

'Dockä Yasuwa tä Ursalim

³¹ Tänya xongondi Yasuwa legeg-cenäsang, kulung Farisinyatäng kawuno ngadeccä täma ka, "Wete wede wangasa owdong xa Xirudus paye pax gi."

³² Neng Yasuwa kabuc täsa ka, "Wesi lapi ta atorundorini ka, 'Laley, agä anycaye kängga tasiny na andäxäcci xongondong na edekeney yä mugundeneni ampele wexekang. ³³ Ndä gang agä awedede xongondong na edekeney na mugun xa kax kädäppa ka säpaxa me logey täpox song, basa tä Ursalim.'

³⁴ "Ama, ama menggä Ursalim, anggogi paxadang menggä logey na 'dämedeng menggä yaxsäwinygi sägäligäng! Agä tol kampay ka agä anduris anggo kala kuxug na enggengge tä boxu kubugke neng anggo kämpayang song! ³⁵ Ndä ganang lala kala agä awangatasa anggo! Ndä aläpedäng tanggo ka, anggo mpasac-cang nagä mändey song basa ngadang ka, 'Baxändäg tä käxi wunodung na agä Bazuwec Kalägkang!' "

14

Yasuwa Kädäxä Apang tä Xongondu Sapid

¹ Xongondu Sapid Yasuwa kä'doc tä siyad tä pang ngotorponu Farisiny ndä kulung känatäng tänya owdi jenggere ma käsac. ² Ndä apangandäng tänya owdi exengge na asängge kapuruzu. ³ Na Yasuwa kamän me lelericcä asiriyenä Musa na Farisiny ka, "Kädäppa ta asiriye ka kig däxsi tä xongondu Sapid wala kädäppa song?" ⁴ Neng säpulocca na todi Yasuwa kädana ande ta apangzi kädäxä na kayaxsas tä pa.

⁵ Na todi Yasuwa kamän sa ka, "Xänang tanggo pene täng na cong näs tigide kadel taxä gol tä xongondu Sapid ndä 'dägane tetex nyasedäng tunyu songang?" ⁶ Ndä sa sabuc ngakenegi song.

Käxa Coccoło Ngaseneng Kaläg Pokada Tiya

⁷ Ani Yasuwa koxäs palangas teredenäs otagä caka apoccong, maser nga täsa ka, ⁸ "Sabandä gi tä owdu batatang, ndakä dere owdu cakä kängga ngoniny xa nuxus nuxung kigkandäng sabandä ngondey tägi. ⁹ Ndä nuxus käxi ka-bandä anggong wung lapäng tägi ka, 'Togi komong känyca tängang tä kaxong ngondeyanang', ndä mänangang zänggä

matag tägi ndä sogo gi cengedeswa tä päxä owda biyey.

¹⁰ “Wadi kănox sabandă ging, wede icca tä päxä owda biyey ndey kăxi kabandă gi kox ging, wung läpăng tägi ka, ‘Bisko, bo wede icca tä owda apo.’ Na kala kănggi tăng kă'dayang bălede nyaygi sădogodung tăging. ¹¹ Xa kăxa poko ngaseneng Kalăg maye ze yă kăxa coccolo ngaseneng, Kalăg pokada tiyati.”

¹² Sax măndey Yasuwa ngade ta apangzi kabandă kăn tă siyatang ka, “Xongonda mpaye bandă kăn tă siyatang, acaka bandă biskodagăgi na enggă bonggugo na wayagkăgo na cong năs menggă sogalinyăgăgi kadangandeng ndey ka bandă gi tă siyad măndey. ¹³ Wadi xongonda kăsog letang, banda menggă wiy na kappudiny na mexesu na ngojony. ¹⁴ Ndey baxăndey, xa sa sămeledăng wegki sasiyang tägi song, gi 'doxo wegkăgi tă xongondu ngăsakă kănggi lelexinyang tă xăs.”

Seredăniccă Leda Tădăx

¹⁵ Nuxung accă kănggi siyacca na Yasuwa tă pang Farisiccang kădăng ngaki Yasuwa kangatang, na ngade ta Yasuwa ka, “Baxăndăg tă kănggi kă'day 'docco siyacca tă owdu Bugundugku Kalăgkang!”

¹⁶ Neng Yasuwa ngade tăma ka, “Apan-gandăng kasog led ngotey ndă bandă palangas mange. ¹⁷ Na tă xongondu led mayaxsă călăxinyăma ndey ka 'docco lăpe kănggi sabandăng ka wuno xa kala siyatatăng benecce.

¹⁸ “Neng kăn kă'day kadeb kerekă nga. Nuxu kăxi tă zălăgkang ngade ka, ‘Agănang kangany zăg ndă ampaye anoc anycopu, wanga agă anoc.’ ¹⁹ Na măndey ani tăbangeneng ngade ka, ‘Agă kangany tigitigă way asiny ndă ampaye anoc azăgă, wanga agă anoc.’ ²⁰ Yă 'doxti layis sanydăsang ngade ka, ‘Agănang andalewa xa kabagsa kăsactong ndă awunodung song.’

²¹ “Na kala călăx kămel kă'doc kalăpe ngaki ta bazuwecce. Na bazuwec ledă pa kăsănga na lăpedes ta călăxse ka, ‘Wede tetex tă akăsogă bo pa na ta akănggă

sotagă kukujiy. Banggăda menggă wiy na mexesu na kappudiny na ngojony ka wuno.’

²² “Neng călăx ngade ka, ‘Bazuwec, ngaki kălăpăng ka sogunong, kasog kala ndă musku otagă catatăng păloccă.’ ²³ Na kala bazuwec ngade ta călăxse ka, ‘Wede tă akănggă sotagi ngoniny năs sotagă walangang, banggăda kăn ka wuno ndey panang păs. ²⁴ Xa agă alăpedăng tanggo ka acaka nuxu kăxi kabandăng ndă saxang, wung pong siyakong!’ ”

'Dogi Bede tă Răbkă Yasuwang

²⁵ Xă'dă mange wedeccă na Yasuwa na mawexwa mălăpede tăsa ka, ²⁶ “Kăxa paye wung 'doc nagă ndă paye agă paccey mo'do paygi payis mena na bona na uxe na pengge na enggă bongga na măndey ngase songang, layis me răbkang song. ²⁷ Kăxa poko kalicce ndă răbo agă songang, layis me răbkang song.

²⁸ “Xănang tanggo paye dony pane ndă cata ndey gan na zay wegka 'desede tonyakă pane nang songang? ²⁹ Kănox kănyca gărtă nga ndă bosasa kadasuwec appoyo na kă'dese panăgi songang, kănggi kă'day zaye panăging kugu gi. ³⁰ 'Docco ngadeccă ka, ‘Apangzong kadonyza ndă kăpany kă'dese pane song!’ ”

³¹ Măndey măngade ka, “Buguningza key paye 'doc 'ding buguningza caka tă pogud ndă cata bălede ngase ka 'do tă pogud na asăgaruge păsăciny asiny (10,000) ndey mo'du buguningza kăne păsăciny utang (20,000)? ³² Ndă măyex ka mă'dingi nya buguningzi songang, tă cuku menggă kurusa tăxande, măyaxsada kulung menggă bolic păccatasa tă legeygă ngakă modey. ³³ Ndă mănang nuxung accăgondăng layis me răbkang song basa wangesănang wegkăgo kă'day ndey răbkădang agă.”

Enggălokega Tasiny

³⁴ “Enggăloke apoccu yă kalaye leminyang, sogoduning key meletăsăno tă coccoydăgkang? ³⁵ Enggăloke kalaye leminyang, kax săduki tă zăg na tă codoro

na wexekanatäng song basa säduki täpox. Käxa wunde dängecceng, däng ngakong!”

15

Seredäniccä Ngakä Sagända Kämes

¹ Menggä yawgä tuluba na känggi sogo ngaka tasinyang kawuno tä dänggä leg-eygä Yasuwa. ² Neng Farisiny na menggä lelericcä asiriyenä Musa ngunungunicci ka, “Apangzong bokatasa kängga sogo ngaka tasiny ndä siyacca nang.”

³ Na kala Yasuwa kaser nga täsa ka, ⁴ “Xänang tanggo sagunu täng udiny mädäg (100) ndä nuxung mes ndä wangatasa aki udiny tesped wang asiny wang paye nuxung (99) tä korongic yä 'doco tä nyamgä ani nuxung kämesang basa 'dox songang? ⁵ Ndä kala ma'doxang mäpoko tä baccugäma mälededeswa nang tä akäsog. ⁶ Mämelede tä pa, mabange aminuguma na menggä akäsogalinygäma ka, 'Posa agä nycugo aledäning xa ka'dox sagändanggi kämesang.’ ⁷ Aläpedäng tanggo ka, ka'das nya bangi kän lededäning paccey tä pang Kalägi tiyating tä ngakä käxa nuxungza käxajä tä ngaka tasiny. Xa ledi tiyati tä pang Kaläggkang kamo'du ledä aki udiny tesped wang asiny wang paye nuxung (99) lelexiny kamen ngakä Kaläggkang.”

Seredäniccä Ngakä Ariyaliccä Fudana Kämes

⁸ Yasuwa kawetäde na legey ka, “Cong näs uxa ariyalinygä fudada täng asiny ndä nuxung mesang, banye lampane ndä wortäcca paccey ndey 'dox owde song? ⁹ Ndä ca'doxang cäbange aminuguce na menggä sogalinygäce cängade ka, 'Nycugo aledäning xa ka'dox ariyalic-canggi kämesang.’ ¹⁰ Ka'das nya bangä ledong, aläpedäng tanggo ka, Kaläg na malayikadage lededäning tä ngakä käxa nuxungza käxajä tä ngaka tasiny.”

Seredäniccä Apang na Pengge Pädax

¹¹ Yasuwa ngade ka, “Apangandäng mägaccäng na enggä pengge pädax. ¹² Penämani biyeyang lapada täma ka,

‘Appa, ampaye larä male täwas.’ Na kala mesa kälarä male kadoga käma.

¹³ “Na tä sängga bälaxiny mäguduri malenäma manganya kä'day mägä'docco nang tä cabära täxande. Mägä'doc mawanye nang tä wexekä tawustug winy.

¹⁴ “Na kala mägä'dese malenäma, na buxu kamen nya cabäri na xas kapax ma paccey. ¹⁵ Na mängade tä ngasäma ka, ‘Anoco ta nuxu me cabärong ani buduruginyge tängang ndey ameskädä buduruginyge.’ ¹⁶ Mägä'doc ndä säleye siyad täma kasog ma mäpaye siyakä sa säpärki mädogada ta buduruginyang.

¹⁷ “Na xongonendäng manimäng pang mesa na mängade tä ngasäma ka, ‘Wi siye agä anycu todong xas paxe agä, yä appanang wekenetäng mange menggä wexeke siyacca matasa de kulung tegete-seng.’ ¹⁸ Mängade ka, ‘Anoco tä pa ta appanang aläpede täma ka, ‘Appa, kasog ngaka tasiny tagä Kaläg na tagä gi. ¹⁹ Kandäppas ka bandäs agä penägi mändey song. Wanga agä alayis me wexiccägi.”’

²⁰ “Na kala mamen sog mämele tä pa ta mesa. Na mesa kox ma täxande na age kawasa täma kápaxas ma kagapas ma. ²¹ Na mängade ta mesa ka, ‘Appa, kasog ngaka tasiny tagä Kaläg na tagä gi. Kandäppas ka agä anäs penägi mändey song.’

²² “Neng mesa kabandä cäläxinyge ka, ‘Dägana goyining tandäni appoyong laga ma nang, na бага kälincic loxi tä päxä andäma na laga ma na käbadaga apoccu.’ ²³ Na mesa kabandä menggä wexed ka, ‘Goyining päxä 'dämädi kawingang nycugo ampärki ma nang, na aledäning, ²⁴ xa päxä penang-gong kämes neng sa'dox ma! Oxodig ka mägäxsä, neng manang mawung mox-acca.’ Na kän käledäno.

²⁵ “Yä päxä penämani ngondeyang nyandäng tä pelow na kala kawung wede dänge tädäxä kän buldi na coxad na langad tä pa. ²⁶ Na kala mägädokala täxande mabandä me wexed mamän ka, ‘Oxadi kasiwa tä pang?’ ²⁷ Na me wexed lapada täma ka, ‘Päxä bonggo kämel kawung, neng menggo kápärkä ma

na pāxā 'dāmādi kawing pacceyang, xa mawung wanāma apo.'

²⁸ "Na mägäsānga malewa tāxande na mesa kā'doc tāma māne ma ka, 'Wi siye gi zaxe wunad towang?' ²⁹ Na māngade ka, 'Za, kalayigādā nagi ewexecce tāgi kala cālāx ndā ande ngagigi, yā kax taxā nuxu kädong pāxā ayis ka apax asig na aminugang song. ³⁰ Yā pāxā penāginong kasax gi, kabag malene kā'doc kawanye nang na tabany, ndā kawung kämpärkä na kaledāwa tāng.'

³¹ "Na mesa kabuc tāma ka, 'Penang, ging nagā tol ndā wegang kā'day king-gig. ³² Yā pāxā bonggonong kāmese tāpox neng sa'dox, oxodig ka kāsā neng manang mawung moxacca, nyang kasog kämpärkä mang ndey ledānig.' "

16

Seredāniccā me Menekā Wegkā Kāxa Kadangandey

¹ Yasuwa kalāpe tā menggā rābke ka, "Apangandāng nās tanganic salāpe tāma ka me menekā wegkāma kawanydās weg. ² Na ma 'doxti kadangandeyang kabandā me menekā wegke kamān ka, 'Oxadi kasiwa andānge sālege ngakā wexekāging? Genesa wexeki kāwex kā'dayang xa gi mändey noco layis me menekā wegang song.'

³ "Na me menekā weg ngade tāngase ka, 'Oxadi gang asogkang, xa bazuwec-cang paye caye agā tā wexekangang? Agā ampādāg de ka awacca song ndā zānggā matag tagā ndey ka anyāxayza. ⁴ Ayex 'doga asogo ndey kax sābogkung agā tunyu tā wexekang na kām bokatasa agā tā padāgka.'

⁵ "Na kala mabanggādā känggi kamendā amusudi tā 'doxti kadangandeyang nunuxundi. Na mamān ani tāzālāgkang ka, 'Gining bazuweccang paye tāgi käreny?' ⁶ Na nya apangzi kabuc ka, 'Bālegkā belenyinygā midā kuluc udiny mädāginy tespedespe (800).' Na me menekā weg ngade tāma ka, 'Koyung faragiccā amusunugi icca tāzāg tetex gärekärejesa udiny mädāginy tesped (400).' ⁷ Na mändey me menekā

weg kamān 'doxti nuxungang ka, 'Gining bazuwec paye tāgi käreny?' Na nya 'doxti kabuc ka, 'Māpaye landagā guruwec pāsic nuxung (1,000).' Na me menekā weg ngade tāma ka, 'Baga faragiccā amusunugi gärekärejesa udiny mädāginy tespedespe (800).'

⁸ "Na bazuwec kāboxey me menekā wegki kälākälājang xa mawexse na yerändāg. Xa känggi mene ngakā Kalāg songang, yerāniny tā wexekanagi wexe na acāngganang mo'do känggi kamen ngakā Kalāgkang. ⁹ Ndā alāpedāng tanggo ka zoga biskodagāgo na bangā tangandāgkā walangic, ndey edekeny asānggāgo kalaye pāloccung, ndey sābogkasa anggo tā pang Kalāgi tiyating.

¹⁰ "Kāxa mägaxse bow tā pāxā 'doga bālxang, mändey mägaxse bow tā wegka mangeccā, yā kāxa mägaxse jul sogo raj tā pāxā 'doga bālxang, mändey sogo mānang tā wegka mangeccā. ¹¹ Kānox gang mägaxsāgi bow tā menekā tangandāgkā walangic songang, zogowa key mägaxsāgi laye bow tā tangandāg tā pang Kalāgi tiyating? ¹² Ndā kānox mägaxsāgi bow tā menekā wegkā kāxa caka songang, xānang togodung känggi tāging? ¹³ Me wexetandāng pāx wexecce ta bazuwecciny pādax song, xa nyāsogo 'do paye nuxung paccey yā saxe nuxung. Mändey nuxus nyāsog gigili nuxung yā ndāridāswa tā nuxung. Kigkandāng dacada wexe ngakā Kalāg na ngakā male song."

Yasuwa Kalegeyze ta Farisiny

¹⁴ Farisinygi paye ngakā male pacceyang kädāng ngaki Yasuwa kalegey kā'dayang, na sagug ma nās anyad.

¹⁵ Neng Yasuwa ngade tāsa ka, "Anggo läpedeng ngastānggāgo tagā kām ka anggo mpoccang na'do yā dara Kalāg yex ngakā mäganygāgo. Wegkāgogi ngoxodānang nang tagā kām na tā warā kānang, tas tagā Kalāg.

¹⁶ "Asiriyenā Musa na sorunu menggā logey kawexse tā loydāgkā ow basa Yoxana me Pac kawung. Ndā kala yaxsāwecci apo lege ngakā bugundugku Kalāgkang duwaleywa ndā kala kām

kä'day kasägkesäno ndey ka läs bugundugku Kaläg. ¹⁷ Zäkoxa na täzäg way winy 'diti päxä munu jengicca sacarasa ta asiriyenä Kaläg ka werwa.

¹⁸ "Käxa kasax uxe ndä 'doc bag uxa cakang, kasog ramic, ndä käxa kabag uxa yoxe kasaxang, ramacca."

Yasuwa Kälegä Ngakä Apangza Kandangandey na Apangza Wiywa

¹⁹ Yasuwa ngade ka, "Apangandäng kadangandey ndä lagewa na tanduga dulatulajeccä ndä todotol siye siyaka apoccu. ²⁰ Ndä apangandäng säbangäs Liyasir wane bägälic käpoposu wunodung sängo tä akäsogaldä pang nyapangzi kadangandeyang, ²¹ paye ka 'dox enggä siyaki teldeccä tä tumunu siyakämang ndey ka si. Ndä isu wunosung laxte wanämani käpoposung.

²² "Na kala ani Liyasir käxsäsang, malayikada kabag ma kagoyas ma tä owdi Apraxim tängang. Na apangzi kadangandeyang mändey käxsä na sabosu. ²³ Na mägä'doc tä mas na mägäsa tiyati moxada Apraxim täxande na Liyasir kacca tä wane käsac. ²⁴ Na mabandäsa ka, 'Wawa Apraxim, wanga agägi wayesäng tagä, lapi ta Liyasir ka mä'doc mäluji päxä andäma tä ma mäwung mädälbes tä nyiparang xa agänanganang tä cäläxtäg tä mas.' ²⁵ Na Apraxim kabuc täma ka, 'Atä, bäli ka tä cuku gi täzäg kä'dox wegkä apoccu kä'day yä Liyasir ka'dox wegka apoccu song, tabewa winy. Neng gang ma mägäluki buduldug yä gi käwalas tabi. ²⁶ Ndä tä ngakong kä'dayakang, salu ow tagog tä pidi ndey ka kängga paye ca'dsa wuno tanggo tä owdiyang, wunosung song na kängga tanggo tä owdi paye wuno täwas tä owdongang, cogo owduskonong song.'

²⁷ "Na sax mändey apangzi kadangandeyang ngade ta Apraxim ka, 'Wawa, ampaye gi ka yaxsa Liyasir tä menggä panäsko täzäg ²⁸ xa enggä bongguskotäng kawangasa mädäg ndey Liyasir 'doc daxä sa ndey säccagä exenggäsa ndakä sädelese tä mas ka'das agä.' ²⁹ Neng Apraxim ngade täma ka,

'Asiriyenä Musandäng na sorunu menggä logey wanga sa sädäng ngaki legeng.'

³⁰ Na apangzi kadangandeyang ngade ka, 'A'a, wawa Apraxim, basa nuxung käxa käxsä kangäsa tä xäs kä'doc kaläpe ngakong täsang, säxajeccä säwange ngaka tasiny.' ³¹ Neng Apraxim kämeley täma ka, 'Känox sägädäng ngakä me logey Musa na menggä logeygi nasa songang, kax kig äxsä ndä ngäsa 'doc läpe nga täsa na sädänge säxong.' "

17

Yasuwa Käbäldey Menggä Räbke

¹ Yasuwa ngade tä menggä räbke ka, "Bäli ka ngatatäng wunosung gawadas anggo tä ngaka tasiny! Ndä woyoy tä känggi 'docco sogongang! ² Ndä käxi kädäppa ka 'doco sogong, saxsa ngayiccä ngorey tä ngase ndä sägawa nang tä colonggo 'diti togku känggong mäganyga bowinyang tä sogku ngaka tasiny. ³ Meskäde ngastänggägo. Känoxang päxä bonggo sogo ngaka tasinyang, duxi ndä mägäxajä mawang ngaka tasinyang, zaxi täma. ⁴ Kax mäsoq ngaka tasiny tägi taxä paxtänding tä xongonda nuxung ndä mämeley ngasäma mäwung tägi taxä paxtänding mangad ka, 'Agä kaxajä tä sogku ngaka tasinyang,' saxi täma."

⁵ Na känggi Yasuwa käligäng ngadeccä täma Bazuwec Yasuwa ka, "Posa menekä ngakä Kaläg täwas!" ⁶ Na Bazuwec kabuc ka, "Kä'dang menekä ngakä Kaläg tanggo biyey kala päxä yugicca biyeyang, kax läpeng tä etong ngoteyang ka zuduwa na mäxke 'doc udusawa tä kaxsä colonggo, na dänge ngakägo.

⁷ "Päx nuxung accägondäng cäläxse päkädäng pelow na cong näs megäskä sagonuwang na läpede tänya cäläxseneni ka, 'Bo icca siysi?' ⁸ A'a, wadi gi bazuwec noco läpede ta cäläxsägi ka, "Dayawa, wexe siyad ndey dogung siyad tagä accäg asiya na awuxsi ndä kala gang gi ziyza na wuxsi.' ⁹ Bazuwec logo cäläxse xa ka kasog ngaki maläpe tängang song, päx mälogo täng? ¹⁰ Anggo mändey käwexeng wexeki agä kaläpäng tanggo ka wexengang,

kax wexeng na noccang ngadaccang ka, 'Was anäsigg cäläxinyga täbangä wexeki wexedäningang nenyang kandäppig dädäxti song.' "

Yasuwa Kädäxä Menggä Omoda Asiny

¹¹ Ani Yasuwa kä'docus tä Ursali-mang, mägäläng pidänä Samriya na Calil. ¹² Mägä'doc ngäte tä päxä cabär, na apanginyatäng layis menggä omoda asiny käpasasa täma na kadenggeze täxande, ¹³ kädawasa ngadeccä ka, "Yasuwa, Bazuwec, wanga agägi wayesäng täwas." ¹⁴ Mägäxo sa na mälapede täsa ka, "Wesi pari ngastänggägo ta menggä tämed tä Kaläg ndey säduwaley ka wadäkägo kalaye apoccu." Na kala säwedetese na sa'doxung wadäkäsa kädäxäno salaye säpoccu.

¹⁵ Na nuxung accäsa kox wane kalay apo na kämel dawé dädäxti Kaläg. ¹⁶ Kä'doc kädukurusa tagä Yasuwa logo Kaläg, ndä ma 'doxti me Samriyang. ¹⁷ Na Yasuwa ngade täma ka, "Kandäxä anggo näsang asiny song? Kulung känggi paye nuxungang sati? ¹⁸ Basa me pungudonggang tol kämel kawung kädädäxti Kaläg tä ngakä däckeng?" ¹⁹ Na tänya owdi Yasuwa läpede tä nya me Samriyani ka, "Ngäsa wede xa menekä ngakägi tagä kädäxä gi."

Bugundugku Kaläg Wunosung

²⁰ Xongonendäng kulung Farisiny kamän Yasuwa ka, "Xongonda keyang bugundugku Kaläg wunosung tängang?" Na Yasuwa kabuc ka, "Bugundugku Kaläg wunosung na bolu de oxowa song. ²¹ Oxowa ndey ka anggo ngadang ka, 'Nyanang!' na, 'Nyani!' song. Bugundugku Kaläkatäng nanggo kala."

Päxä Käxa Jul Wunodung

²² Yasuwa ngade tä menggä räbke ka, "Owandäng wunodung ndä anggo noccang mpadang ka zang cukang, agä Päxä Käxa Jul tä butug, ndä zadang säxong. ²³ Ndä kän ngadeccä tanggo ka, 'Lala, mani todil!' na cong ka, 'Lala, manang todong!' Ndä ndakä ndängeng ngakäsa."

²⁴ Xa agä, Päxä Käxa Jul, xongondeneni awunodung kala wuxekä koxana banye tiyati na ota kä'day.

²⁵ "Ndä täzäläg basa agä anycäläxtiwa tä weg mange na mändey menggä zong pexkä agä. ²⁶ Ka'das wexeki kän kawex tä xongondu 'doxti säbangäs Noxang, mändey kän wexe sawexeki basa xongondi agä, Päxä Käxa Jul awunodung tängang. ²⁷ Kän siyacca na wuxicci na batacca na sädere bal koxasa xongondi Nox kaläsa kaxsä dämpejigseneng. Na faya kawung kapax kän kä'day.

²⁸ "Winy ka'das ani tä xongondu 'doxti säbangäs Lotang, kän siyacca, wuxicci, nganyacca ndä nganyatasa, ndä zäbecce na tonyacca, ²⁹ neng xongondi Lod kawetäs tä kaxsä pana säbangäs Sudumang, Kaläg kayaxsä mas na nganyuga kusuccu kaduny kän bägälic. ³⁰ Ndä kän wexe nya bangongang, mändey laye kala xongondi agä, Päxä Käxa Jul aweyete-sawa tängang. ³¹ Ndä tänya xongondi, käxi täzä ax yä wegke tä axang, ndakä coccoleza ndey ka bag wegke song na mändey känggi tä pelowang ndakä mele tä pa song. ³² Gärning ngaki kasoguno tä uxu Lotang!*

³³ "Käxa paye ka meske rongicce täzäkgang wadi mesede yä käxa meske rongicce täzäg songang 'doxo aygä liliy. ³⁴ Aläpedäng tanggo ka ongudeneni kän tugu salany pädapädax, ndä Kaläg bate nuxu yä nuxu laye. ³⁵⁻³⁶ Mändey uxu pädax tugu ngoreygä kuny tä ngayicca nuxu, ndä nuxu ux säbate yä nuxu laye."

³⁷ Na kala menggä räb kamän Yasuwa ka, "Tä owda key, Bazuwec?" Na mabuc täsa ka, "Owda wininy kädurisäno tängang, bäli ka wegka käxsetäng täng."

18

Yasuwa Kälegä Seredäniccä Mandur na Buguning

¹ Yasuwa kaser nga tä menggä räbke ka palacca todotol ndakä cananga. ² Mängade ka, "Buguningandäng tä nuxu bo pandäng nyigate Kaläg song

* **17:32** Uxu Lod kaweräswa sudu enggäloke xa cägaw zäce calala Sudum cäsaxe 'doc wangesänake.

ndä nyaye kân song. ³ Ndä mändey mandurandäng tänya bo pani wunodung melde täma läpede täma ka, 'Bo geye was na me kurang ndey ndäppoy was.'

⁴ Tazälägäne buguning kalewa, neng magärtä ngaki mandur melde tängang, na mängade tä ngasäma ka, 'Agä anyigate Kaläg song ndä anyaye kân song, ⁵ ndä mandursong nyanang gang nyalange agä todotol, bal anoc agey ta me kure xa cämelde tagä cäwange agä anungu song.' "

⁶ Na Yasuwa ngade ka, "Ndänge sele ngakä buguningza däppo kân song! ⁷ Yä päx nya Kaläg nyädäppo känggänyagi nyalebäng ngeyettä tänya säxe na ongutang song? Yä päx Kaläg waxe posakä kân? ⁸ Aläpedäng tanggo ka Kaläg däppo kängge tetex, yä tä wunakang agä, Päxä Käxa Jul, päx awunodung a'doxodung menekä ngakä Kaläg tazäg?"

Yasuwa Kaser Ngakä Farisic na me Yawgä Tuluba

⁹ Mändey Yasuwa kaser seredäniccong ta kulung känggi kabogkasa ngastängga ka yex ngaki wexeng ndä laleyis kân kängga winyang ka, ¹⁰ "Apanginyatäng pädax kä'docco taxä tämed tä paley, nuxung Farisicang yä ani nuxungang me yawgä tulubang.

¹¹ "Na Farisic kangäsa tiyati kapaleza ngade ka, 'Kaläg, alogo gi xa agänangang kala kulung kân song, kala menggä celdug song, na kala menggä ngananganegä nga song, na kala menggä ramiccu song, ndä agäng kala me yawgä tulubanani song. ¹² Tä sängga paxtinding, agä amene uxkud tä sängga pädax ndä aluwu asiny tä wegkänggi a'doxo udiny mädäggkang (100) adogodung tägi.'

¹³ "Yä me yawgä tuluba kädokol täxande ndä gunusawa na zänggä mayad ngade ka, 'Kaläg, wanga agägi wayesäng tagä, xa kasog ngaka tasiny!'

¹⁴ "Aläpedäng tanggo ka kala tä 'dockäsa tä pa, Kaläg kagixi me yawgä tuluba xa mägaxse bow, yä Farisic, Kaläg kagixi song. Käxa poko ngaseneng, Kaläg

maye ze yä käxa coccolo ngaseneng, Kaläg pokada tiyati."

Yasuwa na Enggä Pipu

¹⁵ Xongonendäng kân kagoying engga ta Yasuwa ndey ka mäpes. Neng menggä räb kox mänang, na sadux kân ka dokalas koyinakä pipu. ¹⁶ Neng Yasuwa kabandä pipu ka, "Wanga pipu wuno tagä, ndakä zekeng sa xa känggi 'dase pipugongang bugundugku Kaläg kănanag. ¹⁷ Aläpedäng zänggä nga tanggo ka, käxa käpay bugundugku Kaläg kala päxä pipi songang, Kaläg kixidi tä bugundugke song."

Apangza Kadangandey

¹⁸ Xongonendäng bazuweccä Yaxudinyandäng kamän Yasuwa ka, "Me bälidic, gi mpoyo na'do, asogowa key ndey a'dox aygä liliyang?" ¹⁹ Na Yasuwa kabuc täma ka, "Oxadi kasog gi bangäs agä käxa apong? Käxa apondäng song, basa Kaläg nuxundugke. ²⁰ Anggo yexeng täsedänic ngade ka, 'Acaka rameyza, acaka paxsa, acaka pälze, acaka lege celdug, nyaya menggo na bonggo.' " ²¹ Na nya bazuweccä Yaxudinyi kabuc ka, "Cawu biyeydäggkang agändäng awexe ngakong bägälic."

²² Yasuwa kädäng mänang, na lapada täma ka, " 'Dogkandäng nuxung musku käsog song. Nganyi wegki täging kä'day larti tä känggi widunong ndey dangandey tä pang Kaläg tiyati. Ndä bag bangang."

²³ Ani 'doxti kädängäs ngaki Yasuwa kalegey mänangang, mägaxse ka'dexwa xa madangandey nano.

²⁴ Yasuwa kox mänang na ngade ka, "Bede paccey tä käxa kadangandey ndey ka läs bugundugku Kaläg! ²⁵ Tireneng ka kamalä läso axä wuladä 'diti käxa kadanandey tä läsakä bugundugku Kaläg."

²⁶ Na känggi kädängang ngadeccä ka, "Neng gang mänangang xänang seley xonyo ngaseneng?" ²⁷ Na Yasuwa kabuc ka, "Käxa seley xonyo ngasenendäng song, basa Kalägkang tol xonyaccang."

²⁸ Na Putros ngade ka, "Lala, kawangesänig wegkäsko kä'day ndey ka abagig banggi!"

²⁹ Na Yasuwa ngade täsa ka, “Aläpedäng zänggä nga tanggo ka, käxa tanggo kawangasa pane na uxe na enggä bongga na mena na bona na pengge ndey ka wex ngakä Kaläggang, ³⁰ nyäposo täng mange mo'do aki kalayeng tä jendong na ur'dug tä 'doxakä aygä liliy.”

Yasuwa Kanimäng Xäske

³¹ Yasuwa kabag känggenegi kälīgä asiny wang pädaxang, kä'doc nang tä cengic na mäläpede täsa ka, “Kala lala, 'doccig tä Ursalim, ndä ngaki kä'day menggä logey gärekärejesa tä ngakä agä Pächä Käxa Julang, 'docco 'desetäsäning tä owdi. ³² Kän 'docco menedes agä ta asänggä känggi näs Yaxudiny songang, sä'docco sängobo agä, säcäläxti agä ndä säpädadas agä. ³³ Sä'docco säbade agä na ke'diccä oxay, säpaxe agä ndä asängo pädax na tä sängädi kodosang angäsata tä xäs.”

³⁴ Neng känggi mägälīgä asiny wang pädaxang, kabäle bangä ngakämagi song, xa legeygi malegeyang kacungguli sa. Sabäle bangä ngaki Yasuwa lege täsang song.

Yasuwa Kalenge Agä Ngojox

³⁵ Ani Yasuwa kawunäs ngäte ta Ar-ixang, apangandäng näs ngojox kaccä tä nyixtä akäsog nyäxacca. ³⁶ Na mägädäng tädäxä kän na mamänze ka, “Oxadi kiyang kasiwang?” ³⁷ Na säläpede täma ka, “Yasuwa me Nasra nyang wedeng.” ³⁸ Na kala mabandäsa ka, “Yasuwa, päxä pe Dawud, ata agägi wayesäng tagä!” ³⁹ Na känggi kädoleyzi kadux ma ka mäpäla neng mägädawa paccey ka, “Pächä pe Dawud, ata agägi wayesäng tagä.”

⁴⁰ Na kala Yasuwa kädokala läpede ka sägoyung ngojox täma ngäte. Sagoyung ma ngäte na Yasuwa kamän ma ka, ⁴¹ “Oxadiyang mpaye agä asog täging?” Na mabuc ta Yasuwa ka, “Bazuwec, sogä agä azayza mändey.” ⁴² Na Yasuwa ngade täma ka, “Laleyzi, menekä ngakägi tagä kaxony gi.” ⁴³ Na tetex agäma kalenge-suno na mabag bangä Yasuwa, mädädäxti Kaläg. Kän kä'day kox mänang, na kädädäxti Kaläg mändey.

19

Yasuwa na Zaka

¹ Yasuwa kadus bo pana säbangäs Ar-ixa. ² Ndä apangandäng tänya owdi säbangäs Zaka näs ngotorponu menggä yawgä tulbada kadangandey. ³ Mäpaye ka mälaley Yasuwa neng mädäläng tä warä xä'dä kasog ma moxo Yasuwa song. ⁴ Na mägoy tetex mapacca mägä'doc ma'deg zä balasu ndey ka mox Yasuwa, xa Yasuwa 'doco lange nya sogi.

⁵ Ani Yasuwa kəcogus owdumaniyang, koxas ma tiyati täzä ed na ngade täma ka, “Zaka, coccoleyzi tetex bo xa xongondong 'doccig cuccig tä panägi.” ⁶ Na tetex Zaka kacoccoleza kä'doc kabokasa Yasuwa tä pane na led.

⁷ Kän kä'day kox mänang na kan-gunungunizi ka Yasuwa kä'doc kalayis palangasiccä käxa sogo ngaka tasiny. ⁸ Neng Zaka kangäsa ngade ta Bazuwec ka, “Lala, Bazuwec, agä alare wegkang tä pidi adogada kulung tä menggä wiy, na mändey kasog käläkäläjtäg tä wegkä nuxu kigkang amelede 'dogi payeng täng taxä tesped!”

⁹ Na Yasuwa ngade täma ka, “Xongondong Kaläg kaxony panong, xa Zaka tirä päxä pe Apraximang! ¹⁰ Xa agä, Pächä Käxa Jul kawung tä nyam na tä xonyakä kängga kämese.”

Yasuwa Kaser Ngakä Buguning na Cäläxinyge Asiny

¹¹ Ani xä'dä deldeyäs wungga tä leg-eygä Yasuwang, mawung ngäte tä Ursalim, ndä kän oxo ka bugundugku Kaläg kala wunosung kəcogos. Na todi maser nga täsa. ¹² Mängade ka, “Pächä pe buguningandäng kä'doc tä walangicca täxande ndey ka sädoga butug täng ndä mel. ¹³ Na kala ka mä'doco na mabandä cäläxinygäma asiny mägälarta ariyaliny täng asiny ka däseydä basa mämel mawung.

¹⁴ “Neng känggäma paye ngakäma song na sayaxsa menggä yaxsäwiny ka läpe ka, ‘Ampayedig 'doxtong layis buguningzäsko song.’ ¹⁵ Ani mägä'docus sadoganäs butug täma ndä mämeläsang, mabandä cäläxinygämagi madoga

ariyaliny täng ndey ka däseydäng. Mäpaye mabäle wegki sa'dox tä zängganang.

¹⁶ "Cäläxsi täzäläggang kapäcca täma ngade ka, 'Bazuwec, ariyalicci kädogung tagä nuxungang, kawexä ka'dox täze asiny.' ¹⁷ Na buguning ngade täma ka, 'Käwexä apo, gi näs cäläxxa apo! Xa mägaxsägi bow tä päxä 'doga bälax, asogus gi ngotorpo mene kaxsänggä padäg asiny.'

¹⁸ "Na mändey pädaxeneni kawung ngade täma ka, 'Bazuwec, ariyalicci kädogungang kawexä ka'dox täze mädäg.' ¹⁹ Na buguning ngade täma ka, 'Gi noco mene kaxsänggä padäg mädäg.'

²⁰ "Na kodoseneni kawung täma ngade ka, 'Bazuwec, ariyalicci kädogung tagäng nyanang kamulungiy na päxä nyonggo kayokas. ²¹ Xa anyigate gi xa ayex gi ka näs apangza mägaxse täbag na'do. Ndä gi bate maleni layis nänggi kä'dangas songang ndä jede wegki kätzäbä songang.' ²² Na buguning ngade täma ka, 'Agänang amene gi tä legeygä ikägi, gi näs cäläxxa kadawustey! Yex ka agä anäs buguningza mägaxse täbag abate maleni layis nänggä kä'dangas songang, na ajede wegki kazäbä songang? ²³ Neng wi siye gi kä'danga ariyalicciang tä axä owdu däsey ndey koyung ze songang?'

²⁴ "Na buguning ngade tä menggä wexekenegi dokoloccung ka, 'Gujuyn-ing ariyalicci tämang tunyu dogi tä cäläxsong käne asinyang.' ²⁵ Neng sängadeccä täma ka, 'Bazuwec, noxo ma ariyalinygämatäng asiny!' ²⁶ Na buguning ngade ka, 'Aläpedäng tanggo ka käxi kädäsey wegkeneng aposo täng, yä käxi kädäsey käne songang, agujudung täng tunyu. ²⁷ Wadi gang menggä kuranggong paye ka alayis buguningza songang, goyining sa tagang todong dämde ngastänggä sa! "

Ndetelegunu Läsakä Yasuwa tä Ursalim

²⁸ Ani Yasuwa kä'desenäs seredäniccong mawetäde tiyati tä Ursalim. ²⁹ Kala mägä'doc ngäte tä enggä cabärtaga säbangäs Faci na Petani tä Cabärä

Zayitun, na mägäpäcca menggä räbkäma pädax. ³⁰ Mäläpede täsa ka, "Wesi tä päxä cabäri taggägong. Känoccang käläsangang, 'doxadang päxä kaccäna taxä nuxung kig kasana täze song kaxsasawa todi. Nyuli goyining tagä todong. ³¹ Kä'doxang käxa kamän anggo ka, 'Wi siye anggo nyuliding kaccängang?' Läpi täng ka, 'Bazuwec paye.' "

³² Na sa känggi mayaxsa kapäccasang ka'doxa sangaki maläpe täsang. ³³ Säga'docco säludi päxä kaccä na letuge mäne sa ka, "Nyuliding kaccänong koyadang ti?" ³⁴ Na sabuc täsa ka, "Bazuwec paye." ³⁵ Na kala sagoya päxä kaccä ta Yasuwa sapetäde tandugusa tä onge ndä Yasuwa 'deg.

³⁶ Masana täze na kän kapetädesa tanduga tä akäsog ndey dädäxti ma tä laxänakäma. ³⁷ Kala mawung käsac tä akäsogi coccolacca päkädäng Cabärä Zayitunang, na menggä räbkäma kä'day daweccä lededäning dädäxti Kaläg tä wexeki Kaläg kawex sägoxang. ³⁸ Sängadeccä ka, "Baxändäg tä buguningzi Bazuwec Kaläg yaxsedängang! Modeyatäng tä pang Kaläg tiyati na dädäxtiy tä Kaläg!"

³⁹ Neng kulung Farisinyatäng tä warä xä'dä ngadeccä täma ka, "Me bälidic, daxa menggä räbkägi ka säpälasa." ⁴⁰ Na Yasuwa kämeley täsa ka, "Aläpedäng tanggo ka kax säpälasa na nganyugong dawatasä dädäxti agä!"

Yasuwa Age Kawayasa tä Ursalim

⁴¹ Ani Yasuwa kawunäs ngäte koxus Ursalimang, mangedä tä ngake, ⁴² mängade ka, "Anggo menggä Ursalim, kämeseng xa xongondong käbäleng ngaki koyodung modey tanggong song, neng gang kala mändey noxadang 'dogi koyodung modey tanggo song. ⁴³ Tä sänggi wunosunong menggä kurugo kakaradas anggo tä kaxsä cabär tä cende kä'day ndä räbadas anggo. ⁴⁴ Säwasadas anggo käked, anggo na penggägo säwange nuxu accägo tä kaxsä Ursalim song, ndä kax ngayicca säwange täzä wayanandäng song. Ngakong sogoduno xa anggo

kājenggereng na kăbăleng ka Kalăg kawung tanggo song.”

Yasuwa Käyegeley Kăn Taxă Tămed tă Kalăg

⁴⁵ Yasuwa kalăs kal taxă tămed tă Kalăg măgă'doc mamagăng menggă nganyad tunyu, ⁴⁶ măngade tăsa ka, “Gărekărejesawa tă Sorunu Kalăg ka, ‘Panang, pang paleyang,’ yă anggo kăsogasang axă menggă bărada!”

⁴⁷ Yasuwa băldecce todotol tă kaxsă kaldagă axă tămed tă Kalăg. Ndă bazuwinygă tămed tă Kalăg na menggă lelericcă asiriyenă Musa na kulung ngotorpugă Yaxudiny nyame rajsa ndey ka paxăs Yasuwa, ⁴⁸ neng sa'dox rakawza ndey săpaxăs ma song, xa kăn kă'day kagur ma delde wungga tă ngaki mălegeng.

20

Bugundugku Yasuwa

¹ Xongenendăng Yasuwa bălde kăn tă kaxsă kaldă axă tămed tă Kalăg na măduwale yaxsăwecci apo lege ngakă Kalăg tă kănang. Na bazuwinygă menggă tămed na menggă lelericcă asiriyenă Musa na ngondowinygă Yaxudiny kawuno tăma ² ngadeccă tăma ka, “Lapăng, xănang kă'dakas gi ka wexseng? Xănang kadong butug tăgi ka wexseng?” ³ Neng Yasuwa kămeley tăsa ka, “Amăne anggo măned ndă anggo buci tagă. ⁴ Kalăgkang kă'daka Yoxana ka pacă kănang, wala kănag kă'dakas ma ka măpacsang?”

⁵ Na sacengesuno tă cengic sabodsa watăkăsa săngadeccă ka, “Kax 'doc-cig ngadig ka, ‘Năs Kalăg’ na mă'do măngade ka, ‘Wi siye anggo kămeneng ngakă ma Yoxana songang?’ ⁶ Ndă măndey kă'doccig kăngadig ka, ‘Năs kănang,’ kăn kă'day 'dăme kog na nganyu, xa kăn oxo ka Yoxana me lo-geyang.”

⁷ Na săgă'docco sabuc ta Yasuwa ka săyex kăxa kă'dakas Yoxana ka pacsa song. ⁸ Na Yasuwa ngade tăsa ka, “Neng

alăpedăng kăxi kă'dakas butug tagă ka awexse nangang song.”

Seredăniccă Kăngga Samene Zăg Tăng

⁹ Yasuwa kaser legey tă kăn ka, “Apan-gandăng kăsăbă pelowge, ndă menes tă menggă pelowatăng ndey meskădă yă kă'doc tă wedăg kalaygădă. ¹⁰ Kala weg kiye de săjede na mayaxsas călăxsăma ka 'doc tăsa menggă pelowgi mamene zăg tăngang, ndey ka lară weg toga kăma. Neng sa menggă pelowgi mamene zăg tăngang kăbadă călăxsăma ndă matas tăma na asăngge păloccu mănang. ¹¹ Sax măndey măgălasă mayaxsa nuxu călăx. Na măndey salandă ndă săbadă ndă sămatas tăma na asăngge păloccu. ¹² Sax măndey mayaxsa kodoseneni. Ani kala săgăbadă săgămexestey ndă sămaga tunyu.

¹³ “Na ledă pelow ngade tă ngase ka, ‘Oxadi asog gangang? Basa ayaxsas tiră păxă penenggong ampaye ngake pacceyang nuxus să'doc sănyay ma.’ ¹⁴ Ani kănggi samene zăg tăng koxăs nya penămaniyang, săgaxsăning săngadeccă ka, “Doxtongang lugucing, nycugo apaxa ndey lugig pelowge!’ ¹⁵ Na tetex samen ma sabokung ma tunyu tă kaxsănggă pelow săgă'docco sapax ma.” Na Yasuwa kămăn sa ka, “Ledă pelowgi kamenes pelow tăsang sogo sa key? ¹⁶ Ma măwunodung măpaxe kănggi mamenes pelow tăngang yă mădogada tă kăngga cakuny.”

Na kala kăn kădăng ngakong na ngadeccă ka, “Nyăzekă ngakong ndakă soguning mănang!” ¹⁷ Neng Yasuwa kalaley sa kăteg na ngade tăsa ka, “Ngaki gărekărejesuno tă Sorunu Kalăgkang ngadeccă ka wi? Ngadeccă ka, ‘Ngay-icci menggă tonyad kăpexkăng kalayis ngayicci saluweccă kadasuweccă ax.’” ¹⁸ Ndă kăxa kadel tăză nya ngayicciyang, nyăroborobogo yă kăxa nyadeles zeneng, nyăregeregeje.”

¹⁹ Na tănya axă owdi menggă leler-icci asiriyenă Musa na bazuwinygă axă

* **20:17** Yasuwa bangăs ngase ngayicci saluweccă ax.

tämed tä Kaläg paye ka men ma xa sabäle ka maser ngaki täsa, neng sänyigate kän.

Yawgä Tuluba ta Kaysar

²⁰ Ngotorpodagä Yaxudiny jenggere Yasuwa käsac ndey ka sä'dox rakawza sämenäs ma na sayaxsas menggä raj ka 'docco paxesäning käräp sogosuning kängga apoccu. Säpaye ka sädäng legey tä ikäma ndey sämenenäs ma tä andä buguningzä Romaniny. ²¹ Na menggä raj ngadeccä täma ka, "Me baldic, wa ayexig gi ka nycofu'dono legey ndä bälde zänggä nga tä ngakä Kaläg. Ndä päx gele kän song. ²² Gang kädäppa ka wa yawwig tuluba adogig ta Kaysar wala awangig toke?"

²³ Neng Yasuwa kabäle rajsi tä mäganängsang na mängade täsa ka, ²⁴ "Doguning dinarsä Romaniny tagä. Läpäning ligidä xänang na agä xänang garekärejesuno tä ongeneng?" Na sängadeccä täma ka, "Näkä Kaysarang."

²⁵ Na Yasuwa ngade täsa ka, "Dogi wegki layis gäkä Kaysarang ta Kaysar, na aki layis käkä Kalägang dogi tä Kaläg." ²⁶ Na tänya owdi sägädongasa tä ngaki malegeyang na sa'dox rakawza ndey sämenäs ma tagä kän song, na sägämolosuno.

Batad na Ngäsad tä Xäs

²⁷ Kulung menggä Yaxudinygi säbangäs Saduginy, ngadeccä ka kig äxse ngäsata tä xäs songang, kawuno ta Yasuwa. ²⁸ Sängadeccä täma ka, "Me baldic, me logey Musa garekärejesa nga täwas ka apangza päxä bona kabagsa ndä äxsä yä kiyäng pipu songang, päxä bona bag nya mandursi ndey iyäng pipu tänya päxä bonanani käxsäng. ²⁹ Ndä enggä bonyatäng paxtinding. Päxä bonanani täzälägang kabagsa ndä käxsä kawangasa uxe kiyäng pipu täng song. ³⁰ Ndä ani täbängeneng kasog mänang. ³¹ Kodoseneni kasog mänang. Sägädoneydä batakä ce uxi ndä sägäxse na'anggäsa paxtinding sägiyäng pipu song. ³² Na ce täzäce cägäxse tä bangäsa. ³³ Gang mänangang, xänang täsa 'do

layis yoxuce tä xongondu ngäsad tä xäsang, ndä na'anggäsa sägädoneydä batakä ceng?"

³⁴ Na kala Yasuwa ngade täsa ka, "Menggä zong batacca na säbate. ³⁵ Xa känggi lelexiny, ur'dug ngäsotäsäng tä xäs tä xongondu ngäsad tä xäsang, batacca na säbate song. ³⁶ Ndä sa mändey säxseccä song xa kala sa'das malayikada. Säs enggä Kaläg, xa sänguso sa tä xäs. ³⁷ Mändey me logey Musa kabäle ka kaxa käxsä ngäsata tä xäs. Ka'das ani garekärejesawa tä Sorunu Kaläg tä ngakä masi kagusi ta Musa tä kaxsetang, ani mabandäs Kaläg ka Kalägä Apraxim, Kalägä Isxag na ka Kalägä Yaxubang.† ³⁸ Kaläg Bazuweccä kängga oxaccang, päx näkä kängga käxseng song. Xa kän kä'day ayeccä tänya."

³⁹ Na kala kulung menggä lelericcä asiriyenä Musa kabuc tä ma ka, "Me baldic, gi kälegeyze apo na'do!" ⁴⁰ Na todi sanyigatas mänekä ma.

Mäneki Padäginy Yasuwa Kamänäs Kän tä Ngakä Almasiyang

⁴¹ Neng mängade täsa ka, "Oxadi siye sa sängadeccä ka Almasi näs päxä pe Dawutang? ⁴² Dawud täze ngade tä Sorunu Masmur ka, 'Bazuwec Kaläg kangad ta Bazuweccang ka,

"Bo icca tä cengiccä andä abaniccang,

⁴³ bal asog gi nyebesa menggä kurugi täzäg."

⁴⁴ "Dawud bangäs ma 'Bazuwec,' yä mälayis päxä pene key?"

Yasuwa Kädaxä Menggä Räkke ka Wang Poporey

⁴⁵ Ani kän kä'day deldeyäs wungga ta Yasuwang, Yasuwa ngade tä menggä räkke ka, ⁴⁶ "Meskädäning ta menggä lelericcä asiriyenä Musa. Xa säpaye lagkä tanduga apoccu säwalangeccä nang ndä sama'dite modey tä owtagä nganyatada na säpaye cad tä owtagä dädäxti tä axinygä paliccinygä Yaxudiny na owtagi sänyaye ngotoropu täng tä siyatang. ⁴⁷ Yä sägäläkäläji wegkä manduriny

† 20:37 Kaläg kalegeyze ta me logey Musa tä kaxseti mas kangäsa täng ndä siye kaxsed songang.

ndä sädertesäno säpalacca mäna'ang. Känggi kala akakiyang, sag seley Kaläg 'doco cäläxti ta'asang."

21

Mandur Kadägesese

¹ Yasuwa jenggeracce tä axä tämed tä Kaläg na kox känggi kadangandeng gawdadas wegkanagi kabegse nangang tä kaxsä cokonu yawgä weg tä Kaläg. ² Na mändey mägox mandursa wiwandäng gawa enggä ariyaliny pädax tä kaxsä nya cokoni. ³ Na mängade ka, "Aläpedäng zänggä nga tanggo, lala päxä me wiygong näs manduranang nyang gawa wegke kamo'du kän kä'dayang. ⁴ Xa känggong kä'day kabegsekang kabag weg tä zänggä wegkä tangandägka ndä toga, yä ce satäng täce kätogo'dog song yä cabag kä'day cadoga tä Kaläg."

Bolugi Läpedäng Sanydä Owang

⁵ Xongenendäng känatäng legecce tä ngakä axä tämed tä Kaläg, tä wegki kabastäning na nganyugi wuxeccä täwang axang na wegkä beged, na Yasuwa ngade täsa ka, ⁶ "Gang anggo nycuccang jenggeredeng weggong xa owandäng wunodung kax ngayicca tenggelecece täzä wayanandäng song, säcobatasa täzäg kä'day!"

⁷ Na samän Yasuwa ka, "Me bälidic, sangakong bägälic kälegeyang sogoduno ogey? Na oxadiyang layis boluge läpedäng ka ngakong sogoduningang?"

⁸ Na mängade täsa ka, "Meskädäning xa acaka sänanangey anggo xa kulung känatäng mange wunosung nanange anggo nagang, ngadeccä ka, 'Agänang anäs Almasiyang,' ndä kala, 'Sanydä ow kawung.' Acaka anggo ndängeng ngakäsa! ⁹ Ndä kändängeng pogud na keley na kamatang, ndakä nyigatäg men anggo. Xa basa ngakong wuno kayesäno täzälägäne tä loydägkä ow. Ndä sanydä ow wunodung tetex song."

Cäläxtigä Menggä Räbkä Yasuwa

¹⁰ Yasuwa ngade ka, "Pogud ngäsata tä cabärta, ndä buguninginy pogo ngastänga. ¹¹ Ndä mändey wäxäd

na buxu na täxäd wunosung 'da'de ota mange ndä nyigatäg mene kän na mändey tädäxtäg na bolu päkätäsäng tiyati.

¹² "Ndey ka ngakong kä'day sogo-duno, sä'docco täzälägäne sämen anggo säcäläxti anggo na sämenedes anggo tä asänggä menggä axä paliccä Yaxudiny na särikidis anggo tä ax. Sägodung anggo tagä buguninginy na tagä turuginy xa anggo kämeneng ngakang. ¹³ Ndä xongondeneni layis akäsog tanggo ndey läpeng ngakang. ¹⁴ Ndakä gäredeng 'doga noccang legedeng tagä buguninginy ndey ka mäxising nang. ¹⁵ Xa agä anoco alägi anggo na turaydey tä 'doga noccang legedeng ndey ndakä menggä kurugo mo'du anggo.

¹⁶ "Menggägo na enggä bonggo, na wayakägo na biskodagägo 'docco menedes anggo de sogo kulung acänggägo säpaxe. ¹⁷ Na mändey kän kä'day 'docco saxe anggo xa anggo kämeneng ngakang. ¹⁸ Neng tä ngakong kä'day, 'doga zegeledäng rongiccägondäng song. ¹⁹ Ndä mäganygä padätäggägo tä ngakang sogo anggo liliccing ur'dug."

Ursalim Wanyiswa

²⁰ "Neng xonga känoxang Ursalim kagukuriwa na asägaruwang, ndey kala bäleng ka wanyiske kawuno käsac. ²¹ Ndä känggi tä cabärä Yaxudiyang basa oyasa tä zänggä cabärta. Mändey känggi tä kaxsä Ursalimang, wulageccä ndä känggi tunyang ndakä läsa, ²² xa sa sänggi Kaläg cäläxti menggä Ursalim tängang, nyang ndey ngaki gärekärejesänong 'desesäning.

²³ "Ndä tänya xondi kawungang woyoy tä uxugi kä'dosuning na 'deyeceng! Xa todi kän zäyazäyangedäning täzäg na bälede xuxubtäg. ²⁴ Sädelgetese ta asänggä menggä salu na menäs sa cäläxiny tä warä kän. Känggi näs Yaxudiny songang 'docco paxatasa Ursalim na teretereje basa xongondäsa 'desedeswa."

Wunakä Päxä Käxa Jul

²⁵ “Ow kawungang, noxadang bolu tä xong tä asämex na tä nyinyiwes ndä kän kä'day täzäg wiyazeccä na käre ngakä xuduxudigä colonggo na dampajeygä ma. ²⁶ Nyigatäg mene kän togada tä woldoxey tä 'dogi sägox wunodung tä walangiccang, xa panggudugki tiyating kala gi'dikidäning seley.

²⁷ “Na kala kän oxo agä, Pächä Käxa Jul ampagacca tä däminggaru na panggudug na tädäxtic. ²⁸ Neng wegkong kasogunongang, ngusosäning bolosuning na mäganYGä pädatäg xa kala 'dakiccägo kacecce'deyze ngäte.”

Seredäniccä Etä 'Dami

²⁹ Yasuwa kaser nga täsa ka, “Lala etä 'dami na kulung ewegong bägäliccakang. ³⁰ Känoxang wungga lilixiccing, na bäledeng ka kala wiwilis ngäte. ³¹ Mändey känoxang ngakong sogoduningang kala bäli ka bugundugku Kaläg kasexxesäng. ³² Aläpedäng zänggä nga tanggo ka menggä zong äxseccä song basa ngakong soguno. ³³ Zäkoxa na täzäg 'desetäsäno yä legeygang wayeccä song.

Nycicci Palecci

³⁴ “Mesekädäning ndey acaka mäganYGägo pägäni ndaldänang tä tawustäg na tä wuxid de bux paxe anggo, na kärekä ngakä aygägo ndä acaka sanydä ow wung ndä kurumusa anggo kala kadäbäx. ³⁵ Xa nya xongondi wunodung kamedäng känggong kä'day täzäkgang. ³⁶ Wadi layesi kängga cuccu cagiyang na palecci ndey layang mpädägänyang ndey mäsasing ngaki kä'day wunosung sagoduningang ndey ndokalang tagang agä, Pächä Käxa Jul.”

³⁷ Todotol Yasuwa bäldecce tä kaxsä kaldagä axä tämed tä Kaläg ndä ongutang mä'do mäccu tä Cabärä Zayitun. ³⁸ Ndä kän kä'day loxto ow wunotäsäno täma tä kaxsä kaldä axä tämed tä Kaläg tä dänggä bäldeccäma.

22

Yaxusa Kaläpe ta Buguninginygä Yaxudiny ka Mämenede Yasuwa Täsa

¹ Xongondi Tanyaranä Raxifta Säwacce Song, ani säbangäs Pärkitang, kawung käsac. ² Na bazuwinygä menggä tämed tä Kaläg na menggä lelericcä asiriyenä Musa nyame rakawza ndey ka paxäs Yasuwa ndä sänyigate kän neng säpaye säpax ma na raj.

³ Na Däniye kadel tä wang nuxu accä känggämagi mägäligä asiny wang pädaxang, ani säbangäs Yaxusa Iskariyuti. ⁴ Mägä'doc mabodsa na bazuwinygä tämed na ngotorpugi meske axä tämed tä Kaläkgang ndey ka mämene Yasuwa täsa. ⁵ Na wadäkgäsa kalaye tidiny sagixi ka sädogada ariyaliny täma. ⁶ Na kala sägaxsä ngakäsa na ma. Na ma Yaxusa mägä'doc mänyame rakaw ndey mämenenäs Yasuwa täsa tä owda xä'dä wundung täng.

Deleygä Pärkid

⁷ Kala xongondi Tanyaranä Raxifta Säwacce Songang kawung ndey ka Säpärkisi na sädämze na pächä dopolog. ⁸ Na kala Yasuwa kayaxsa Putros na Yoxana, läpede täsa ka, “Wesi ndele Pärkid ndey wunig siysig täng.”

⁹ Na sängadeccä täma ka, “Owda keyang mpaye anoccig andeleyig tängang?”

¹⁰ Na mabuc täsa ka, “Ndänge, känoxang käläsang kaxsä pang 'doxadang apangandäng poko pete päse ma. 'Dorkäda ma tä pani mä'doc mäläsang, ¹¹ na lapi tä ledä pa ka, ‘Me bäldeic kayaxsä was tägi ka wa amänig gi ka axä palangaski mäwunodung Säpärkicci täng na menggä räbkäma na säsiyzang nyandi?’ ¹² Mä'do mäläpedäng apanggä axandäng tiyati na ka'dika'dinä kaxse, wesi ndele wexekägo tadi.”

¹³ Na kala sägä'docco sa'doxa sangaki Yasuwa kaläpe täsang, na sägädeley Pärkid täng.

Siyaki Yasuwa Kasiy na Menggä Räbke ndey Niminäs Mang

¹⁴ Kala sanä Pärkid kawung, Na Yasuwa kä'doc kagur siyad na känggi mägäligäng. ¹⁵ Na mängade täsa ka,

“Wanang tidi xa kalängädi tä siyakä siyakä Pärkidkong nanggo xa kala sä'docco säcäläxti agä tä bange. ¹⁶ Ndä aläpedäng tanggo ka agä asiye Pärkid nanggo mändey song basa ngaki Kaläg kayaxsäng agä tängang 'desesäning layis wega tä bugundugku Kaläg.”

¹⁷ Na mabag päxä kobox päse malog Kaläg mängade ka, “Mene dugi na'anggägo. ¹⁸ Aläpedäng tanggo ka xongondong sanydangang tä wuxikä magä adilu basa bugundugku Kaläg wuno.”

¹⁹ Na mändey mabag raxif malog Kaläg ndä mäbeny mädogä täsa mängade ka, “Yanä wanangang kadogung tanggo. Zogada adinong mänang ndey nimidänang agä nang.” ²⁰ Kala sasiyza na mabag päxä kobox, mängade ka, “Päxä koboxsä tamiccanggong coladaswa tanggong, nyang layis axäska warändi tanggo na Kaläggang.”*

Paränakä Mäganygäwan Tunyu

²¹ Yasuwa ngade täsa ka, “Lala, käxi 'doc menedes agäng andenenang nagä tä tumunu siyad ganang. ²² Agä, Päxä Käxa Jul a'docco anäxse kala ngaki Kaläg kabogkasang ndä woyoy ta apangzi menedes agäng!” ²³ Na todi sadelese tä mänekä ngastänggäsa ka xänang seley 'docco sogo ngakongang.

²⁴ Na sawaläte ka xänang tä waräsa ngake tädäxiny mo'do acängganang. ²⁵ Na kala Yasuwa ngade täsa ka, “Buguninginy na ngotorpugu känggi näs Yaxudiny songang cäläxti kän ndä dalacca ka apoccu. ²⁶ Ndä anggo kändäppang ka layang ka'das sa song, wadi käxi tä warägo ngake tädäxiny kamo'du acängganang, bokasa ngase täzäg na ngotorpo lay kala me wexed. ²⁷ Xänang ngake tädäxiny mo'do accanang, käxi kacca bene siyatang, wala käxi wexe siyatang? Wadi käxi kacca bene siyatang kädäppa ka nyaza ngake tädäxinyang. Neng agänang tä warägo ka'das käxi wexecceng.

²⁸ “Anggog tol kändokalang nagä tä läbang. ²⁹ Nenyang agä adogodung

butug tanggo ka'das togunakenegi appanang kadogunäs tagäng, ³⁰ ndey guring siyad tä owdu bugundugku ndä nycatetäsänang tä komzu bugundug mendedeng caxsänggä Israyilinygi asiny wang pädaxang.”

³¹ Na Yasuwa ngade ta Saman Putros ka, “Saman, Saman, dänge! Däniye käpaydä ka läbä anggo na'anggägo ndä Kaläg kä'daka, ndä Däniye 'do pede anggo kala pedeki me pelow pededenäs nyadanä gärwec täpoxang. ³² Neng agä kapaleyza tägi Saman, xa ndakä menekä ngakägi tagä 'dexäning. Xongonda kämeley mägaxsäging, pädäti enggä bonggugo.”

³³ Neng Putros ngade täma ka, “Bazuwec, kax ka wi, na agä ano nagi tä ax na tä xäs!” ³⁴ Na Yasuwa kämeley täma ka, “Putros dänge, ndey ka tä kesekä ow modolong logo, gi n'do gäli agä taxä kodos ka 'di agä.”

³⁵ Na Yasuwa ngade täsa ka, “Ani kayaxsanäs anggo tä wexed ndä aläpänäs tanggo ka ndakä bagang ariyaliny mange nanggo na meldänä wedäg na 'dataginy axinyga pädaxang, päx nuxu 'dogkandäng kä'disä tanggo?” Sabuc ka, “A'a, päx 'doga kä'disändäng song.”

³⁶ Na mängade täsa ka, “Neng gang käxa tanggo ndarudigä ariyaliny tängang bag na mändey bag meldänä wedäg. Ndä käxa saläne täng songang, nganya tandäne, nganyäs salä. ³⁷ Aläpedäng tanggo ka ngaki menggä logey gärekärejesa tä ngakangang, basa 'desesuno. 'Ndä kän bangäs agä märing.’ Xa ngaki menggä logey gärekärejesa ka soguno tagäng kala sogoduno.” ³⁸ Na menggä räbkäma ngadeccä täma ka, “Za, Bazuwec, saluwakang todong pädax.” Na Yasuwa läpede täsa ka, “Mangeccä.”

Yasuwa Kapaleyza tä Cabärä Zayitun

³⁹ Yasuwa kawetä ka'das ani todotolang kä'doc tä Cabärä Zayitun, na menggä räbkäma kabag bangäma. ⁴⁰ Sägäcoqu ow na mäläpede tä menggä räbkäma ka, “Palecci ndey Däniye käläbä anggong degeng.”

* **22:20** Axäski layis kākä boxinyganang sag kän tämecce na oxayda ndey ka cay ngaka tasiny tängang.

⁴¹ Na masexte mägä'doc mägädukurusa mäpalacca ka, ⁴² "Appa, kănox gixisang, ampaye gi xony agä tä akăsogu cälăxtigong awededes tângang. Yä năs giza kămpaydăs agâng, wanga soguning na ngakăgi xa na ngakang song." ⁴³ Na malayika kăpătâng tiyati kăpădăti ma. ⁴⁴ Tă zănggă paleygămagi mäpalacca na ză'diriy na mapaleydăcca paccey seley dexă modiccăma tălăbe tăzăg ka'das tamic.

⁴⁵ Ani mangăsanăs tä paliccang mägămele ta mēggă răbkăma ma'doxas sa sapăgini tä kuniy de sasăndăcco. ⁴⁶ Na măngade tăsa ka, "Oxadi sângadatang? Ngăsosuning! Palezi ndey Dăniye kălăbă anggong degeng!"

Menekă Yasuwa

⁴⁷ Ani musku mălegeccenăs tăsang, nuxu me răbkămani săbăngăs Yaxusang kaleza koyo xă'dă na kă'doc kawu'dakas Yasuwa kăbuciy. ⁴⁸ Neng Yasuwa ngade tăma ka, "Yaxusa, gi gang menedes agă, Păxă Kăxa Jul na bucigong?"

⁴⁹ Kulung mēggă răbkă Yasuwagi nangang kox 'dogi paye sogkuwang, na ngadeccă ka, "Bazuwec, mpaye was wa ampogig nycokong na salugusko?" ⁵⁰ Na nuxu me răbkăma kajede wundă abanică călăxsă ngotorponu axă tămed tă Kalăg tăpox. ⁵¹ Neng Yasuwa ngade ta mēggă răbke ka, "Ndokolosi mănang!" Na Yasuwa kălăbă wundă călăx kămele tâng na kalay apo.

⁵² Na Yasuwa ngade ta bazuwinygă axă tămed tă Kalăg na ngotorpugu megăskă axă tămed na ngondowinygă Yaxudinygi kawuno tă menekă mang ka, "Anggo kăsagang tagă na salu na gany dexă ka'das ka agă anăs maring? ⁵³ Agă kanycu nanggo tă kăxsă kaldă axă tămed todotol ndă păx tă nuxung kămeneng agă song. Neng ongudong xongondugong na xongondu butugku lătăg!"

Putros Kagil Yasuwa

⁵⁴ Kala samen Yasuwa samagas tagăsa sagoyas tă pang ngotorponu axă tămed tă Kalăg. Yă Putros răbto sa ndă lewa tăxandăxang. ⁵⁵ Kulung kăn kadox mas tă pidină kăxsă kal pagedăning na Putros

kă'doc kăcca tă warăsa pagewa. ⁵⁶ Na păxă uxandăng năs me wexed kox ma tă banyiccă mas na kajenggerey ma ngade ka, "Apangzong nyang na Yasuwa seley!"

⁵⁷ Neng Putros kagil ngade ka, "Ama kuxong, ayex ma săxong!"

⁵⁸ Sax măndey tă bălaxtăg, nuxu accăsandăng kox ma na ngade tăma ka, "Gining măndey năs nuxu me răbkă Yasuwa." Neng Putros ngade ka, "Amo, agănang song!"

⁵⁹ Săgăcudisi mănă'ang na nuxu kig kalewa ka, "Kax ka wi, na 'doxtongang na Yasuwa, xa ma măndey măs me Calil." ⁶⁰ Neng Putros kămeley tăma ka, "Amo, ayex 'dogani legeng song!" Na tănya owdi musku tă zănggă legeygăma, modolong kalog. ⁶¹ Na kala Yasuwa Bazuwec kawexeswa kalala Putros kăteg na Putros kăgărăng ngaki Bazuwec kalo-gey tămang, ka, "Ndey ka tă kesekă ow modolong logo, gi n'do găli agă taxă kodos." ⁶² Na Putros koya tunyu kangey paccey.

⁶³ Na kala apangaski kamen Yasuwang kadeb ngobku Yasuwa ndă bade. ⁶⁴ Săgaxsă agăma ndă sămăne ma tetedetex ka, "Logeyzi! Xănang kadă ging?" ⁶⁵ Na măndey săgăcemdă ma.

Sagoya Yasuwa tagă Ngotorpugă Yaxudiny

⁶⁶ Ani ow kagezănăsang, bazuwinygă axă tămed tă Kalăg na mēggă lelericcă asiriyenă Musa kudurisuno. Apan-gaski kamen Yasuwang kagoying ma ta ngotorpugă Yaxudiny. ⁶⁷ Săngadeccă tăma ka, "Kănox năs Almasiyang, lăpăng tăwas." Neng Yasuwa ngade tăsa ka, "Kax alăpăng tanggo, na gixiding song, ⁶⁸ ndă kax amăn anggo na bucing song. ⁶⁹ Neng băli ka xongondong na tă bange kă'day, agă Păxă Kăxa Jul, anoco anycata tă andă abanică Kalăgi pang-gudug tângang." ⁷⁰ Na kala na'anggăsa săngadeccă tăma ka, "Neng giningang năs păxă Kalăgkang?" Na mabuc tăsa ka, "Axeneng, anggo ngadaccang ka agâng." ⁷¹ Na săngadeccă ka, "Kăxa măndey payedig ndey ka mănigkandăng song. Xa kog kădăngig na wunggong tă ikăma!"

23

Samenes Yasuwa ta Pälatis

¹ Ngotorpugä Yaxudiny kangusosuno kagoya Yasuwa ta Pälatis. ² Sagäli täma ka, "Wa kamenig 'doxtong woko kän ka sog pogud na ka wang yawgä tuluba ta Kaysar na mägasada tä ngasäma ka ma mämas Almasi buguning."

³ Na Pälatis kamän Yasuwa ka, "Giningang näs buguningzä Yaxudinyang?" Na Yasuwa kämeley täma ka, "Axeneng, gi kangad mänang."

⁴ Na Pälatis ngade ta bazuwinygä axä tämed tä Kaläg na xä'dä ka, "Ka'dox 'doga tasta de ka giling nga nang tä 'doxtong song."

⁵ Neng saleyning sängadeccä ka, "Ma mabälde kän mäwoko bägälic tä kaxsä Yaxudiya. Madeb tä Calil ndä mäccogu owdong nang!"

⁶ Ani Pälatis kädängäs ngakiyang, kamänze ka cong Yasuwa näs me Calilang. ⁷ Pälatis kabäle ka Yasuwa kápätäng Calil ndä Xirudusang näs bazuweccä Calilang, na mayaxsas Yasuwa ta Xirudus xa nya xongongi Xirudu-sandäng tä Ursalim.

⁸ Ani Xirudus koxus Yasuwang wanäma kalay tidi paccey xa mandäng mäbenecce ka mäpaye mox Yasuwa, xa mägädängdä sälege ngakä Yasuwa ndä mäpaye ka mox boliccä were wexeki Yasuwa wexeng. ⁹ Xirudus kamändä Yasuwa nano. Neng Yasuwa kabuc täma song. ¹⁰ Ndä bazuwinygä axä tämed tä Kaläg na menggä lelericcä asiriyenä Musa satäng tänya owdi dokoloccu, kaleyning kilidi nga täma. ¹¹ Na todi Xirudus na asägarugu megäske kängobtu Yasuwa ndä lagä ma na tandugu butug ndä meles ma ta Pälatis. ¹² Na tänya xongondi Xirudus na Pälatis kalayenäs aminu xa kalaygädä säs menggä kur.

Sagoyas Yasuwa tagä Xä'dä

¹³ Pälatis kabandä bazuwinygä axä tämed tä Kaläg na ngotorpugä Yaxudiny na kän, ¹⁴ mäläpede täsa ka, "Anggo goynang 'doxtong tagä ka wanyis kän. Ndä kamändä ma tagägo ndä 'doga ka'dox täma tasandäng näs 'dogi anggo giling

täma ka mäsoğondäng song. ¹⁵ Ndä wala Xirudus ka'dox nuxu 'doga tas täma, nenyang mägämeleyäng ma tägogkang. Za, ma masog 'doga de ka säpaxe ma täng song. ¹⁶⁻¹⁷ Gang adogadas ma säbade ma na ke'diccä oxay ndä kala a'dakas ma."

¹⁸ Neng sägädawasa na'anggäsa ka, "Baga 'doxtong paxa! Yä 'daki Parapas täwas!" ¹⁹ Parapas apangza sägäräki tä axang xa kageley ngase pogo turugsä Rumanidi kamen Ursalimang ndä kapaxsa. ²⁰ Pälatis kalegeyze täsa mändey tä ngakä Yasuwa xa mäpaye mä'dakas Yasuwa. ²¹ Neng saleyning sädaweccä ka, "Nggadi ma tä kalic, nggadi ma tä kalic!" ²² Pälatis käläsä taxä kodeseneni ngade täsa ka, "Xanya? Oxadi masog tasang? Agä ka'dox 'doga ma masog tas kädäppa ka apax ma täng song. Agänang adogadas ma säbade ma na ke'diccä oxay winy ndä a'dakas ma." ²³ Neng musku saleyno na daw ka sägadas ma tä kalic. Na mägädänge täsa. ²⁴ Kala Pälatis kagixi 'dogi säpayeng na kädakas Yasuwa ka säpax. ²⁵ Na mägä'daka 'doxti säbangäs Parapas sägäräki tä ax xa kageley ngase pogo turug na kapaxsang yä macananga madoga Yasuwa ka säpax xa kän paye mänang.

Gadeygä Yasuwa tä Kalic

²⁶ Ani sabokunäs Yasuwa tunyang, sägäpasasa na Samandi näs me Sayrunang. Kápätäng tä xining ka läso Ursalim na sägänagey sägäpoka kalic tä ngase ka 'dorkädä bangä Yasuwa nang. ²⁷ Na kän kawuno mange kabag bangäsa, ndä tä warä sa känggi uxuwatäng kunuccu na ngeccä tä ngakä Yasuwa.

²⁸ Neng Yasuwa gaw ze läpede täsa ka, "Anggo uxugu Ursalim, wanga ngeyig tä ngakang, wadi ngeyi tä ngakä ngastänggägo na tä enggenggägo. ²⁹ Xa ngakong ngaletäsäno, seley owda tasandäng wunodung ndä kän 'docco ngadeccä ka, 'Baxändäg ta pixu na kuxtugi taxä nuxu kápoku pipi songang na ki'digi kädäyze songang!" ³⁰ Ndä nya owda tasti kawungang, kän 'docco ngadeccä tä cabärta ka, 'Delesäning tä zänggäsko!' na tä cobocoboriny ka,

'Mäxosuning nawas täzäg!' ³¹ Gang kän kasog ngakong tä eta musku tuduwinyang, oxadi sogowa tä eta kamasäng?"

³² Kulung märinginyatäng pädax sabokung tunyu ndey ka sä'doc säpax na Yasuwa. ³³ Ani sägäcogus owdi säpaxe kän täng säbangäs "owdu zänggä kängga käxseng", sägä'docco sägadas ma ta kalic na mändey märinginygi sägadas tä käna. Nuxu ta cengiccä aban-iccäma na nuxu tä cengiccä nyogoldäma. ³⁴ Neng Yasuwa ngade ka, "Appa, wangi täsa xa säyex ngakong säsongong song." Na sa asägarugi gadas Yasuwa tä kaliccang sägä'docco sägäcasäng sawany atapayu ndey sälartäs tandugu Yasuwa.

³⁵ Kän kädokolo lale ma, na mändeng ngotorpugä Yaxudiny kadegejeydä ma ngadeccä täma ka, "Ma maxonydä kän. Wanga ma mäxony ngasäma ka cong mäsa Almasinä Kalägang, ani Kaläg kayaxsäng nuxungang!" ³⁶ Mändey asägaru kängobtä ma ndä 'docco toga buxka kawace täma ka mäwux ³⁷ ndä ngadeccä täma ka, "Yex ngasägi ka näs buguningzä Yaxudinyang, xonya ngasägi!" ³⁸ Badaxiccandäng sägärekarerejeze täng tä owdu zäma ngade ka, "Buguningzä Yaxudinyang."

³⁹ Nuxung märingzi sägadasa tä ceng-iccämang kalegeyze täma näs langad ngade ka, "Gi näs Almasi song? Ata xony ngasägi na xony was!" ⁴⁰ Neng märingzi nuxungang kadux nya accanani ngade ka, "Gi nyigate Kaläg song? Noxo kogkakang na'anggog tä zänggä xäs. ⁴¹ Tä ngakog tireneng xa kog käsogig ngaka siye kog, yä 'doxtong kasog nuxung 'doga tas song." ⁴² Na mawetäde na legeg mängade ka, "Yasuwa, känox känoc tä butugkucing wanga agägi wayesäng tagä." ⁴³ Na Yasuwa ngade täma ka, "Aläpedäng zänggä nga tägi, xongondong agänang nagi 'doc-cig tä Pang Kaläg tiyati."

⁴⁴ Ani xong kawunäs tä piding, ow kälämaswa täng bägälic kasog sada kodos, ⁴⁵ xa xong kadärändä. Na tandänä

akäsogaldä axä tämed tä Kaläg kac-ereswa tä pidi kälaräswa pädax. ⁴⁶ Na kala Yasuwa, kabandäsa paccey ka, "Appa, agä ka'daka ligidang tä andägi kala!" Ani mangadäs ngakiyang na mägänungis sanydä nunggäma.

⁴⁷ Ngotorponu asägarugu Roman kox 'dogi kasogkuwang, na kädädäxti Kaläg ngade ka, "Pezängga 'doxtong käxa lelexang!" ⁴⁸ Na kala xä'däni dokoloccu kox 'dogi kasogkuwang, kämele tä pa na zängay. ⁴⁹ Na känggi kä'day yex Yasuwang kädokolo täxande na uxugi käräbkädä bangä Yasuwa cawu Calilang kox 'dogi kasogkuwang.

Bosku Yasuwa

⁵⁰ Apangandäng säbangäs Yusif nuxung ngotorponu Yaxudinyang, ndä käxa lelexang. ⁵¹ Ndä ma mäpaye 'dogi nycoki kawex ta Yasuwang song. Ma mäsa me bo pana säbangäs Armataya tä cabärä Yax-udiya ndä mäbene bugundugku Kaläg.

⁵² Yusif kä'doc ta Pälatis ka toga wanä Yasuwa täma. ⁵³ Na Pälatis kagixi kado-gas ma ka mä'doc mäcoccoley wanä Yasuwa. Na kala mamulungi na dar-nase mägä'doc mägälola taxä morogsa sadotogey tä ngayic ndä kax taxä nuxung sabosu kig täng song. ⁵⁴ Ndä nya xongondeneni xongondu deleygä wexetang xa xongondu Sapid ngäte.

⁵⁵ Uxugi kabag bangä Yasuwa cawu Calilang, kä'docco tä bangä Yusif käsay morog na bokosänaki sabokasanäs wanä Yasuwang. ⁵⁶ Na sägämele tä pa sägä'docco sägädeley may na midä mäxäs. Na sägänunducco tä xongondu Sapid xa asiriye Musa kangad mänang.

24

Ngäsakä Yasuwa tä Xäs

¹ Xongondi tä bangä xongondu Sapitang, tä kesekä ow uxuwatäng kä'docco tä copku morog koyo mäxäsi sägädeleyang. ² Säga'docco sa'doxa kädandafi gärenggärengeswa tä cengic, ³ ani sägä'docconäs saläsäs axä morogkang, sa'doxa wanä Bazuwec Yasuwa wundung taxä morog.

⁴ Na sägädongasa sägäre ngakä 'dogi kasogkuwang, na tetex apanginy pädax kawayesäno kälagä tanduga dulatula-jeccä kädokolo tä wadäkäsa. ⁵ Na nyigatäg kadeles sa uxugi de kädukuruso täzäg neng sa apanginygi pädaxang ngadeccä täsa ka, "Oxadi siye anggo nyamadang käxa oxacca tä warä kängga käxseng?" ⁶ Mandäng todong song, mabägäng tä xäs! Nimäning ngaki maläpäng tanggo tä cukuma tä Calilang, ⁷ aki ka Päxä Käxa Jul basa sä'docco sämenes tä sänggä kängga tasiny ndey gadas ma tä kalic, na tä sängädi sogo kodoseneng, mängäsata tä xäs."

⁸ Na sa uxugi sagäräng legeygi Yasuwa kalegey täsang, ⁹ na sägämele na morog sägä'docco saläpe ngaki kä'day kasogunong ta känggi Yasuwa käligä asiny wang nuxungang na tä kulung känggi tängang. ¹⁰ Sa uxugi kox ngakiyang Mariyom Macidalinang na Xana na Mariyom bo Yaxupag na kulung uxugi nasang sag kaläpe ngaki tä känggi Yasuwa käligäng. ¹¹ Neng ngaki uxugi kăcopu morog kaläpe täsang samen song xa sälaleyis degejey winy.

¹² Na Putros kangäsa koy kä'doc kälim morog ka'doxa darnaseni samulungis Yasuwang winy. Na mägämel tä pa mägäbabangwa tä ngaki kasogunong.

Yasuwa Kaparaswa tä Menggä Răbke Pădax

¹³ Tănya xongondi menggä răbkă Yasuwagi pädaxang wedetese tä päxă cabăra săbangăs Imawus, ndă kä'dalangaswa bate sada pădax na Ursalim. ¹⁴ Ndă sălege ngakă wegki kä'day kasoguning ta Yasuwang. ¹⁵ Na tä zănggă legeygăsagi, Yasuwa kacubugiswa täsa wedeccă nasa ¹⁶ neng agăsa kamăgăning sabăles ma song.

¹⁷ Na Yasuwa kangada täsa ka, "Legeygiyakang legedeng ndă wedetesengang?" Na kăkărăb săgădokalasa săgănyonyey agăsa.

¹⁸ Na nuxung accăsani age ka Killoppasang kabuc tăma ka, "Giningang watăkăgi năs palangasic tä Ursalim tä

enggă sănggongang dexă 'di ngaki kasogunong?" ¹⁹ Na mängade täsa ka, "Ngaka keyag?"

Na sabuc tăma ka, " 'Dogi kasogkuwa ta Yasuwa me Nasrang. 'Doxteneni Kalăg kadoga panggudug tăng na wexed na legey kasog kabălesăwa ka me logeygă Kalăgkang kayaxsăng tä kăn kă'day, ²⁰ ndă bazuwinygă axă tămed tä Kalăg na ngotorpugusko kamenes ma săgadas ma tä kalic ndă săpax ma. ²¹ Yă was wakabokosunig ka mang măs Almasini kawung ndey ka xony Israyilang. Ndă ganang seley ngakong kala satăng săng pădax ndă kodosenenang. ²² Ndă măndey kulung uxugi tä warăskong kabal măganygusko ow tudizong xa saloxtu ow săgă'docco tä morog. ²³ Săgă'docco sa'doxa ngaccă wanăma song na sawuno salăpăng tăwas ka săgox malayikada lăpede täsa ka moxacca. ²⁴ Ndă kulung kănggi nawasang kă'docco tä morog ka'doxa sangaki salăpăng tăwasang kalayenăs wega ndă săgox ma song."

²⁵ Na Yasuwa ngade täsa ka, "Ama kăngga kamanande, oxadi măganygăgo păpăxiny tä menekă ngakă menggă logeygi kalegeyze tanggong! ²⁶ Anggo kăbăleng ka basa Almasi călăxtiwa ndey sădădăxti song?" ²⁷ Na madeb geneygă ngakă me logey Musa na menggă logeygi kă'dayang, măgene kă'day ngaki gărekărejesăno tä ngakă ngasăma tä kaxsă Sorunu Kalăgkang.

²⁸ Ani sawunonăs kăsac tä wang päxă cabărang, Yasuwa kasoguswa käxa paye wară päxă cabăr, ²⁹ neng sapappaledă ma ka mă'doc mălay nasa xa ow kamo'dsa. Na kala măgă'doc nasa.

³⁰ Ani magurus siyad nasang, mabag raxif, malog Kalăg ndă măbeny, ndă mălarta täsa. ³¹ Na todi agăsa kalengesăning, na sajenggerey ma sabăles ma. Na kăkărăb măgă'duywa täsa. ³² Na săngadeccă tä ngastănggăsa ka, "Yă päx măganygog kalaye tidiny tä ngaki kă'dang măgene tăgog tä akăsog năs kăkă Sorunu Kalăgkang song?"

³³ Na tănya owdi săgămelese tä Ursalim. Săgă'docco sa'doxas kănggămagi

mägäligä asiny wang nuxungang na kulung känggi todiyang kudurisuno ³⁴ na sa känggi sa'doxa kädurisunong läpede täsa ka, "Nästire Bazuwec kangäsa tä xäs, de maparaswa ta Saman Putros!" ³⁵ Na sagi pädaxang mändey saddebeyde ngaki kasoguno täsa tä akäsogkang, na benyeki mabenyis raxif de sabälenäs mang.

Yasuwa Kaparaswa tä Menggä Räbke

³⁶ Ani menggä räbkä Yasuwa legeyis ngakämang, ma Yasuwa täzäma magayasawa tä waräsa mängade täsa ka, "Amodo anggo." ³⁷ Neng sägox ma na mäganYGäsa kabal sa na nyigatäg kamen sa soxo ka sägox arälodic.

³⁸ Na mängade täsa ka, "Oxadi siye anggo nyägadänyang na basadang mäganYGägong?" ³⁹ Lala asänggang na badagä exenggang, agänangang! Läbe wanang na lala, arälodic yandäng tä wane na ngay song yä lalang agä gang anggo noxadang ngayakang tä wanang na ya." ⁴⁰ Ani malegeyis legegongang, madoga badadagä exenggäma na asänggäma ka säzay.

⁴¹ Ndä musku säcukuludäning samen ngaki mangatang song xa wadäkäsa tidiny tä oxakäma de sägädongo. Na mamän sa ka, " 'Doga siyewa tanggo todongandäng päx?" ⁴² Na tetex sabag axsicca käbux sadoga täma ⁴³ na mabag masiy tagäsa tänya owdi.

⁴⁴ Na mängade tä menggä räbke ka, "Ngakanggongag kaläpäng tanggo ani musku cuccusig nanggong, ka ngaki kä'day gärekärejesäno tä ngakang tä asiriyenä Musa na tä sorunu menggä logey na tä Sorunu Masmurang ka bal päsesäwa."

⁴⁵ Na malenge zänggäsa ndey ka säbäle ngakä Sorunu Kaläg, ⁴⁶ ndä mängade täsa ka, "Sägädokoley gärekärejey tä Sorunu Kaläg ka Almasi bal cäläxtiwa ndä äxsä ndä ngäsa tä xäs tä sängädi kodosang. ⁴⁷ Sädebe duwaleygä agä Almasi tä Ursalim na tä cabärta kä'day. Säduwale nga tä kän ka xajkä mäganYGa tä ngaka tasiny ndey Kaläg wanga ngaka tasiny täng. ⁴⁸ Ndä anggo kázayang ngakong nagägo seley ndey läpeng tä kulung kän. ⁴⁹ Ndä gang lala, agä yaxsedäng 'dogi Appanang kangad ngakeneng. Neng nycicci tä Ursalim basa Kaläg yaxsäng panggudug tanggo."

'Dockä Yasuwa Tiyati tä Pang Kaläg

⁵⁰ Na Yasuwa kabag menggä räbke kä'docco nang tä owda säbängäs Petani, na mayuxi asänggäma tiyati mapes sa. ⁵¹ Ani mäpesecenäsang, Kaläg kabag ma tä pane tiyati.

⁵² Na kala sägädukurusuno sägädädäxti ma. Na kala sägämelese tä Ursalim na led, ⁵³ na todotol sädädäxti Kaläg tä axä tämed tä Kaläg.